

Dižə' Güen Dižə' Cobə De'en Bzoj Sam Mtion'

Ḫaxta'o Jesocristən'

¹ Nga cho'en dižə' che de'e ḫaxta'o Jesocristən' dezd gan' gwxete dia che'enə'. Na' nyoj la yoguə'əte de'e ḫaxta'ogüe' ca' gwzolaozən len de'e ḫaxta'ocho Abraannə' xte na'a. Jeso'osən' naque' xi'in dia che de'e Rei Dabin', na' de'e Dabin' naque' xi'in dia che de'e Abraannə'.

² Abraannə' naque' ḫa Isaac, na' Isaaquən' naque' ḫa Jacob, na' Jacobən' naque' ḫa Joda len beṇə' biše'e ca' yela'.

³ Joda' na' Tamar zjənaque' ḫaxna' Fares na' Sara. Na' Faresən' naque' ḫa Esrom, na' Esronnə' naque' ḫa Aram.

⁴ Aranṇə' naque' ḫa Aminadab, na' Aminadabən' naque' ḫa Naason, na' Naasonṇə' naque' ḫa Salmon.

⁵ Salmonṇə' na' Raab zjənaque' ḫaxna' Boos. Na' Boosən' na' Rot zjənaque' ḫaxna' Obed. Na' Obedən' naque' ḫa Isai.

⁶ Na' Isain' naque' ḫa Rei Dabin', na' Rei Dabin' naque' ḫa Salomon. Na' xna' Salomonṇə' goque' xo'olə de'e Orias antslə ze'e yeca'a Rei Dabin' le' par gaque' xo'ole'.

⁷ Na' Salomonṇə' naque' ḫa Roboam, na' Roboannə' naque' ḫa Abias, na' Abiasən' naque' ḫa Asa.

⁸ Na' Asan' naque' ḫa Josafat, na' Josafatən' naque' ḫa Joram, na' Jorannə' naque' ḫa Osias.

9 Na' Osiasən' naque' x̄a Jotam, na' Jotannə' naque' x̄a Acas, na' Acasən' naque' x̄a Esequias.

10 Na' Esequiasən' naque' x̄a Manases, na' Manasesən' naque' x̄a Amon, na' Amonnə' naque' x̄a Josias.

11 Josiasən' naque' x̄a Jeconias na' biše'e ca'. Beṇə' ca gwnitə' ca tyempən' catə' beṇə' Babilonia ca' besyə'əche'eḡaxje' de'e x̄axta'o chio'o beṇə' Izrael Babilonian'.

12 Gwde besyə'əche'eḡaxje' lega'aque' Babilonian', goljə Salatiel xi'in Jeconiasən'. Na' Salatielən' naque' x̄a Sorobabel.

13 Na' Sorobabelən' naque' x̄a Abiod, na' Abiodən' naque' x̄a Eliaquim. Na' Eliaquinnə' naque' x̄a Asor.

14 Asorən' naque' x̄a Sadoc, na' Sadoquən' naque' x̄a Aquim. Aquinnə' naque' x̄a Eliod.

15 Na' Eliodən' naque' x̄a Eleasar, na' Eleasarən' naque' x̄a Matan. Na' Matannə' naque' x̄a Jacob.

16 Nach Jacobən' naque' x̄a Jwse ben' naquə be'en che Marian'. Na' Marian' naque' xna' Jeso'os ben' nzi' Crist, zeje dižə' ben' gwlej Diozən' par gaquəlene' beṇachən'.

17 Na' tyemp che de'e Abraannə' xte tyemp che de'e Dabin' goc žda' dia che'enə'. Na' goszolaon tyemp che de'e Dabin' xte catə'an beṇə' Babilonia ca' besyə'əche'eḡaxje' de'e x̄axta'o chio'o beṇə' Izrael Babilonian' gozac yežda' dia che'enə'. Na' leczə dezd tyemp catə'an besyə'əche'eḡaxje' lega'aque' Babilonian' xte catə'an bžin žan' goljə Cristən' gozac yežda' dia che'enə'.

Catə' goljə Jeso'osən'

18 Na' quingan' goquə catə'ən goljə Jesocristən'. Banaquən gwšagna' Marian' len Jwsen', na' ze'e ca'a Jwsen' le' par gague' xo'ole', gwsa'acbe'ine' banoa' Marian' bdao'. Goc ca' chedə' Spirit che Diozən' benən par ničh bgüendao' bda'onə' lo'o le'enə'.

19 Na' Jwsen' ben' banaquən si'e Marian' par gague' xo'ole', goque' to beṇə' chon de'e güen lao Diozən'. De'e na'anə' bene' xbab cuejyichje' Marian' šižizə sin cui no gache'i par ničh cui əgwsie' le' zto'.

20 Žlac chone' xbab gone' ca', to angl che Xancho Diozən' blo'elaogüe'e le' lao bišgal. Na' gože'ene': — Jwse, le' naco' xi'in dia che de'e Dabin'. Bito žebo' si'o Marian' par gague' xo'olo'. Spirit che Diozən' benən par ničh no'e bda'onə'.

21 Na' sane' to bi'i byo, na' əgwsio' labo' Jeso'os chedə' yebeje' beṇə' gwlaž chele ca' xni'a de'e malən' beṇə' se'ejle' che'.

22 Na' de'en goquə yoguə' de'e ca' goc complir can' gwna Diozən' de'en bzoj to profet beṇə' be' xtižə' Diozən' cana', gwne':

23 To no'ol güego' beṇə' nenaplažə'əchgua cuine' güe'e to bi'i byo dao' na' sane'ebo'.

Na' si' labo' Emanuel.

Na' Emanuel zeje dižə': Zoczə' Diozən' len chio'o.

24 Na' catə' beban Jwsen' beyož gwneine' yelən' ca', beteyo bene' can' gož angl che Xancho Diozən' le'. Jəxi'e Marian' liže'enə' par goque' xo'ole'.

25 Pero Jwsen' gwɔapəcze' le' respet xte catə'ən gwɔxane' to bi'i byo dao', xi'inə' nech. Na' gwxi' labo' Jeso'os.

2

Magos ca' jəsə'alanə'e Jeso'osən'

¹ Ca tyemp can' gwnabia' Rei Erodən', goljə Jeso'osən' Belennə', to yež gan' mbane Jodean'. Na' goquən' besə'əžin to chopə magos Jerosalennə', beṇə' za'ac galən' chla' bgüižən'.

² Na' gosə'əṇabene' beṇə' lao' syodan' gwse'e: — ĵGan' rei che beṇə' Izrael ca', be'en bagoljənə'? Nezetə' bagolje'enə' chedə' bable'ito' beljw che'enə' catə'an bla'an lažto'onə' galən' chla' bgüižən'. Na' za'ato' par niç güe'ela'oto'one'.

³ Catə' bene Rei Erodən' xtižə'əga'aque'enə', de'e juisy de'e goquene', na' leczə ca' yoguə'əlol beṇə' lao' syoda Jerosalennə'.

⁴ Nach btob Rei Erodən' yoguə'əlol bχoz əblao che chio'o beṇə' Izrael na' leczə yoguə' beṇə' ca' choso'osed choso'olo'i lei de'en bzoj de'e Moisežən', con beṇə' nitə' syodan'. Na' gwṇabene' lega'aque' gan' naquən galjə Cristən' ben' gwlej Diozən' par gaquəlene' nasyon chechon'.

⁵ Nach gwse' beṇə' ca' Erodən': —Belen nan' galje', gan' mbane Jodea, la' can' na to part Xtižə' Diozən' de'en bzoj to profet beṇə' be' xtiže'enə' cana'. Quinga nan:

⁶ Ca naquə yež Belen gan' mbane Jodea, naquəczən yež de'e zaquə'əchgua entr yež əblao ca' de'en zjəchi' Jodean',

chedə' to beṇə' Belennə' gaque' beṇə' gwnabia', na' le' əggüia əgwy'e' chio'o beṇə' Izrael.

⁷ Nach Erodən' bene' mendad ja'ac magos ca' laoguə'enə' bgašə'əzə par niç gwṇabene' lega'aque' tcho'a tšao' batə'əquən' besə'əle'ine' bla' beljon'.

⁸ Nach bsele'e lega'aque' Belennə', gože' lega'aque': —Le'e žja'ac Belennə' na' le'e žjayediljyožə bida'onə'. Na' catə' yeželelebo' na' deydixjue'ile nada' par nič leczə ša'a əžje'ela'ogua'abo'.

⁹ Beyož boso'ozenag magos ca' can' gož rein' lega'aque', nach gwsa'aque' əzja'aque'. Na' ca naquə beljon' de'en besə'əle'ine' gan' chla' bgüižən' catə' cuiṇə' sa'ac lažga'aque'enə', zdan le'e yoban' žialaon laoga'aque'enə' bžinten gwzon gan' zo bida'onə', na' gwlezən.

¹⁰ Na' besyə'əbeine' xte juisy ca de'en besə'əle'ine' beljon' de'e yoblə.

¹¹ Nach catə' gwso'e lo'o yo'onə' na' besə'əle'ine' bida'onə' len xna'abo' Marian'. Nach bosə'əzo xibga'aque' gwso'elaogüe'ebo'. Na' bosə'əsaljo caj chega'aque' ca' na' gosə'əbeje' or, yal na' to xnižə' yag de'en chla' zix de'en ne' mirra par gwso'ebo'on.

¹² Pero na' Diozən' gwdixjue'ine' magos ca' lao bišgal de que bito yesyə'ədie' gan' zo Rei Erodən'. De'e na'anə' besyə'əque'e yetolə nez par jəya'aque' lažga'aque'enə'.

Jwsen' len Marian' na' len Jeso'osən' ja'aque' Egipton'

¹³ Na' catə' babesac magos ca', to angl che Xancho Diozən' bloe' laogüe' Jwsen' lao bišgal, na' gože'ene': —Gwyas, gwche' bida'onə' na' xna'abo'onə' le'e žja'ac Egipton' na' sole xte catə'əch əṇia' le'e batə'əquə' guaquə yesa'acle, chedə' Erodən' banži'e bia' yeyilje' bida'onə' par gote'ebo'.

¹⁴ Nach nencal gwyas Jwsen', gwche'e bida'onə' len xna'abo'onə' zja'aque' Egipton'.

15 Nach gwnite'e Egipto na'azə xte catə'əch got Erodən'. Na' de'en gwso'one' ca' goc complir de'en bzoj to profet beṇə' be' xtižə' Diozən' cana'. Quinga bzoje' de'en gwna Xancho Diozən': "Chixjue'ida' Xi'inə'anə' yeze'e Egipton'."

Erodən' bsele'e soldad par gwso'ote'yoguə' bi'i byo dao'

16 Na' lao bazja'aque' Egipton' Erodən' lechgualē bžejene' catə' gocbe'ine' gosə'əxoayag magos ca' le' de'en cuich besyə'ədie' gan' zo'enə'. Na' segon can' gwyejni'ine' catə' gwṇabene' lega'aque' antslə do batə'əquən' bla' beljon', bsele'e soldad che' ca' par jse'ete' yoguə'əloj bi'i byo che'en dao' zelao bi'i chop ize, bi'i ca' gwsa'aljə Belennə' na' yeziquə'əchlə yež ca' zjənyečj zjəmbi'i Belennə'.

17 Na' laogüe de'en gwso'ote' bi'i byo dao' ca', goc complir can' bzoj de'e profet Jeremiasən', ben' be' xtižə' Diozən' cana', gwne':

18 Gaquə bgüine bgüežən' yež de'en nzi' Rama. No'ol ca' zjənaquə xi'in dia che de'e Raquelən' lechgualē yesyə'əyašə' yesyə'əgüinlaže'e che yoguə' xi'in da'oga'aque' ca' əsa'at.

Na' bito se'enene' par no yeyo'exen lega'aque'.

19 Lao ṇe'e nitə' Jwse ca' Egipton' got Erodən'. Nach to angl che Xancho Diozən' bloe' laogüe' Jwsen' lao bišgal.

20 Na' gože'ene': —Gwyas, beche' bida'onə' len xna'abo'onə' na' le'e žjəya'ac Izraelən'. Bagwsa'at beṇə' ca' besyə'əyilj bida'onə' par so'ote'ebo'.

21 Nach gwyas Jwsen' beche'e bida'onə' len xna'abo'onə' jəya'aque' lažga'aque' Izraelən'.

²² Pero Jwsen' catə' benene' de que Arquelaon' bedie' belane' xlatjə de'e x̄e' Erodən', bžebe' žjəya'aque' gan' mbane Jodean'. Na' Diozən' gwdixjue'ine' le' lao bišgalən' de que bito žjəya'aque' Jodean' sino que žjəya'aque' gan' mbane Galilean'.

²³ De'e na'anə' besyə'əžine' syoda Nasaretən' na' jəsyə'anite'e. Na' de'en jəsyə'anite'e Nasaretən' goc complir de'en bosozoj de'e profet ca' cana' gosə'əne' che Jeso'osən' de que beṇə' yesə'asi'ene' beṇə' Nasaret.

3

Juan ben' bchoa beṇə' nis gwdixjui'e dižə' güen dižə' cobə che Diozən'

¹ Na' gwde zan iz, Juan ben' bchoa beṇə' nis gwyeje' latjə dašən' gan' mbane Jodean'.

² Na' gwdixjue'ine' beṇə' gože' lega'aque': —Le'e yedinje xtolə'əle ca', chedə' babžin ža catə' Diozən' ben' zo yoban' nabi'e con notə'ətezə beṇə' əso'e latjə.

³ De'e profet Isaiazən' ben' be' xtižə' Diozən' cana' bzoje' che Juannə', gwne':

To beṇə' əne' zižjo latjə dašən', əne':

“Le'e so probnid par əgwzenagle che Xanchon' catə'an yide'.

Na' šə sole probnid par əgwzenagle che' catə'an yide', de'en gonle ca' gwxaquə'əleben can' chonle chxi' chloale nez ca' catə' chidə to beṇə' blao.”

⁴ Na' Juannə' gwyaze' lachə' de'en gwso'one' len yišə' xa cameyən'. Na' par dobey che' bchine'

to pedas yid. Na' gwdaogüe' bišə'əzo, na' leczə gwdaogüe' ši'in bia ser, bia nitə' yixə'.

⁵ Beṇə' Jerosalennə', na' beṇə' ca' ža' yoguə' yež ca' gan' mbane Jodean', na' leczə beṇə' ža' yež ca' nyechj mbi'i yao Jordannə' gwsa'aque' ja'aque' gan' zo Juannə' par boso'ozenague' xtiže'enə'.

⁶ Na' bosə'əxoadole'e lao Diozən', na' Juannə' bchoe' lega'aque' nis lo'o yao Jordannə'.

⁷ Na' leczə ja'ac zan beṇə' Izrael beṇə' ca' zjənchoj zjənzi' fariseo, na' beṇə' ca' zjənzi' sadoso. Ja'aque' par bchoa Juannə' lega'aque' nis, Nach Juannə' gože' lega'aque': —Le'e nacle beṇə' goxoayag na' naljele. ¿Echaquele de que guaquə yexonjele castigon' de'en əselə' Diozən' par le'e?

⁸ Cheyalə' gonle de'en naquə güen par nič əsa'acbe'i beṇə' yoblə de que baboša' yichjla'ažda'olen'.

⁹ Na' bito gonle xbab de que Diozən' bito gone' le'e castigw che xtolə'əlen' laogüe de'en nacle xi'in dia che de'e Abraannə'. Bito nacho de que lechguale chyažje Diozən' le'e. Guaquə gone' par nič yej quinga yesyə'əyaquən xi'in dia che de'e Abraannə'.

¹⁰ Ca naquə le'e šə cui chonle can' chazlažə' Diozən', gwxaquə'əlebele ca to yag frot de'e cui bi frot chbian. Na' ca naquə yoguə'əte yag frot de'e cui bi frot chon, chəsə'əchog beṇə' len na' chəsə'əzeze'en.

¹¹ Na' ca naquə le'e chedinjele xtolə'əle ca', nada' de'e li chcho'a le'e nis. Na' ze'e yidə ben' gon par nič so Spirit che Diozən' lo'o yichjla'ažda'ochon' na' nabi'an chio'o. Na' Spiritən' naquən ca yi' na' gwxi' gwloan yichjla'ažda'ochon' len bitə'ətezə de'e mal.

Ben' yidə zaquə'əche' ca nada' na' bito zaca'a par gaca' xmoše'.

¹² Be'enan' gone' len chio'o can' choncho catə' chdecho trigon' rner, na' chzeycho yix bebən'. Na' šə chonlilažə'əcho Diozən', yotobe' chio'o par nič socho txen len le', na' beŋə' ca' cui chso'onlilažə' le', əsele'e lega'aque' lao yi' gabilən' de'en cuiczə cheyol.

Catə' gwchoa Jeso'osən' nis

¹³ Na' gwza' Jeso'osən' gan' mbane Galilean' na' gwyeje' gan' zo Juannə' cho'a yao Jordannə' par nič Juannə' bchoe' le' nis.

¹⁴ Na' Juannə' benczə yichjlaogüe' caguə gone'ene' gwchoe' Jeso'osən' nis. Gože'ene': — Chyažjləda' əgwcho' nada' nisən' na' nadə'əlan' zedenabdo' gwchoa' le' nisən'.

¹⁵ Nach Jeso'osən' gože' Juannə': —Gone'e bchoa nada' nisən'. Cheyalə' goncho ca' par nič gaquə complir yoguə'əloł de'en non Diozən' mendad gaquə.

Nach gwcheb Juannə' bcho'ene' nisən'.

¹⁶ Na' catə' beyož gwchoa Jeso'osən' nisən', le'e bechojte' lo'o nisən', na' le'e byaljwte le'e yobanə' na' ble'i Jeso'osən' gan' zo Diozən'. Ble'ine' Spirit che Diozən' betjən ca to ngolbexə na' bžinən gwzon len le'.

¹⁷ Na' gwse'enene' gwna Diozən' ben' zo yoban': —Bengan' Xi'ina', ben' chacda' chei, lechguale cheba chezaquə'əlaža'a le'.

4

Gwlo'oyelə' gwxiye'ena' Jeso'osən' gone' de'e mal

1 Na' Spirit che Diozən' benən par nič gwyej Jeso'osən' latjə dašən', par nič gwlo'oyelə' gwxiye'enə' le' gone' de'e malən'.

2 Na' bitobi gwdao Jeso'osən' lao čhoa ža čhoa yel, na' catə' gwde de'e čhoa žanə' gwdone'.

3 Na' gwxiye'enə' bgüiguə'an gan' zo Jeso'osən', gožə'an le': —Šə len' naco' Xi'in Diozən', gož yej quinga yesyə'əyaquən yetxtil.

4 Nach gož Jeso'osən' len: —Nyojczə Xtižə' Diozən' nan: “Caguə yelə' guao na'azən' əbane chio'o beṇač sino leczə chyažjecho yoguə'əloł dižə' de'en na Diozən' par əbancho.”

5 Na' gwche' gwxiye'enə' le' yichjo' yo'odao' əblao che chio'o beṇə' Izrael de'en zo Jerosalennə' na' gwlequən le' gan' le'ezelaogüe naquə sibə.

6 Na' gožən le': —Šə len' naco' Xi'in Diozən' bexitə' nga par che'elə, la' nyojczən le'e Xtižə' Diozən' nan: Eselə' Diozən' angl che' ca' par əsa'aclene' le', na' əso'oxe'e le' par nič bito əčhego'o no yej.

7 Na' gož Jeso'osən' gwxiye'enə': —Leczə can' nyojən le'e Xtižə' Diozən', nan: “Bito con goncho Xancho Diozən' prueb šə leine' can' ne'enə'.”

8 Na' gwxiye'enə' gozche'en le' to lao ya'a de'e naquə lechgualə sibə, na' blo'in le' yoguə' nasyon de'en zjəchi' lao yežlyon' ca' naquə dechgua yelə' chnabia' čhega'acquənnə'.

9 Nach gožən le': —Yoguə' de'e quinga chle'ido' nga gona'an le' šə gwzo xibo' laogua' nga par güe'elaogo'o nada'.

10 Nach gož Jeso'osən' len: —Gwchi'izə' ca'alə nga Satanas. Nyojczən le'e Xtižə' Diozən' nan: “Cheyalə'

šejni'alažə'əcho tozə Xancho Diozən' na' tozə le' güe'ela'ocho."

11 Na' bebi'izə' gwxiye'enə len le', nach besə'əžin baļə angl ca' jse'eclene'ene'.

Jeso'osən' gwzolaogüe' chyixjui'e dižə' güen dižə' cobə che Diozən'

12 Na' Jeso'osən' gwze'e Jodean' par gwyeje' Galilean' catə' benene' de que bade Juannə' ližyan'.

13 Na' gwze'e Nasaretən' jsoe' syoda Capernaum de'en chi' cho'a nisdə'onə' do gan' chi' distrit de'en nzi' Sabolon na' Neftali.

14 Na' de'en jəyezoe' syodan' goc complir can' bzoj de'e profet Isaiazən', ben' be'e Xtižə' Diozən' cana' gan' nan:

15 Le'e gwzenag, le'e beņə' Galilea, le'e cui nacle beņə' Izrael,
na' nitə'əle distrit Sabolon na' Neftali de'en mbane yešlā'alə nisdə'onə' na' yao Jordannə'.

16 Nchol̄ yichjla'ažda'olen' pero Diozən' əsele'e to beņə' cue'e be'eni' xen lo'o yichjla'ažda'olen'.
Nacle ca beņə' guat len yichjla'ažda'olen' por ni che de'e malən' chonle,
pero be'enə' əselə' Diozən' yocobe' yichjla'ažda'olen'.

17 Na' dezd tyemp na', Jeso'osən' gwzolao gwduxjui'e gwne': —Le'e yedinje xtolə'əlen', chedə' babžin ža nabia' Dioz ben' zo yoban' con notə'ətezə beņə' əso'e latjə.

Jeso'osən' gwleje' tap beņə' gwxen bel par gwsa'aque' disipl che'

18 Na' goquən' lao zda Jeso'osən' cho'a Nisdao' Galilean' ble'ine' chopə beņə' gwxen bel,

choso'ozale'e yixjw bel chęga'aque'enā' lo'o nisān'. Zjānaquā chopā biše'e. Toe' le' Simon Bed, na' yetoe' Ndres.

19 Nach gože' lega'aque': —Le'e da len nada'. Le'e nacle beņā' gwıen bel, na' na'a əgwzejni'ida' le'e par nich gonle ca so'ombia' beņā' nada'.

20 Na' le'e gosə'əbejyichjtega'aque' yixjw bel chęga'aque' ca' nach ja'aclene' Jeso'osān'.

21 Nach gwsa'aque' yelatā' na' jāsya'ədi'e Jacob len Juan chopā biše'e, len xaga'aque' Sebedeo. Že'e to lo'o barcw chesyə'əyone' yixjw bel chęga'aque'enā'. Na' leczə gwıabe Jeso'osān' Jacobān' len Juanņā' par žja'aclene' le'.

22 Na' le'e bosyo'ocua'anlentie' xaga'aque' Sebedeon' barcon' na' ja'aclene' Jeso'osān'.

Jeso'osān' bsd blo'ine' beņā' zan

23 Na' gozac catā' Jeso'osān' gwyeje' yoguā' yež ca' zjāchi' gan' mbane Galilean', gwzolaogüe' bsd blo'ine' beņā' ca' zjāža' lo'o yo'odao' ca' gan' gwso'elao' beņā' Izrael ca' Diozān'. Na' gwıixjui'e dižā' güen dižā' cobān' de que Diozān' nabi'e con notā'ətezā beņā' əso'e latjā. Na' Jeso'osān' beyone' yoguā' beņā' ca' chse'i gwde gwde yižgüe'.

24 Na' gosə' gwıaljā yoguā' de'en ben Jeso'osān' doxenlā nasyon Siria. Nach beņā' Siria ca' jso'e yoguā' beņā' ca' chsa'acšene laogüe'enā', beņā' ca' chse'i zan clas yižgüe' na' beņā' ca' chse'ey chesə'əla, na' len beņā' ca' zjəyo'o zjəyaz de'e xio' yichjla'ažda'oga'aque', na' len beņā' ca' chsa'az šon, na' beņā' ca' zjənat to part cuerp chęga'aque'enā'. Na' beyone' yoguā'ətega'aque'.

25 Na' zan beṇə' za'ac distrit che Galilea, na' beṇə' za'ac yež ca' gan' nzi' Decapolis, na' beṇə' za'ac syoda Jerosalennə', na' beṇə' za'ac yež ca' yela' distrit che Jodea, nach beṇə' za'ac yešla'a yao Jordannə' jəsə'ənaogüe' le'.

5

Dižə' de'en bsed blo'i Jeso'osən' to lao ya'a blo'ine' non' zjəzo mbalaz

1 Na' Jeso'osən' catə' ble'ine' beṇə' zan zjənžag, gwloe' gwchi'e to lao ya'a. Na' gosə'əbiguə' disipl che' ca' gan' chi'enə'.

2 Nach gwzolao bsed blo'ine' lega'aque', gwne':

3 —Le'e chache'ile de que chyažjele gaquəlen Diozən' le'e, zole mbalaz chedə' bacho'ele latjə chnabia' Diozən' le'e.

4 Na' le'e zole trist lo'o yichjla'ažda'olen' por ni che xtolə'əle ca', mbalaz sole chedə' Diozən' yeyonx-enlaže'e le'e.

5 Na' le'e laogüe de'en chzexjw yichjle len Diozən' na' len beṇəchən', mbalaz sole chedə' Diozən' gone' par nič gaquə güen chele can' baben Diozən' lyebe.

6 Na' le'e chzelažə'əchguale gacle beṇə' güen lao Diozən', zole mbalaz chedə' Diozən' bachaclene' le'e par nič gacle beṇə' güen laogüe'enə'.

7 Na' le'e cheyašə'əlažə'əle beṇə' yoblə, mbalaz zole chedə' leczə ca' Diozən' cheyašə' cheži'ilaže'e le'e.

8 Na' le'e banacle beṇə' la'aždao' xi'ilažə', zole mbalaz chedə' žjəyezole txen len Diozən'.

9 Na' le'e chogo'ole yelə' chxenlažə' che beṇə' ljuēžjle ca' chesə'ədilə, mbalaz zole chedə' la' Diozən' bagwcue'e le'e ca xi'ine'.

10 Na' le'e choso'ochi' choso'osaquə' beṇə' le'e laogüe de'e chontezle de'en naquə güen lao Diozən', zole mbalaz chedə' cho'ele latjə chnabia' Diozən' le'e.

11 Na' catə' chesə'əzi'ichižə' beṇə' le'e na' chesə'osaquə'əzi'e le'e na' chso'e yoguə' claste dižə' güenlažə' contr le'e por ni che de'en chonlilažə'əle nada', bia'aczə sole mbalaz.

12 Cheyalə' yeba yezaquə'əlažə'əchgualə la'anə'əczə za'ac de'e ca' contr le'e chedə' Diozən' gone' par nič gaquəchgua de'e güen chele catə' yežinle gan' zoe'enə'. Can' chso'one beṇə' ca' le'e lecə can' gwso'one de'e xaxta'ocho ca' de'e profet ca' beṇə' ca' gwso'e xtižə' Diozən' cana'.

Naccho ca zedə' na' ca be'eni' par len beṇə' ža' yežlyo nga

13 Ca zedə' chaclenən par nič caguə cuiayi' no yid belə', le'egatezə ca' le'e chaclenle par nič beṇəchən' cui chso'onteque' de'e mal. Na' šə zedə'ən bitoch bi zxi' naquən, nezecho bito bi gac goncho par nič yeyaquən zxi' de'e yoblə. Na' bitoch bi zaquə'ən lete goschon fuerlə na' əgwlej əgwšošj beṇə' len. Can' gaquə len le'e šə cuich gonle can' chene'e Diozən'.

14 Ca be'eni' chaclenən beṇə' par chəsə'ənezene' gan' cheyalə' žja'aque', ca'aczən' chaclenle beṇə' par chəsə'ənezene' nac chene'e Diozən' so'one'. Na' can' notə'ətezə beṇə' chac chle'ine' to syoda xen de'en chi' to lao ya'a, ca'aczən' notə'ətezə beṇə' chac chle'ine' de'e güenṇə' chonle.

15 Catə' chgualə'əle to yi' bito chdosə'əlen žomə sino chda'alen le'e ze'e par chse'eni'in len yoguə' beṇə' ža' lo'o yo'onə'.

16 Na' ca naquə le'e ža, cheyalə' sotezə sole gonle de'e güennə' par niḥ yesə'əle'i beṇə' len na' əso'elağüe'e Xacho Diozən' ben' zo yoban'.

Jeso'osən' bsed blo'ine' can' na lei de'en bzoj de'e Moizezən'

17 Bito gonle xbab de que nada' za'a zedeyena' par niḥ lei de'en bzoj de'e Moizezən' na' de'en bosozoj de'e profet ca' cana' cuich so'onən žin. Za'a par niḥ gaquə complir yoguə'əloj de'en bsi' Diozən' xneze gaquə ca de'en bosozoj beṇə' ca'.

18 De'e li chnia' le'e, xte ca te che yežlyo nga len de'e ca' chle'icho le'e yoban', ni to letr dao' ni to asento de'en nyoj le'e lein' cui ten ca'azə xte que gaquə yoguə'əloj de'en chene'e Diozən' gaquə.

19 De'e na'anə' yoguə' de'e ca' zjənyoj de'en chene'e Diozən' gonle, la'anə'əczə šə lebeyožə to de'e dao', legonən. Notə'ətezle šə əchoele cui gonle can' none' mendadən', na' šə leczə əgwlo'ile beṇə' yoblə cui so'one' can' none' mendadən', Diozən' bito gone' le'e yelə' bala'an catə' yežinle yoban' gan' chnabi'enə'. Na' notə'ətezle šə gonle can' none' mendadən' na' šə leczə gwlo'ile beṇə' yoblə so'one' can' none' mendadən', Diozən' gone' le'e yelə' bala'an catə' yežinle yoban' gan' chnabi'enə'.

20 Echnia' le'e, beṇə' fariseo ca' na' beṇə' ca' choso'osed choso'olo'i lein' bito zjənaquə yichjla'ažda'oga'aque'enə' güen lao Diozən'. Na' šə yichjla'ažda'olen' bito gaquəchən güen lao Diozən'

cle ca chega'aque'enə', bito yežinle yoban' gan' zo Diozən' chnabi'e.

Choncho de'e mal ša chža'a ljuežjcho

21 Na' lecza bsed blo'i Jeso'osən' lega'aque' gwne': —Banezele can' gož de'e Moisezən' de'e xaxta'ocho ca': “Cui no gotle. Na' ša no got ljuežj benache', jostis ca' choglaogüe'en che' de que cheyalə' gate'.”

22 Na' nada' chnia' le'e notə'atezle ša chža'a ljuežj benachle zaquə'əczən par gatle ca to castigw chele žalə' ca', na' notə'atezle ša chžia chnitə'əle ljuežjle zaquə'əczən par so'on benə' golə blao ca' chəsə'anabia' nasyon Izraelən' castigw chelen'. Na' notə'atezle ša cholgüiž ljuežjle dižə' pesad, zaquə'əczən par yoselə' Diozən' le'e lao yi' gabil.

23 Cheyalə' socho binlo len ljuežj benachcho. Na' la'añə'əczə catə' bazole lo'o yo'odao' par əgwnežjwle bi de'en əgwnežjwle güe'ela'ole Diozən', ša žjsa'alažə'əle de que habenle contr to benə' ljuežjlen',

24 na'azə cheyalə' yocua'anle šlož de'en noxə'əlen'. Zgua'atec žjəyeye'exenle benə' ljuežjlen', nach guaquə žjəyenežjwle de'en bagwlejle par güe'ela'ole Diozən'.

25 Catə' to benə' gonle xya che' na' əche'e le'e lao jostis, legonlene' regl binlo lao ngo'ole nezən' par nich na' cui che'e le'e lao jostisən'. Ša bito gonle ca' ža, catə' əžinle lao jostisən' gone' le'e lao na' polsian' par yosə'əže'e le'e ližya.

26 Echnia' le'e, bito yebeje' le'e xte catə' chixjwle doxen de'en chalə'əlen'.

De'e malən' choncho ša chgo'o xtocho

27 Baņezele can' gwna de'e Moizezān': "Bito co'o xtole na' bito cuejyichjle be'en chele o no'ol chele par solenle beņə' yoblə."

28 Na' nada' chnia' le'e de que notə'ətezle šə chgüiale to no'olə na' chzelažə'ale solenlene', banaple dolə' chedə' tozəczə ca malən' bachonle lo'o la'ažda'olen' len de'en chon beņə' chgo'o xtoe'.

29 Na' de'e na'anə' əchnia' le'e, šə de'en chle'ile len jəlaole chonən par nič əxople gonle de'e malən', nca'alə xņeze žalə' cui žia jəlaolen'. Len nca'alə xņeze cuejlen cle ca cuiayi'ile lao yi' gabilən' por ni che len.

30 Na' šə de'en chonlenle na'ale ca' chonən par nič əxople gonle de'e malən', nca'alə xņeze žalə' cui žia na'ale na'anə'. Len nca'alə xņeze chogga'aclen cle ca cuiayi'ile lao yi' gabilən' por ni che lega'aquən.

Beņə' csad ca' bito cheyalə' yesyə'ala'a ljuēžjga'aque'

31 Leczə ņezele can' gwna de'e Moizezān': "Notə'ətezə beņə' yele'e no'ol che'enə', cheyalə' chas to act ga gü'e'en dižə' de que besyə'ale'enə'."

32 Na' nada' əchnia' le'e de que notə'ətezle yela'ale no'ol chelen', šə bito naque' to no'olə go'o xtoi, gonle par nič gaque' ca to no'olə go'o xtoi. Na' notə'ətezle yošagna'ale len to no'olə beņə' bela'a ben' chei le', leczə tozəczə ca malən' chonle len beņə' ca' chesə'əgo'o xtoi.

Jeso'osən' bzejni'ine' che jorament ca'

33 Na' leczə baņezele can' gož de'e Moizezān' de'e xaxta'ocho ca': "Bito əgwzole jorament lao Xancho Diozən' catə' ənale to de'en gonle šə cui gonle

complir can' nalenə'. Catə'an chzole jorament lao Xancho Diozən', cheyalə' gonle can' chonle lyeben' laogüe'enə'."

³⁴ Pero na' nada' chnia' le'e, cuat əgwzole joramentən' por bitə'ətezə, nic por yoba chedə' na'anə' zo Diozən' chnabi'e.

³⁵ Na' nic əgwzole joramentən' por yežlyon' chedə' den xni'a Diozən'. Na' nic əgwzole joramentən' por syoda Jerosalennə' chedə' naquən syoda che Diozən' ben' naquə le'ezelaogüe Rei blao.

³⁶ Na' nic gon yichjlen' testigw de que cho'ele dižə' li, chedə' bito gaquə gonle par nich yišə' yichjlen' yeyaquən šyiš o yeyaquən gasj.

³⁷ Cheyalə' güe'ele por dižə' li nich cui əyažjən əgwzole jorament par se'ejle'e beṇə' chele. Šə chyažjən bichlə dižə' de'e ənale par se'ejle'e chele, nachia' gwxiye' nan' chnabia'an yichjla'ažda'olen'.

Bito co'olažə'əcho beṇə' contr checho

³⁸ Šə to beṇə' gone' zi' jelaolenə' nezele de que lei de'en bzoj de'e Moizezən' nan de que guaquə gonle zi' jelaogüe'enə'. Na' šə to beṇə' əxope' to leyle lecəə nezele de que lein' nan guaquə əxople to che'enə'.

³⁹ Pero na' nada' əchnia' le'e, bito əgwžonle gon beṇə' de'e mal len le'e. Šə to beṇə' cape'e šla'a xaguə'əlen', le'e güe' latjə cape'e de'en yešla'a.

⁴⁰ Šə to beṇə' chene'ene' əque'e xcamislen' laogüe de'en chalə'əle latə' xmeche', güe'etele latjə əque'e len xadoṇ chelen'.

⁴¹ Na' šə to beṇə' blao gone' byen šejlenlene' gua'ale yoa' che'enə' to kilometro, le'e šejlene' gua'alēn yeto kilometro.

42 Na' šə bi de'en chṇabe beṇə' le'e, le'e güe'en. Na' le'e cueje šə bi de'e chṇabe' cuejlene'.

Cheyalə' gaquecho che beṇə' contr checho

43 Na' leczə baṇezele can' chəsə'əne': "Cheyalə' gaquele che beṇə' migw chele na' gue'ile beṇə' contr chele."

44 Pero nada' əchnia' le'e, le'e gaque che beṇə' contr chelen', le'e nabe Diozən' gaquə de'e güen che beṇə' ca' choso'ožia choso'onitə' le'e. Na' le'e gon de'e güen len beṇə' ca' chəsə'əgue'i le'e, na' le'e gon orasyon lao Diozən' par beṇə' ca' chsa'adə' le'e dižə', na' par beṇə' chəsə'əsaquə'əzi' le'e.

45 Šə gonle ca' na'achən' əsa'ache'i beṇə' de que nacle xi'in Xacho Diozən' ben' zo yoban'. Le'enə' chone' ca chla' bgüižən' par yoguə'əlöl beṇə' la'anə'əczə šə chso'one' de'e güen o šə chso'one' de'e mal. Na' leczə chone' par ničh chac yejw par yoguə'əlöl beṇə' ža' yežlyon' la'anə'əczə šə zjənaque' beṇə' güen o šə zjənaque' beṇə' mal.

46 Šə porzə chaquele che beṇə' ca' chsa'aque chele žbixa zedegua'atguan par le'enə'? Le'egatezə can' chso'on beṇə' gočhixjw ca', beṇə' ca' nale zjənaque' beṇə' malchgua.

47 Na' šə con chguaple diox beṇə' ljuežjle ca'azə žəchonle xbabən' de que chonchle güen cle ca beṇə' yoblə? Bito chonchle güen. Can' chso'on beṇə' ca' cui zjənombia' Diozən', con beṇə' ljuežjga'aque' na'azə chesə'əguape' diox.

48 Cheyalə' gacle beṇə' šao' ca beṇə' šao' beṇə' güennə' naquə Xacho Diozən' ben' zo yoban'.

6

Jeso'osən' blo'ine' naquən' cheyalə' goncho caridan'

¹ Le'e gon de'en naquə de'e güen pero caguə parzə nich yesə'əle'i benə' can' chonlen' na' so'elaogüe'e le'e, chedə' šə chonle ca' bito güe'elao' Xacho Diozən' ben' zo yoban' le'e.

² De'e na'anə' šə bi de'en chene'ele əgwnežjwle to benə' par gaquəlenlene', le'e əgwnežjon pero caguə parzə nich yesə'əneze benə' can' chonlen' na' əso'elaogüe'e le'e. Benə' goxoayag ca' chəsə'ənežjue' bi de'en chəsə'ənežjue' benə' do lo'o yo'oda'onə' na' do lao lcue' parzə nich əso'elao' benə' lega'aque'. De'e li chnia' le'e, bagwyejlaoczəga'aque'enə' pero Diozən' bito güe'elaogüe'e lega'aque'.

³ Pero na' le'e ža, šə bi de'en əgwnežjwle to benə' par gaquəlenlene', bito co'ole be' lban ca de'en chonle.

⁴ Gonlen ca cui əsa'acbe'i benə' na' cui so'elaogüe'e le'e. Xacho Diozən' ben' chle'i yoguə' de'en choncho güe'elaogüe'e le'e.

Bsed blo'i Jeso'osən' nac cheyalə' goncho orasyon

⁵ Catə' gonle orasyon bito gonlen can' chso'on benə' goxoayag ca'. Lega'aque' chəsyə'əbeine' chəsə'əzeche' chso'one' orasyon lo'o yo'odao' chəga'aque' ca' gan' chso'elaogüe'e Diozən' na' do squin lquey, chso'one' orasyonnə' par chesə'əle'i benə' can' chso'one'enə'. De'e li chnia' le'e, bagwyejlaoczəga'aque'enə' na' Diozən' bito güe'elaogüe'e lega'aque'.

6 Na' catə' gonle orasyon le'e yeyo'o lo'o yo'o chele na' əgwseyjwle puertən', na' gonle orasyonnə' lao Xacho Diozən' ben' cui chle'icho. Na' Xacho Diozən' ben' chle'i yoguə' de'e choncho le' güe'elaogüe'e le'e.

7-8 Ca naquə beṇə' ca' cui zjənombia' Diozən', catə' chso'one' orasyon chso'echgüe' dižə'. Chso'one' xbab laogüe de'en chso'echgüe' dižə' Diozən' əgwzenague' čhega'aque'. Bito gonle can' chso'one'enə'. Ca naquə Xacho Diozən', baṇezczene' bi de'en chyažjele ze'e ṇablelene'en.

9 Quingan' gonle orasyonnə':
Xato' beṇə' zo yoba, chṇabto' yoguə'əlol beṇačhən' əso'elaogüe'e le'.

10 Chṇabto' gono' par ničh beṇə' zan əso'e latjə ṇabi'o lega'aque'.
Gaquəšga can' che'endo'onə' lao yežlyo nga, can' chac yoban'.

11 Beṇšga ṇa'a de'e gaoto' tža tža.

12 Na' bezi'ixenšga čheto' čhedə' leczə chezi'ixento' čhe sa'aljuežj beṇačhto'onə' bitə'ətezə de'en chso'onene' neto'.

13 Na' bito go'o latjə gaquə de'e ṇabia' neto' len xbab čheto'onə' par gonto' de'e malən', mas bcuasə' bcue'ej neto' len gwxiye'enə'.
Le'enə' chnabi'o na' napo' yelə' guac na' napo' yelə' bala'an par zejlicane. Amen.

14 Na' šə chezi'ixenle xtolə' sa'aljuežj beṇačhlen' bitə'ətezə de'en chso'onene' le'e, leczə gozi'ixen Xacho Diozən' ben' zo yoban' xtolə'əlen'.

15 Pero na' šə le'e bito chezi'ixenle čhe sa'aljuežj beṇačhlen', leczə ca' Xacho Diozən' bito yezi'ixene' čhelen'.

Jeso'osən' bzejni'ine' naquən' cheyalə' goncho catə' socho sin cui ye'ej gaocho par güe'ela'ocho Diozən'

16 Na' catə'an chzole sin cui che'ej chaole par niç cho'ela'ole Diozən' bito gon cho'alaolen' ca cho'alaob enə' chegüinchgüei can' chso'on enə' goxoayag ca'. Lega'aque' chso'onlizəga'aque' ca enə' chegüine'e parzə niç chsa'acbe'i benəçən' de que nite'e cui zjəne'ej zjənaoga'aque'. De'e li əchnia' le'e bagwyejlaoczəga'aque'enə' na' Diozən' bito güe'elaogüe'e lega'aque'.

17 Pero na' le'e catə' zole sin cui ne'ej naole par cho'ela'ole Diozən', le'e əgwpa'a yichjle na' xala'anle.

18 Legon ca' par niç cui əsa'acbe'i benəçən' de que zole sin cui ne'ej naole. Tozə Xacho Diozən' ben' cui chle'icho nezene' can' chonle. Na' Xacho Diozən' ben' chle'i yoguə' de'e çoncho güe'elaogüe'e le'e.

Quingan' cheyalə' goncho par niç gatə' checho de'en cui te çei gan' çnabia' Diozən'

19 Bito gwtoble de'e zan de'e zaque'e na' de'e xoche lao zole yežlyo nga, la' yesə'əbiayi'in. Balən chsa'aljən bia dao' na' chsa'ob lega'aquən, na' yebalən chzen no xçe'i, na' lecçə ças enə' bguan na' so'e yesə'əque'e bi de'en deilen'.

20 Le'e gon par niç gon Diozən' de'e šao' de'e güençlə çele de'e cui te çei catə' yežinle yoban' gan' zoe'enə', çedə' na' bito galjə bia dao' par əsa'ob len, na' nic sen xçe'i par cuiayi'in, na' nic gaquə šo'o enə' bguan par əque'en.

21 Gan' de de'en çaquele çei nan' zo yichjla'ažda'olen'.

Žia jelaochon' par chle'icho

²² Žia jelaochon' par chle'icho. Con šə bito bi chaquən chle'iczecho binlo.

²³ Pero šə nchol jelaochon' bito chle'icho. Ca'aczən' naquən len yichjla'ažda'olen' šə nacle beṇə' la'aždao' güen yo'o be'eni' che Diozən' yichjla'ažda'olen', pero šə nacle beṇə' mal nchol yichjla'ažda'olen'. De'e li lechgualē nchol yichjla'aždao' le'e cui chzenagle che Diozən'.

Bito gaquə gaquecho che Diozən' na' gacteicho che bien chechon' tši'izə

²⁴ Notono no gaquə so liž chopə xan žin par gaque' xmosga'aque' tši'izə, chedə' la' šə gone' ca' gue'ine' to xan žinnə' na' gaquene' che yetoe', o gone' žin che toe' do yichj do laže'e na' bito bi respet gape' par xane'en yeto par gone' xšine'enə'. Leczə can' le'e bito gaquə gonle xšin Diozən' do yichj do lažə'ale na' gonte xšinle par gacle beṇə' gwni'a.

Diozən' chgüia chye' chio'o naccho xi'ine'

²⁵ De'e na'anə' chnia' le'e, bito cuec yichjle tlaozə de'en ye'ej de'en gaole lao mbanle. Na' leczə ca' cuerp chelen' bito cuec yichjle tlaozə de'en guacwlen'. Zaquə'əch yelə' mban chelen' ca yelə' guaon'. Le'egatezə ca' cuerp chelen' zaquə'əchən ca xala'anlen'.

²⁶ Legontoš xbab chele, ca naquə bia ca' zjəžia xile'e bito chsa'azəb na' bito chəsyə'əlapəb na' nic bi da'a xoa' chega'acquəb zo, pero na' chguaoczə Xacho Diozən' ben' zo yoban' lega'acquəb. Naquəchxen' zaquə' le'e ca bia ca' zjəžia xile'enə'.

²⁷ Na' ni tole bito gaquə yoston cuinle gašjə metr šə con cue'e yichjle ətonle.

28 Na' ħbixchen' chbec yichjle che xala'anle? Legontoš xbab ca naquə yej sosennə' chesə'acha'oczən, len bitobi žin chso'onən, nic chsa'aljən do.

29 Na' əchnia' le'e, Salomonnə' goque' lachə' xoche juisy, pero bito bžinlaže'e xala'ane'enə' ca yelə' xoche che yej sosen ca'.

30 Diozən' none' xoche yixə' de'en ze yoba len to termzə zen nach choso'ozeye'en, naquəchxe gon Diozən' len le'e, güe'eczə yichje' gone' yoguə'əte de'en chyažjele, le'e cui chejle'etecle de que gone' de'en chyažjele.

31 Le'e ža, bitoch cuec yichjle che bi de'en chyažjele ənalizle: “ĸBin' ye'ej gaocho na' bin' gacwcho?”

32 Con por de'e ca'azən' zjəchi' yichj benə' ca' cui chso'onlilažə' Diozən', che de'en əse'ej əsa'ogüe' na' che xala'anga'aque'. Pero na' Xacho Diozən' ben' zo yoban', nəzczene' yoguə' de'e ca' chyažjele.

33 De'en güe'elažə'əle, güe'ele latjə par niĸ Diozən' nabi'e le'e, na' güe'elažə'əle gonle de'en na Diozən' naquə güen. Na' yoguə' de'e ca' de'en chyažjelen' gonczə Diozən' len, de'en ye'ej de'en gaolen', na' xala'anle.

34 Le'e gon xbab che de'en chac tža tža. Bito cuec yichjle che bi de'en gaquə gwxe güižj, la' guatə'əczə de'e zan de'e cuec yichjcho chei catə' əžin žan'.

7

Bito zaquə'əcho par ənacho che benə' de que zjənapə' dolə'

¹ Bito gonle xbab de que zaquə'əle par ənale che beṇə' de que zjənapə' dolə'. Šə ənale čhega'aque' de que zjənapə' dolə' leczə ca' əna Diozən' čhele de que naple dolə'.

² Can' chosbague'ele beṇə' de que zjənapə' dolə' le'egatezəczə can' yosbague'e Diozən' le'e de que naple dolə'. Con can' chonle len beṇə', le'egatezə can' gon Diozən' len le'e.

³ Chle'ile güe' dao' de'en žia cožə' beṇə' ljuežjle, na' cabi chele'ile güe' xen de'en žia cožə'əlen'.

⁴ Che' beṇə' ljuežjle: "Be'e latjə gona' rmech güe' daon' de'en žia cožo'onə'", na' bito chonle rmech güe' xen de'en žia cožə'əlen'.

⁵ ;Beṇə' goxoayag le'e! Zgua'atec le'e gon rmech güe' xennə' de'en žia cožə'əlen' na' techlə ənezele naquən' gonle rmech güe' daon' de'en žia cožə' beṇə' ljuežjlen'.

⁶ Pero na' bito güe'etezle xtižə' Diozən' len beṇə' ca' chso'onczə yičjlaoga'aque' cui chse'enene' yoso'ozenague' čhei, čhedə' la' guacte so'onene' le'e znia can' čhon beco' catə'an cho'exaxjchob de'en cui cho'olažə'əb. Na' šə güe'etezle xtižə' Diozən' len beṇə' ca' chso'onczə yičjlaoga'aque' cui chse'enene' yoso'ozenague' čhei, con yosə'əlej yoso'ošošje' dižə' de'en güe'elenga'aclene'enə' can' chso'on coš ca' len de'en cui chse'ene'eb əsa'ob.

Le'e nabe Diozən' bi de'en ənabelene' la' goncz'en

⁷ Bitə'ətezə de'en chene'echo gaquə, de de'e goncho par nič gaquən. Šə to de'e chene'echo so'on beṇə' chio'o, čṇabchon. Šə to de'e chene'echo əželecho, čhyljchon. Šə puert de'en chene'echo əsaljo beṇə', čṇecho cho'a puertən' par nič

chsaljue'. Na' ca'aczən' cheyalə' ye'echo Diozən' catə'an de de'en chene'echo gaquə.

⁸ Na' notə'atezcho šə bi de'e chḡabechone' goḡe', la' de'e goḡcze'enə'. Na' notə'atezcho šə bi de'en chḡabechone' əgwzejni'ine' chio'o, əgwzejni'iczene'. Na' notə'atezcho šə chḡabechone' gaquə to de'en chene'echo gaquə can' chon beḡə' chḡe' cho'a puertən', la' de'e gaquəczən'.

⁹ Na' le'e nacle xa bidao', šə xi'inlen' əḡabebo' le'e yetxtil ḡəgwnežjwlebo' to yej?

¹⁰ Na' šə əḡabebo' le'e to beḡ ya'a ḡəgwnežjwlebo' to beḡ bia nxobə le'i? Cle bito gonle ca'.

¹¹ Le'e nacle beḡə' mal pero nezele chnežjwle xi'inlen' de'e güen. Naquəchxe güen gon Xacho Diozən' ben' zo yoban' len beḡə' chḡab laogüe'enə' bi de'en chyažjene'.

¹² Na' can' naquən, con yoguə' de'e güen de'e chene'ele so'on beḡachən' len le'e ca'atezəczən' cheyalə' gon le'e len lega'aque', chedə' can' na lei de'en bzoj de'e Moisezən' na' de'en boso'ozoj de'e profet ca' beḡə' ca' gwso'e xtižə' Diozən' cana'.

Nezən' de'en yežin yoban' gwxaquə'əleben ca to nez las

¹³ Lao yelə' mban chechon' chopə nez nan' de. To nez las, na' to nez laguə'. Cheyalə' goncho byen šo'ocho to nez šao' to nez güen la'anə'əczə naquən ca to nez las de'e canə əželən na' de'e chaquecho naquən zdebə par tachon. Na' nez malən' gwxaquə'əleben ca to nez yo nez laguə' chedə' chpein chio'o par niḡh yežincho gabilən' gan' saquə'əzi'icho zejlicane. Pero beḡə' zan bazjəyo'e nez laguə'ənə'.

14 Nezən' de'en yežin yoban' gan' əbancho zejlicane len Diozən' gwxaquə'əleben ca to nez las de'e canē əželən na' de'e chaquecho naquən zdebə par tachon. De'e na'anə' balga beṇə' chəsyə'əželene'en par chjəsə'ənaogüe'en.

Segon can' naquə frot de'e chbia to to yaguən' nezecho bi clas yaguən'

15 Cheyalə' gapcho cuidad par niçh cui šejle'echo xtižə' beṇə' ca' chso'onlaže'e chəsə'əne' de que xtižə' Diozən' chəsə'əyixjui'e. Xochechguan' chso'e dižə'ənə' par choso'opeine' chio'o, chse'enene' goncho xbab de que zjənaque' beṇə' güen. Pero lega'aque' zjənaque' beṇə' la'aždao' mal na' chse'enene' yoso'ožiyi'e chio'o.

16 Segon can' naquə frot de'e chbia to to yaguən' nezecho bi clas yaguən'. Ca'aczən' gacbe'iczecho de que beṇə' ca' chəsə'əxoayague', segon can' chso'one' na' bin' choso'osed choso'olo'ine' beṇə'. Ca naquə yag yešən' bito chbian obas, na' nic yag bçho'onən' chbian yixgüio.

17 Na' de'en naquə yag güen, frot güenczə chbian na' de'e cui naquə güen leczə bito chbian frot güen.

18 Yag frot güenṇə' bito chbian frot de'e cui naquə güen, na' leczə to yag frot de'en cui naquə güen bito chbian frot güen.

19 Na' yoguə' yag frot de'e cui chesə'əbian frot güen, yesə'əçhogue'en na' yesə'əzeye'en.

20 Na' gacbe'icho non' chəsə'əxoayag, segon can' chso'one' na' bin' choso'osed choso'olo'ine' beṇə'.

Caguə yoguə' beṇə' yesyə'əžine' yoban' gan' zo Diozən' chnabi'e

21 Beṇə' zan chse'e nada': "Naco' X̄ana", pero caguə yogue'e yesyə'əžine' yoban' gan' chnabia' Diozən'. Beṇə' ca' chso'on can' chazlažə' X̄a' Diozən' ben' zo yoban', l̄ega'acze'enə' yesyə'əžine' yoban' gan' zo'enə'.

22 Catə' əžin ža yoso'odie' cuent lao Diozən' beṇə' zan əse'e nada': "X̄ana', goclen neto' n̄a'a, la' beṇə' zan gw̄dix̄jue'ito' x̄tiž'o'onə'. Na' l̄eczə be'eto' la'onə' par bebejto' de'e x̄io' ca' zjəyo'o zjəyaz yich̄jla'aždao' beṇə'. Na' l̄eczə be'eto' la'onə' par bento' de'e zan miłagr."

23 Pero na' clar yapə'əga'aca'ane': "Bito nombi'a le'e. L̄ežjəya'ac ca'alə le'e beṇə' güen de'e mal."

Chopə beṇə' na'yo'o de'en gwso'on to toe'

24 Beṇə' chzenag x̄tiž'a'anə' na' chone' can' nannə', gwxaquə'ələbene' ca to beṇə' sin' beṇə' ben liže' na' gwleque' lanen' len yej gual.

25 Na' goc yejw zil juisy na' bchojchgua yaonə' na' gwyečjən liže'enə'. Na' lei bdoḅən be' bdon'. Pero bito gosə'əzoin par yoso'ochix̄ən l̄en, chedə' gwleque' lanen' de'e gual.

26 Na' beṇə' chzenag x̄tiž'a'anə' pero bito chone' can' nannə', gwxaquə'ələbene' ca to beṇə' fal̄s beṇə' ben liže'enə' fal̄s bzoe'en lao yox.

27 Na' goc yejw zil juisy, gwyečj be' bdon' na' bchojchgua yao na' beyožən gan' zo liže'enə'. Nach bebix̄ən gwžiai'yin. Na' catə' gwže'enə' xte gwñin.

28 Na' catə' beyož be' Jeso'osən' dižə' ca', beṇə' zan ca' gwse'ene x̄tiže'enə' besyə'əbanchgüeine' can' bsd blo'ine'.

29 Na' can' bzejni'ine' lega'aque' nachbia' de que napache' yelə' chnabia' cle ca beṇə' ca' choso'osed choso'olo'i lei de'en bzoj de'e Moisezən'.

8

Jeso'osən' beyone' to beṇə' che'i yižgüe' de'en ne' lepr

1 Beṇə' zan zesya'ənaogüe' Jeso'osən' catə' beyetje' ya'anə'.

2 Nach to beṇə' che'i yižgüe' de'en ne' lepr bgüigue'e lao Jeso'osən' na' bzo xibe' laogüe'enə' gože'ene': —Xana' gonšguei ben par niçh yeyacda'.

3 Nach Jeso'osən' bli ne'enə' gwdane'ene' gože'ene': —Guaquəczə, beyaque.

Na' le'e beyactei be'enə'.

4 Nach Jeso'osən' gože'ene': —Ni tozə cui no güe'eleno' dižə' ca naquə nga babena' len le'. Gwyej lao bχozən' niçh le'ine' baçh beyacdo'. Na' bnežjue' bia yixə' gote' lao Diozən' can' non de'e Moisezən' mendad par niçh yesə'əneze beṇə' de que babeyacdo'onə'.

Jeso'osən' beyone' xmos capitan beṇə' Roma

5 Na' catə' bežin Jeso'osən' Capernaunnə' le'e bšagte to capitan beṇə' Roma le'. Na' gotə'əyoine' Jeso'osən'

6 gože'ene': —Xana', xmosa'an die' liža'anə', chacšenchgüeine'. Nat cuerp che'enə' na' lechguale chžaglaogüe'.

7 Nach Jeso'osən' gože' capitannə': —Sa'alena' le' na' yeyona'ane'.

8 Pero na' capitannə' gože'ene': —Xana', bito zaca'a par sa'o liža'anə'. Ngatezə ben mendad yeyaque xmosa'anə' nach yeyaquene'.

9 Rein' chnabi'e nada' pero leczə nitə' soldad chia' ca' na' chnabi'aga'aca'ane' na' choso'ozenague' chia'. Catə' chapa'a toe': “Gwyej”, na' cheje', na' catə' chapa'a yetoe': “Da nga”, na' chide'. Nach catə' chapa'a xmosa'anə': “De'e nga gono”, na' chone'en. Con benšga mendad na' nezda' gaquə can' na'onə'.

10 Na' Jeso'osən' bebanene' catə' benene' xtižə' capitannə', na' gože' beṇə' ca' nao le'enə': —De'e liczə əchnia' le'e, notono beṇə' ne'e žjəti'a beṇə' gonlilažə'ətec nada' ca benga. Ni tozə beṇə' Izrael cui chonlilažə' nada' ca le'.

11 Echnia' le'e, beṇə' zan ža' doxenlə yežlyon' so'onlilaže'e nada, na' lega'aque' žjəsyə'nite'e txen len de'e xaxta'ocho Abraannə' na' de'e xaxta'ocho Isaaquən', na' de'e xaxta'ocho Jacobən' yoban' gan' zo Diozən' chnabi'e.

12 Na' ca naquə nasyon Izrael chechon' le'en gwlej Diozən' par nabi'e, əchoj beṇə' zan bito so'e latjə nabi'e lega'aque'. De'e na'anə' əsele'e lega'aque' lao yi' gabilən' gan' yesə'əbežyaše'e na' sa'oyejə leyga'aque'enə'.

13 Gwde gwna Jeso'osən' ca' nach gože' capitannə': —Guaquə yeyejo'. Babeyona' xmoso'onə', chedə' chejli'o chia'.

Na' xmos capitannə' lao or na' le'e beyacteine'.

Jeso'osən' beyone' taobin' che Bedən'

14 Na' gwyej Jeso'osən' liž Bedən' na' ble'ine' taobin' che Bedən' die' lao camən', na' yo'e de'e lan'.

15 Jeso'osən' be^xe'e ne'enə' na' le'e bechoj^te' de'e lan'. Nach le'e gwyaste no'olən' bene' de'e gwsa'ogüe'.

Jeso'osən' beyone' beⁿə' zan

16 Na' catə' gw^xen, besə'əžin beⁿə' gan' zo Jeso'osən' zjan^čhe'e beⁿə' zan zjəyo'o zjəyaz de'e xio' yichjla'ažda'oga'aque'enə'. Jeso'osən' con bene' mendad na' besyə'əchoj de'e xio' ca'. Na' beyone' yoguə' beⁿə' ca' chsa'acšenənə'.

17 Can' bene' par ni^čh goc complir can' bzoj de'e profet Isaiazən' čhe' cana', nan: “Le'enə' yeque'e de'en chžagla^ocho na' gone' ca yeya^quecho čhe yoguə' yižgüe'.”

Can' gož Jeso'osən' beⁿə' ca' gwse'ene žja'aclen le'

18 Gwde na' ble'i Jeso'osən' babesə'əžin beⁿə' zan zjənye^čhe' le', nach bene' mendad len disipl čhe' ca' yesə'ə^lague'e yeš^la'alə nisdə'onə'.

19 Na' bchoj to ben' chsed chlo'i lei de'en bzoj de'e Moisezən' nach bgüigue'e lao Jeso'osən' na' gože'ene': —Maestr, gwza'alena' le' gatə'atezə šejo'.

20 Na' par ni^čh be'enə' benyane'e xbab šə de'e liczə che'enene' šejlene' le', na' Jeso'osən' gože'ene': —Zjəde liž becoyo'o ca' na' leczə zjəde liž bia ca' zo xile'e bia čaš yoba, pero nada' bitobi xlatja' de gan' gona' dezcanz la'anə'aczə bselə' Diozən' nada' golja' beⁿə^č.

21 Na' bchoj yeto ben' nao de'en chsed chlo'i Jeso'osən' na' gože'ene': —Xana', gwza'alena' le' pero zgua'atec be'ešga latjə yega'anlena' xa'anə' xte catə'əč əžin ža gate' na' əgw^cuaša'ane'.

²² Jeso'osən' gože'ene': —Da len nada'. Beṇə' ca' zjənaquə len yichjla'ažda'oga'aquen' ca beṇə' guat guaquə yesə'əcuasē'e beṇə' guat ca'.

Jeso'osən' gwleczie' to be' gual lao nisdaon'

²³ Gwde be' Jeso'osən' dižə' ca', gwyo'e lo'o barcon' len disipl che' ca'.

²⁴ Na' lao zda barcon' gwtas Jeso'osən'. Na' gwzola' gwyechj to be' gual lao nisda'onə', na' gwzola' chož nisən' lo'o barcon'.

²⁵ Nach bosyo'osbane' Jeso'osən' gwse'ene': —jXanto! jBosla chio'o! jBač chbiayi'icho!

²⁶ Nach Jeso'osən' gože' lega'aque': —Bito žeble. Le'e šejle'ech chia'.

Nach gwyase' ne'e chas chatə' nisda'onə' nach bene' mendad besyə'əbe'eži nisda'onə' len be'enə', na' le'e besyə'əbe'ežiten.

²⁷ Na' disipl che' ca' besyə'əbanene' can' bene'enə', nach gwse' ljuežjga'aque': —Bitolja naquə bengā con to beṇačzə, la' ħnacxa gon to beṇač par yebeczie' be' gualən' len nisda'onə'?

Chopə beṇə' Gadara zjəyo'o zjəyaz de'e xio' yichjla'ažda'oga'aquen'

²⁸ Na' besə'əžine' yešla'alə nisda'onə', laž beṇə' Gadara ca'. Na' catə' besyə'əchoje' barcon', besə'əšag chopə beṇə' Jeso'osən', beṇə' zjəyo'o zjəyaz de'e xio' lo'o yichjla'ažda'oga'aquen'. Beṇə' quinga banitə'əte' capsant na' chesə'əchoje' chaše' do tnezən' galə'əzə capsantən' chso'one' znia juisy len beṇə' chesə'əžague', na' caguə no chac ta tnezən'.

²⁹ Na' de'e xio' ca' gwso'osya'an gwse'en Jeso'osən': —Partlə le', na' partlə neto', Jeso'os

Xi'in Dioz. ¿Eza'o par əgwčhi'i əgwsaco'o neto' catə' cuiṇə' əžin ža əžin or par si'ito' castigw?

³⁰ Na' galə'əzə chaš beṇə' choso'oye' coš zan.

³¹ Nach de'e xio' ca' gwsa'atə'əyoin Jeso'osən' gwse'en le': —Šə yebejo' neto' yichjla'aždao' beṇə' quinga, güe'ešgo' latjə žjəyežo'oto' lo'o la'aždao' coš ca'.

³² Nach gož Jeso'osən' lega'aquən: —Leyechoj.

Nach besyə'əchojən yichjla'aždao' beṇə' ca' na' jəsyə'əžo'on lo'o la'aždao' coš ca'. Nach besyə'ədiṇses coš ca' le'e ya'a gan' chašəbən' na' jəsyə'əxorəb lo'o nisda'onə', na' gwsa'atəb gwse'ejəb nisən'.

³³ Na' beṇə' ca' chosə'əye' coš ca' besa'acdoe' na' besyə'əžine' syodan', jəsyə'ədixjue'ine' beṇə' lao' syodan' yoguə' can' bagoc na' can' babesyə'əyaque beṇə' ca' zjəyo'o zjəyaz de'e xio'onə' yichjla'ažda'oga'aque'enə'.

³⁴ Nach yoguə' beṇə' ca' ža' syodan' ja'aque' gan' zo Jeso'osən'. Na' catə' besə'əžague' Jeso'osən' gwsa'atə'yoine' le' yeze'e lažga'aque'enə'.

9

Beyon Jeso'osən' to beṇə' nat to part cuerp che'enə'

¹ Nach Jeso'osən' beyo'e to lo'o barcw len disipl che' ca' na' besyə'əlague'e yešla'alə nisda'onə' par besyə'əžine' Capernaum gan' bazocze'.

² Na' besə'əžin xonj beṇə' na' zjənlene' to beṇə' nat to part cuerp che'enə', zjənxo'e'ene' to lao cam dao'. Ca' naquə goche'i Jeso'osən' de que

gwso'onlilaže'ene', nach gože' beṇə' güe'enə': — Bebei, xi'indaogua'a. Babezi'ixena' xtol'onə'.

³ Na' baḷə beṇə' ca' choso'osed choso'olo'i lei de'en bzoj de'e Moizezən' gwse'enene' de'en gož Jeso'osən' beṇə' güe'enə', na' gwso'one' xbab lo'o yichjla'ažda'oga'aque'enə' gosə'əne': —Benga chžia chnite'e Diozən' laogüe de'en chon cuine' ca Diozən'.

⁴ Jeso'osən' goche'ine' xbabən' chso'one'enə', nach gože' lega'aque': —¿Bixchen' chonle xbab malən' ca' lo'o yichjla'ažda'olen'?

⁵ Šə con yapa'ane' de que babezi'ixena' xtole'enə', bito nezele šə napa' yelə' gwnabia' par yezi'ixena'an. Pero šə yapa'ane': “Gwyas na' gwda”, guatə'əbia' šə napa' yelə' gwnabia' par gaquə can' nia'anə'.

⁶ Diozən' bsele'e nada' golja' beṇəch na' de'engan' gona' par nič ənezele de que napa' yelə' gwnabia' lao yežlyo nga par yezi'ixena' xtolə' beṇəchən'.

Nach gože' beṇə' güe'enə': —Gwyas beyoa xcamo'onə' na' beyej ližo'onə' to šao' to güen.

⁷ Na' beyas be'enə', beze'e zjəyede' liže'.

⁸ Na' beṇə' ca' besə'əle'i can' goquən', lechguale besə'əžebe'. Na' gwso'elaogüe'e Diozən' ca naquə bene' yelə' guac par nič Jeso'osən' goc bene' de'e ca' zjənac ca'.

Jeso'osən' gwleje' Mation' par goque' disipl che'

⁹ Gwde na' beza' Jeso'osən' na' ble'ine' to beṇə' gochixjw na' le' Matio, chi'e latjə gan' chchixjue'enə'. Na' Jeso'osən' gože'ene': —Da len nada'.

Na' Mation' le'e gwzoža'ate' gwyejlene' le'.

10 Na' goquən' chi' Jeso'osən' liž Mation' len disipl che' ca' chsa'ogüe'. Na' nitə' beṇə' zan beṇə' gochixjw ca' na' nochlə beṇə' güen de'e mal ca' chsa'olene' lega'aque'.

11 Na' beṇə' fariseo ca' catə' besə'əle'ine' chi' Jeso'osən' txen len beṇə' güen de'e mal ca', gwse'e disipl che' ca': —Malən' chon maestr chelen' che'ej chaogüe' txen len beṇə' gochixjw ca' na' nochlə beṇə' güen de'e mal beṇə' cui chonlento' txen.

12 Na' catə' Jeso'osən' benene' xtižə'əga'aque'enə', na' gože' lega'aque': —Beṇə' cui chsa'acšene bito chəsə'əyažjene' beṇə' güen rmech. Beṇə' ca' chsa'acšene lega'aque'enə' chəsə'əyažjene' beṇə' güen rmech.

13 Lešej na' legwsed bi zeje Xtižə' Diozən' de'en nyojən nan: “Che'enda' yeyašə' yeži'ilažə'əle beṇə', caguə tlaozə gotle bia yixə' par güe'ela'ole nada.” Za'a zedəyena' par ničh beṇə' ca' zjənezene' de que zjənaque' beṇə' güen de'e mal yesyə'ədinjene' xtolə'əga'aque'enə', pero bito zedəyena' par ničh beṇə' ca' chsa'aque'ne' bazjənaque' beṇə' güen yesyə'ədinjene' xtolə'əga'aque'enə'.

Chəsə'əṇabene' Jeso'osən' bixchen' disipl che' ca' cui chəsə'ənite'e sin cui əse'ej əsa'ogüe'

14 Nach disipl che Juan ben' bchoa nis gosə'əbigue'e lao Jeso'osən', na' gwse'ene': —Zan las beṇə' fariseo ca' na' neto' chzoto' sin cui che'ej chaoto' par cho'ela'oto' Diozən'. Pero disipl chio' ca' chse'ej chsa'ogüe'. ¿Bixchen' ža?

15 Nach Jeso'osən' gože' lega'aque': —Catə' chac to yelə' gošagna' beṇə' migw che be'enə' chšagna'anə' bito chəsə'əgüine'ene' sino chse'ej chsa'ogüe'. Na'

ca'acžən' naquən len nada' na' len disipl čhia' ca', chse'ej chsa'ogüe' lao ņe'e zoa' len lega'aque'. Catə'əchən' əžin ža yesə'əche'exaxj beŋə' contr čhia' ca' nada' cana'achən' əchoj catə' cuich əse'ej əsa'o disipl čhia' ca'.

¹⁶ Notono beŋə' zo beŋə' chčhine' to pedas lachə' cuiŋə' xoa nis par yoda' xa gole'enə' de'en bačh chyoe. Šə can' gone', catə' čhib xe'enə' yebe' lachə' cobən' na' əchezəchən len.

¹⁷ Na' leczə notono zo beŋə' chgue'e bino cobən' lo'o yid golən'. Šə gone' ca', bino cobən' əchezəən yid golənə' na' laljə binon' na' cuiayi' yidən'. Cle la' cheyalə' que'e bino cobən' lo'o yid cobə, par ničh ca' bito cuiayi' binon' na' yidən'.

Gože' lega'aque' ca' par ničh bzejni'ine' de que bito gaquə yesə'ənaogüe' costombr golə čhega'aque'enə' na' yesə'ənaotie' de'en chsed chlo'ine'.

Jeso'osən' beyone' xi'in Jairon' na' no'olən' gwdan lox xadon čhe'enə'

¹⁸ Na' ņe'e cho'ete Jeso'osən' dižə' quinga, bžin to beŋə' gwnabia' bzo xibe' lao Jeso'osən' na' gože'ene': —Ze'e gotte to xi'ina' no'olə. Yo'ošga cano'obo', na' yebambo'.

¹⁹ Na' le'e gwzoža'ate Jeso'osən' na' txen len disipl čhe' ca' ja'aclene' beŋə' gwnabian'.

²⁰ Na' lao zja'aque' liž beŋə' gwnabian' jənao to no'olə lega'aque', beŋə' bagoc šižin iz chzoe' bgua'a. Na' bene' byen bgüigue'e cožə' Jeso'osən' gwdane' lox xadon čhe'enə'.

²¹ La' bene' xbab lo'o yichjla'ažda'ogüe'enə', gwne': “Con cana' xadon čhe'enə', goyacczəda'.”

22 Na' gwyečhj Jeso'osən', ble'ine' no'olən', na' gože'ene': —Bebei xi'in̄daogua'a. Babeyacdo' čhedə' chonlilažo'o nada'.

Na' le'e bega'ate yižgüe' de'en che'i no'olən'.

23 Catə' bžin Jeso'osən' liž beṇə' gwnabian', na' ble'ine' beṇə' zan zjəža' na' nitə' beṇə' chəsə'əcuež ca bžejo, na' beṇə' ca' ža'anə' chəsə'əbežchgüe'.

24 Na' gože' lega'aque': —Le'e yechoj ngalə. Bito nacbo' bi'i guat, con chtasbo'onə'.

Pero na' beṇə' ca' gwso'onle'e che'.

25 Na' beyož besyə'əbeje' beṇə' ca' fuerlə, nach gwyo'o Jeso'osən', bexe'e na' bi'i no'olə guat da'onə', na' beyasbo'.

26 Na' ca naquə de'e güennə' de'en ben Jeso'osən' gosə' gwłaljə dižə'anə' yoguə' yež ca' zjəchi' do na'.

Jeso'osən' beyone' čhopə beṇə' lčhol

27 Na' catə' beza' Jeso'osən' len disipl che' ca', jəsə'ənao čhopə beṇə' lčhol lega'aque'. Na' gwsa'atə'əyoine' le' gosə'əne' zižjo gosə'əne': —Le' naco' xi'in̄ dia che de'e Rei Dabi. Beyašə'əlažə'əšgwei neto'.

28 Na' catə' bežin Jeso'osən' len disipl che' ca' liže'enə' na' besyə'əyo'e, na' leczə gwso'o beṇə' lčhol ca'. Nach Jeso'osən' gože' lega'aque': —¿Echejle'ele de que guac gona' par ničh yele'ilen'?

Nach gwse'ene': —Chejle'eto' Xanto'.

29 Nach Jeso'osən' gwdane' jlaoga'aque'enə', na' gože' lega'aque': —Yele'ile, čhedə' chonlilažə'əle nada'.

30 Nach besyə'əle'ine'. Na' Jeso'osən' bene' mendad cui no əso'elene' dižə' ca naquə bene' par ničh besyə'əle'ine'.

31 Bixa na' besa'aque' na' gatə'ətezə ja'aque' doxen Galilean' jəsyə'əye'elene' beṇə' dižə' ca naquə de'en baben Jeso'osən' len lega'aque'.

Jeso'osən' beyone' to beṇə' mod

32 Na' catə' besa'ac beṇə' ca' babesyə'əle'inə', le'e besə'əžinte beṇə' yoblə zjənche'e to beṇə' mod, na' yo'o yaz de'e xio'onə' yichjla'ažda'ogü'e'enə'.

33 Jeso'osən' bebeje' de'e xi'onə' na' le'e benete be'enə'. Na' beṇə' zan ca' besə'əle'i can' goquən' besyə'əbanchgüeine', na' gosə'əne': —Chio'o beṇə' Izrael de'e nechən' bable'icho ca naquə milagr de'en chon benga.

34 Pero na' beṇə' fariseo ca' gosə'əne': —Gwxiye' de'en chnabia' de'e xio' ca'anə' chaclenən le' par niç chebeje' de'e xi'onə'.

Jeso'osən' cheyašə' cheži'ilaže'e beṇə'čan'

35 Na' Jeso'osən' len disipl che' ca' ja'aque' yo'odao' che to to yež na' to to syoda gan' mbane Galilean' na' gwdixjue'ine' beṇə' dižə' güen dižə' cobən' can' nabia' Diozən' notə'ətezə beṇə' so'e latjə. Na' beyone' yoguə' beṇə' ca chsa'acšene len bitə'ətezə yižgü'e' de'en chse'ine'.

36 Na' Jeso'osən' ble'ine' beṇə' zan ca' zjəsə'ənao le' na' beyašə' beži'ilaže'e lega'aque' chedə' gocbe'ine' chsa'acžejlaže'e naclən' so'one' na' gocbe'ine' caguə no zo no gaquəlen lega'aque' len yoguə' de'en chəsə'əžaglaogü'e'enə'. Gwsa'aque' ca xilə' bian' cui no xanga'aquəb zo par əgwye' lega'aquəb.

37 Nach gože' disipl che' ca': —Nitə' beṇə' zan beṇə' yoso'ozenague' che Diozən' catə' se'enene' xtiže'enə'. Na' gwxaquə'əlebəga'aque' ca to cwseš

xen de'en chetoba'. Na' chyažjda' beṇə' zan əsa'aclene' nada', la' to čhɔpgale nitə'.

³⁸ De'e na'anə' leṇabe Xancho Diozən' əselə'əche' beṇə' zanch par əsa'aclene' chio'o yetobcho cwseš čhe'enə'.

10

Jeso'osən' gwleje' beṇə' šižin ca' par əsa'aque' apostol

¹ Jeso'osən' betobe' disipl che' ca' šižin na' bnežjue' lega'aque' yelə' guac par nič əsa'aque' yesyə'əbeje' de'e xio' zjəyo'o zjəyaz lo'o yičjla'aždao' beṇə', na' par nič əsa'aque' yesyə'əyone' beṇə' bitə'ətezə yizgüe' de'en chse'ine' na' bitə'ətezəchlə de'e chsa'aque'ne'.

² Quinga zjəle beṇə' šižin ca': Simon ben' leczə le' Bed, na' Ndres beṇə' bišə' Bedən', na' xi'in Sebedeon' Jacob len Juannə',

³ na' Lip na' Bartolome, na' Tomas, na' Matio ben' goquə beṇə' gochixjw, na' Jacob xi'in Alfeo, na' Lebeo, ben' leczə le' Tadeo,

⁴ na' Simonṇə' ben' ben txen len partid Cananistən', na' Jod Iscariot ben' bdie' Jeso'osən' lao na' beṇə' contr ca'.

Jeso'osən' bsele'e disipl che' ca' šižin jəsə'ədixjui'e xtižə'ena'

⁵ Na' catə' Jeso'osən' bsele'e beṇə' šižin quinga jəsə'ədixjui'e xtižə' Diozən', gože' lega'aque': — Chselə'a le'e žje'ele xtižə' Diozən' len yeziquə'əchlə beṇə' Izrael ca'. Na' bito əžja'acle laž beṇə' ca' cui zjənaquə beṇə' Izrael, na' nic əžja'acle yež ca' zjəchi' Samarian'.

6 Le'e žja'ac porzə gan' ža' beṇə' Izrael beṇə' bazjəmbiayi' čhedə' bitonə' so'ombi'e Diozən'.

7 Le'e žja'ac na' le'e žjətixjue'e de que babžin ža Diozən' ben' zo yoban' nabi'e con notə'ətezə beṇə' əso'e latjə.

8 Le'e yeyon beṇə' chsa'acšene, na' le'e yeyon beṇə' ca' chse'i yižgüe' de'en ne' lepr, na' le'e yosban no beṇə' bagwsa'at, na' le'e yebej de'e xio' zjəyo'o zjəyaz lo'o yichjla'aždao' beṇə'. Diozən' babene' le'e yelə' guac che'enə' dadzə par gonle de'e quinga, de'e na'anə' le'e gaclen beṇə' ca' dadzə.

9 Bitobi gonle probnid gua'ale, ni mech de or, de plət, o de cobr lo'o bols mech čhelen' lao co'ole nezən'.

10 Na' nic gua'ale bsod, o yeto xcamisle, nic gua'ale yel, na' nic goxə'əle garrot. Ca naquə le'e chonle xšina'anə' zaquə'əle par gon beṇə' de'e ye'ej gaole gan' sela'a le'enə'.

11 Na' gatə'ətezə syoda o yež gan' əžinle, leṇab šə zo to beṇə' güen beṇə' yebei əgüialaogüe'e le'e liže'enə'. Na' na'atezə sole xte catə'əch yesa'acle.

12 Na' catə' əžinle liže'enə', le'e gguape' diox, na' le'e nablazə' so cueze' binlo len yichjla'ažda'ogüe'enə'.

13 Na' šə na' nitə' beṇə' chse'enene' yesə'əzo yesə'əbezəga'aque' binlo len yichjla'ažda'oga'aque'enə', na' gaquə can' ənablazə'əle par yesə'əzo yesə'əbezəga'aque' binlo. Pero šə bito no zo no chon ca so cueze' binlo len yichjla'ažda'ogüe'enə', bito gaquə ca de'en bagwṇablazə'əlen'.

14 Na' gatə'ətezə əžinle ga cui nono yebei əgüialao le'e, na' nic əgwzenague' čhele, le'e yesa'ac liž

be'enə' o yežən'. Na' catə' yesa'aclen', əgwsɪ'iɲs
 ɲi'alən' par yežib bišten' de'en gwžianɲə', niç
 əgwlo'ile beɲə' ca' de que de'e malən' chso'one' cui
 chesə'əzenague' xtižə' Diozən' de'en cho'elen'.

¹⁵ Diozən' bene' par byiɲj yi' na' sofr lao syoda
 Sodoman' na' syoda Gomorran' por ni che de'en
 cui boso'ozenague' che'. Na' de'e li əchnia'
 le'e, catə' əžin ža gon Diozən' castigw zejlicane
 che yoguə' beɲə' chso'on de'e malən', beɲə' ca'
 cui yosə'əgüialao le'e yesə'əzaquə'əzi'iche' clezə ca
 beɲə' ca' gwnitə' Sodoman' na' Gomorran'.

Gaquə de'e saquə'əzi'icho

¹⁶ Le'e gon xbab de que nada' əselə'a le'e
 žjətixjue'ele xtižə'anə' len beɲə' ca' gwxaquə'əlebe
 ca bež, na' le'e gwxaquə'əlebele ca xilə' dao'
 ladjoga'aque'enə', chedə' beɲə' ca' se'enene' so'ote'
 le'e can' chso'on bež ca' chso'otəb xilə' dao'. Pero
 le'e cheyalə' gacle lechgualə beɲə' xenlažə' na'
 lechgualə beɲə' bib par len lega'aque'.

¹⁷ Nitə' beɲə' so'one le'e lao na' beɲə' gwnabia' ca'
 por ni che de'en chonlilažə'əle nada' na' yesə'əyine'
 le'e lo'o yo'odao' chega'aque' ca'. De'e na'anə' le'e
 chiljlažə' naclən' gonle par niç cui gacle lao na'
 beɲə' contr ca'.

¹⁸ Nach leczə por ni che de'en chonlilažə'əle nada'
 nitə' beɲə' yesə'əche'əxaxje' le'e lao no gobernador,
 na' lao no rei. Na' catə' gaquə ca' güe'ele xtižə'anə'
 lao beɲə' gwnabia' ca', beɲə' Izrael len beɲə' cui
 zjənaquə beɲə' Izrael.

¹⁹ Pero catə' yesə'əche'əxaxje' le'e lao beɲə' ca',
 bito cuec yichjle nac yoži'ile xtižə'əga'aque'enə'.

Lao or na'atezə Diozən' əgwzejni'ine' le'e bin' cheyalə' ənale.

²⁰ La' caguə le'ezən' güe'ele xtiža'anə', Spirit che Xacho Diozən' əgwzejni'in le'e bin' cheyalə' nale.

²¹⁻²² Na' yoguə' beṇə' ca' cui zjənombia' Diozən' yesə'əgue'ine' le'e chedə' chonlilažə'əle nada', na' xte no bišə'əle na' no xale so'one' le'e lao na' beṇə' par niç so'ote' le'e, na' leczə xte no xi'inle so'one' le'e lao na' beṇə' ca' so'ot le'e. Pero šə sotezə sole gonlilažə'əle nada' xte catə'əch əžin ža gatle, nachən' žjəyezole len Diozən'.

²³ Šə beṇə' nitə' to yež yesyə'əlague' le'e, le'e yesa'actele na' žjəya'acle ga yoblə. Diozən' bsele'e nada' golja' beṇəch, na' de'e li chnia' le'e bitonə' yeyož güe'ele xtiža'a lao yoguə' beṇə' Izrael ca' catə'an yida' de'e yoblə.

²⁴ Nezele can' naquən catə' to beṇə' chsede' len tō maestr, bito əṇacho naque' beṇə' blaoch ca maestrən', na' to mos bito naque' blaoch ca xane'enə'.

²⁵ Na' ben' chsed bito cheyalə' gone' xbab so'on beṇə' güench len le' cle ca chso'one' len maestr che'enə'. Le'egatezə ca' mosən' bito cheyalə' gone' xbab so'on beṇə' güench len le' cle ca chso'one' len xane'enə'. Nitə' beṇə' chesə'əne' chona' txen len de'en chnabia' de'e xio' ca' de'en le Beelsebo. Nadan' naca' Xanle na' naquəchxe yesə'əne' che le'e nacle disipl chia'.

Cheyalə' žebcho castigw de'en gon Diozən' chio'o

²⁶ Na' la'anə'əczə yoso'oçhi' yoso'osaquə' beṇə' le'e laogüe de'en cui chse'ejni'ine' de que chonle can' chene'e Diozən' bito žeble lega'aque'. Guaquə

can' na dicho de'en na: “Yoguə'əlōl de'en ngašə' n̄a'a gwžin ža la'alaon, na' yoguə' əlōl de'e cui no gwse'ejni'i antslə leczə gwžin ža se'ejni'i beṇə' len.”

27 De'e zan de'en chsed chlo'ida' le'e de'en cui chsed chlo'ida' yeziquə'əchlə beṇə'. Na' le'e ža, legwsed legwlo'in yoguə'əlōl beṇə', na' le'e gon par nič beṇə' zan se'ejni'ine'en.

28 Bito cheyalə' žeble beṇə' ca' so'ot le'e, chedə' lega'aque' bito gaquə' bi so'onene' yichjla'ažda'olen'. Cheyalə' žeble Diozən', la' len' nape' yelə' chnabia' par əgwžiaiye' cuerp chelen' len yichjla'ažda'olen' lo'o yi' gabilən'.

29 Nezecho de que byiṇ dao' ca' bitobi zjəzaquə'ətequəb, pero bito n̄acho tob gat sin cui əneze Xacho Diozən'.

30 Na' ca naquə' chio'o ža, de'e tant chaque Diozən' checho xte nezene' balə' yišə' yichj to tocho žia la'aṇə'əczə nezecho bito bi zjəzaquə' yišə' yichjchon'.

31 De'e na'anə' bito žeble, chedə' zaquə'əch le'e cle ca bia zan byiṇ dao'.

Cheyalə' güe'echo dižə' len beṇə' de que nombi'acho Jesocristən'

32 Na' notə'ətezle šə cho'ele dižə' len beṇachən' de que chejle'ele chia', leczə ca' nada' gua'a dižə' len Xa'anə' ben' zo yoban' de que nacle xi'ina'.

33 Na' notə'ətezle šə cho'ele dižə' len beṇachən' de que bito chejle'ele chia', leczə ca' nada' gua'a dižə' len Xa'anə' ben' zo yoban' de que bito nacle xi'ina'.

Yesə'ədilə beṇə' por ni che de'en bidə Jeso'osan'

34 Bito gonle xbab de que beṇə' ža' yežlyo nga yesə'əzo yesə'əbeze' binlo len ljuežjga'aque' laogüe

de'en bida'. Bito yesə'əzo yesə'əbeze' binlo len ljuežjga'aque' laogüe de'en bida' sino yesə'ədile'.

³⁵ Laogüe de'en babida' yediłə beṇə' byo len xē'enə' na' no'olən' len xne'enə', na' yediłə xo'oliž beṇə' len taobin' che'enə'.

³⁶ Entr lo'o yo'ozəga'aque' yesyə'anite'e contr.

³⁷ Notə'ətezle šə chaquele che xale o che xna'ale mazəchlə can' chaquele chia' nada' bito zaquə'əle par gacle disipl chia'. Le'egatezə ca' šə chaquele che xi'inle mazəchlə can' chaquele chia' leczə bito zaquə'əle par gacle disipl chia'.

³⁸ Na' notə'ətezle šə laogüe de'en chaquele yoso'ochi' yoso'osakuə' beṇə' le'e o so'ote' le'e to le'e yag coroz de'e nan' bito chonlilažə'əle nada', bito zaquə'əle par gacle disipl chia' šə ca'.

³⁹ Notə'ətezə beṇə' chaquene' gone' par niç cui çhi' saque'e o par niç cui no so'ot le', be'enan' cuiayi'. Na' notə'ətezə beṇə' chsanlažə' cuine' çhi' saque'e o so'ot beṇə' le' por ni chia', be'enan' əbane' zejlicəne.

Beṇə' ca' nitə' mbalaz catə' yesyə'əžine' yoban'

⁴⁰ Notə'ətezə beṇə' yebeine' güialaogüe' le'e nacle disipl chia', nadə'əczan' yebeine' güialaogüe' šə ca'. Na' šə yebeine' güialaogüe' nada' leczə Dioz na'anə' əgüialaogüe', Dioz ben' bselə' nada'.

⁴¹ Beṇə' ca' chso'e xtižə' Diozən', mbalaz gaquə' çhega'aque' catə'an yesyə'əžine' yoban', na' notə'ətezə beṇə' yebeine' güialaogüe' lega'aque', leczə mbalaz soe' catə'an yežine' yoban'. Na' mbalaz gaquə' che beṇə' ca' chso'on can' chazlažə' Diozən' catə'an yesyə'əžine' yoban'. Na' notə'ətezə beṇə'

yebeine' gūialaogüe' lega'aque', lec̄zə mbalaz soe' catə'an yežine' yoban'.

42 Notə'ətezə beṇə' chnežjue' la'anə' tbaszə nis ye'ej be'enə' chonlilažə' nada', de'e liczə gona' ca soe' mbalaz catə'an yežine' yoban', la'anə'əczə ben' bnežjue' nisən' cuitec bi zaque'e len beṇachən'.

11

Juannə' bsele'e chopə disipl che' gan' zo Jeso'osən'

1 Catə' beyož ben Jeso'osən' mendad can' so'on disipl che' ca' šižin, beze'e latjən'. Na' gwyeje' yež ca' zjəchi' do na' jəsed jəlo'ine' xtižə' Diozən' len beṇə' ca' ža'anə'.

2 Na' ca' naquə' Juannə' ben' bchoa beṇə' nis, lao die' ližyan' benene' dižə' ca' naquə' yoguə' de'en chon Jeso'osən' ben' bselə' Diozən' par chaclene' nasyon Izraelən', nach Juannə' bsele'e chopə disipl che' ca' gan' zo Jeso'osən',

3 jse'eže'ene': —čElen' ben' naquən əselə' Diozən' o šə soto' lez yidə beṇə' yoblən'?

4 Nach Jeso'osən' gože' lega'aque': —Le'e žjəya'ac na' le'e žjəyeyež Juannə' doxen can' chenele na' can' chle'ile chona'.

5 Bable'ile chona' par ničh balə beṇə' lchol chesyə'əle'ine', na' balə beṇə' coj chesyə'əde', na' yebalə beṇə' cuež chesyə'əyenene'. Na' lec̄zə bable'ile bena' par ničh balə beṇə' gwse'i yižgüe' de'en ne' lepr babesyə'əyaquene'. Bable'ile bosbana' balə beṇə' guat, na' babenele cho'a dižə' güen dižə' cobə chia'anə' len beṇə' yašə' ca'.

6 Mbalaz zo beṇə' chejle'e de que Diozən' bsele'e nada'.

7 Nach catə' besyə'asa'ac disipl che Juannə', nach Jeso'osən' be'elene' beṇə' ca' zjəndobən' xtižə' Juannə', gože' lega'aque': —¿Nacxa naquə ben' jəle'itgüeiczele latjə dašən'? ¿Ešayečhə šayen chaque'? Bito.

8 ¿Nacxan' goque' catə' jəle'ilene'? ¿Enyaze' lachə' šao'? ¿Ešə bito? la' beṇə' ca' zjənyaz lachə' šao' nite'e yo'o güenchgua ca no liž rei.

9 ¿Noxan' jəle'ilen' ža? ¿Eto profet ben' cho'e xtižə' Diozən'? De'e li naque' to profet. Pero əchnia' le'e, caguə con to profetən'.

10 Che bengan' nyojən le'e Xtižə' Diozən' nan: Nada' Dios əseła'a to beṇə' cuialaogüe' güe'e xtižə'onə' par ničh nitə' beṇə' probnid par əso'elaogüe'e le' catə'an yido'.

11 De'e li əchnia' le'e, notono no beṇəch ne'e so beṇə' naquəch beṇə' blaoch ca Juan ben' chčhoa beṇə' nis. Na' notə'ətezəchlə beṇə' güe'e latjə ṇabia' Diozən' le', la'anə'əczə bito naque' beṇə' blaο, gwžin ža catə' šejni'ichene' chia' clezə ca Juannə'.

12 Dezd catə'an gwzolaο Juannə' gwđixjui'e xtižə' Diozən' na' bcho'e beṇə' nis xte ža neža beṇə' zan choso'ozenague' xtižə' Diozən' na' chəsə'əyiljlaže'e naclə so'one' par ničh ṇabia' Diozən' lega'aque'.

13 Catə' cuiṇə' solao gwzene Juannə' xtižə' Diozən', con lei de'en bzoj de'e Moisezən' na' de'en bosozoj yoguə' profet ca', de'e ca'azən' bzejni'in chio'o che Diozən'.

14 Xtižə' Diozən' de'en nyojən nan de que yeto beṇə' yedəyen can' ben Liazən' ben' be' xtižə' Diozən' cana'. Na' che Juan na'anə' bosozojə' žalə' šejle'ele.

15 Le'e žia nagle de'e chene, legwzenag xtiža'anə'.

16 ĵNac əgwsaquə'əlebetgüeida' le'e mbanle na'a? Egwsaquə'əlebeda' le'e ca bidao' chedə' cuiczə bi de žleb chele. Ca naquə bidao' ca' catə' nitə'əbo' do gan' chac ya'a chse' lĵuežĵga'acbo':

17 “Bento' legr, bito gwyo'olažə'əle, na' babento' bgüine bgüež, peor.”

18 Juannə' bide' laole nga. Bito güe'eĵ gwdaošaogüe'e can' chse'eĵ chsa'o beṇə' yoblə. Nach gwnale che': “Yo'o yaz de'e xio'onə' yichĵla'aždaogüe'enə'.”

19 Na' nada', Diozən' bsele'e nada' golĵa' beṇach. Na' chle'ile che'eĵ chaogua' can' che'eĵ chaole. Na' nale chia' de que naca' beṇə' lia na' beṇə' güe'ezo, na' leczə nale de que naca' migw che beṇə' gochixĵw ca' na' migw che yeziquə'əchlə beṇə' ca' chso'on de'e mal. Pero na' nachia' de que Dioz na'anə' naque' le'ezelaogüe beṇə' sin' por ni che can' chso'on beṇə' ca' choso'ozenag che'.

Yež ca' gan' cui boso'ozenague' che Jeso'osən'

20 Nach Jeso'osən' be'e xtižə' beṇə' ca' ža' yež ca' gan' bene' de'e zan de'e zaquə' yesyə'əbanene', na' gwdile' lega'aque' chedə' bito besyə'ədinĵene' xtolə'əga'aque'. Nach gwne':

21 —ĵProbchguazə le'e beṇə' Corasin! ĵProbchguazə le'e beṇə' Betsaida! Beṇə' ca' nitə' Tiro na' Sidon le'e besyə'ədinĵeine' xtolə'əga'aque'enə' žalə' blo'iga'acda'ane' yełə' guac chia'anə' ca de'en bablo'ida' le'e. Žalə' goquə ca', sa'azlĵe' lachə' zešə' na' zosə'əža'alĵa cuinga'aque' de par niĵ sa'acbe'i beṇə' de que babesyə'ədinĵene' xtolə'əga'aque'enə'.

²² Echnia' le'e saquə'əzi'ichle clezə ca beṇə! ca' nitə' Tiro na' Sidon catə' əžin ža gon Diozən' castigw zejlicane che yoguə' beṇə' chso'on de'e malən'.

²³ Le'e nitə'əle Capernaunnə', chonle xbabən' de que Diozən' gonchgüe' le'e yelə' bala'an, pero bito gone' le'e yelə' bala'an, sino gone' le'e castigw zejlicane de'en cui chejle'ele chia'. Žalə' bena' de'e zaquə' yesyə'əbane beṇə' ca' gwnitə' Sodoman' can' babena' laole nga, besyə'ədinjene' xtolə'əga'aque'enə' žalə' ca' na' ne'e chi' syodan' žalə' ca'.

²⁴ Echnia' le'e, saquə'əzi'ichle clezə ca beṇə' ca' gwnitə' Sodoman' catə' əžin ža gon Diozən' castigw zejlicane che yoguə' beṇə' chso'on de'e malən'.

Beṇə' ca' so'onlilažə' Jeso'osən' nite'e mbalaz

²⁵ Na' lao orən' Jeso'osən' bene' orasyon lao Diozən' gwne': —Xa', len' chnabi'o beṇə' ža' yoban' na' yežlyon'. Na' chona' yelə' choxcwlen chio' de que babzejni'ido' balə beṇə' can' che'endo' so'e latjə nabi'o yichjla'ažda'oga'aque'enə'. Bzejni'ido'on beṇə' ca' gwsa'acbe'i chəsə'əyažjene' no əgwsed əgwlo'i lega'aque' na' bito bzejni'ido'on beṇə' ca' chso'on xbab de que zjənaque' beṇə' sin' na' beṇə' zjənyejni'i.

²⁶ Beno' ca' ža Xa', chedə' can' gwyazlažə'o.

²⁷ Nach gože' beṇə' ca' ža'anə': —Xa'anə' babene' lao na'a chona' par ničh chombia' beṇə' le'. Le' nombi'ayaṇe'e nada', na' nada' nombi'ayaṇa'a le'. Na' beṇə' ca' bagwleja' par zjənombi'e Xa'anə', chona' par ničh zjənombi'ene' na' notono no nochlə zjənombia' Xa'anə' na' ni nada'.

28 L_egonlilažə' nada', le'e zole trist tant pesad chaquē chonle yoguə' de'e ca' chəsə'əne' chene'e Diozən' gonle. Nada' gona' ca sole mbalaz.

29 L_egon can' nona' mendad gonle na' legwzenag de'en əgwzejni'ida' le'e. Nada' naca' beṇə' xenlažə' na' beṇə' gaxjwlažə' na' gona' ca sole mbalaz lo'o yichjla'ažda'olen'.

30 Na' de'en nona' mendad gonle bito naquən pesad, na' de'en chsed chlo'ida' bito naquən zdebə.

12

Boso'olechj disipl ca' trigon' ža dezcanzən' par gwsa'ogüe'en

1 Na' gozaquən to ža dezcanz Jeso'osən' gwdie' len disipl che' ca' gan' nyaž trigon', na' disipl che' ca' gosə'ədone', nach gosə'əlechje' trigon' na' gwsa'ogüe'en.

2 Na' besə'əle'i balə beṇə' fariseo ca' can' gwso'on disipl ca', na' gwse'e Jeso'osən': —Bgüiašc can' chso'on disipl chio' ca' žin de'e cui de lsens goncho ža dezcanzən'.

3 Nach gož Jeso'osən' beṇə' fariseo ca': —ĵEcabi za'alažə'əle de'en bablable can' ben de'e Rei Dabin' catə' le' na' beṇə' ljuežje' ca' gosə'ədone'?

4 Gwyeje' lo'o yo'odao' əblaonə' nach gwdaogüe' yetxtil de'en bazjəncua' b_xoz ca' par Diozən', na' Dabin' bnežjue'en gwsa'o beṇə' ljuežje' ca' la'anə'əczə cui zjənaque' b_xoz. Na' yetxtilən' cui de lsens par gao con to beṇə' len letg b_xoz ca' chac sa'ogüe'en.

5 ĵEna' cabi za'alažə'əle ca de'en bablable le'e lei de'en bzoj de'e Moisezən' can' chso'onczə b_xoz ca' mendad che yo'oda'onə' yoguə' ža dezcanz na'

bito chso'omba'ane' žanə'. Na' bito nacho de que zjanape' dolə' por ni che de'en chso'one' mendadan' ža dezcanzən'.

⁶ Echnia' le'e, nada' zoa' nga zaquə'əcha' cle ca yo'odao' əblaonə'.

⁷ Xtižə' Diozən' de'en nyojən nan: “Che'enda' yeyašə' yeži'ilažə'əle beṇə', caguə' tlozə' gotle bia yixə' par güe'ela'ole nada'.” Žalə' chejni'ile bi zejenṇə' bitolja əṇale che disipl chia' quinga de que zjanape' dolə' por ni che šə' bin' bagwso'one' ža dezcanzən'.

⁸ Echnia' le'e de que Diozən' bsele'e nada' golja' beṇəch na' naquən lao na'a əṇia' bin' naquən güen goncho ža dezcanzən'.

Beyaque to beṇə' mbižə' šla'a ne'enə'

⁹ Na' catə' Jeso'osən' beze'e latjən', na' gwyo'e to lo'o yo'odao' chechon'.

¹⁰ Na' lo'o yo'odao' na' zo to beṇə' bambižə' šla'a ne'enə', nach beṇə' fariseo ca' gwse'e Jeso'osən': —¿Ede lsens par yeyoncho beṇə' xinj lao ža dezcanzən'?

Gwse'ene' ca' nič əžel de'en yesə'əde'ine' par əsa'ogüe' xya contr Jeso'osən'.

¹¹ Nach Jeso'osən' gože' lega'aque': —Šə' nitə' xilə' dao' chele na' əxopə' tob lo'o yech zitjw lao ža dezcanzən', ¿acabi le'e yebejteleb lo'o yechən' lao žanə'?

¹² Na' lechgualə' zaquə'əch to beṇə' cle ca to xilə' dao'. Na' əchnia' le'e de lsens gaquəlencho beṇə' lao ža dezcanzən'.

¹³ Nach Jeso'osən' gože' be'enə' mbižə' ne'inə': — Bli na'onə'.

Nach catə' bli na' be'enə' le'e beyacten can' naquə' de'en yešla'a.

14 Na' beṇə' fariseo ca', catə' besa'aque' yo'oda'onə' boso'oxi'e naclə so'one' par so'ote' Jeso'osən'.

To de'en bzoj de'e profet Isaiazən' che Jeso'osən'

15 Gocbe'i Jeso'osən' can' boso'oxia' beṇə' fariseo ca', na' gwze'e gwyeje' ga yoblə. Beṇə' zan jəsə'ənaogüe'ene' nach Jeso'osən' beyone' beṇə' ca' chsa'acšene.

16 Na' bene' mendad cui no əso'elene' dižə' de que Dioz nan' bsele'ene' par gaquəlene' nasyon čhega'aque'enə'.

17 Bene' ca' par nič goc complir can' bzoj de'e profet Isaiazən' che' nan:

18 Bengan' naque' xmosa', ben' gwleja' par gone' can' chazlaža'anə'.

Chacchgüeida' che', na' cheba chezaquə'əlaža'a len le'.

Na' nada' əseļa'a Spirit chia'anə' sotezə son len le'.

Na' beṇə' zjənaquə beṇə' Izrael len beṇə' cui zjənaquə beṇə' Izrael čixjue'ine' lega'aque' naquən' cheyalə' so'one'.

19 Bito gaquəyože' beṇə', nic gosye'e,

na' nic əṇe' zižjo lao lqueyən' par əse'ene beṇə' bin' ne'.

20 Gwnežjue' fuers balor che beṇə' ca' chsa'acbe'i cui bi fuers balor čhega'aque' de par so'one' de'e güen,

na' yezi'ixene' che beṇə' ca' chsa'aque'ne' cui no yezi'ixen čhega'aque'.

Yoguə' de'e can' gone' par nič əžin ža so'on beṇəčən' can' chazlaže'enə'.

21 Na' beṇə' zjənaquə beṇə' Izrael len beṇə' cui zjənaquə beṇə' Izrael yesə'əbeze' gaquəlene' lega'aque'.

Gosə'əne' de que Jeso'osən' bebeje' de'e xio' ca' len yelə' guac che Beelsebo

22 Na' zo to beṇə' Ichol, na' nacte' beṇə' mod, na' yo'o yaz de'e xio'onə' lo'o yichjla'ažda'ogüe'enə' na' jso'ene' lao Jeso'osən'. Na' Jeso'osən' bebeje' de'e xio'onə' yo'o yaz yichjla'aždao' be'enə' na' le'e bele'iteine' na' gocte beṇe'.

23 Na' yoguə' beṇə' ca' besə'əle'i can' goquə lechgualə besyə'əbanene'. Nach gwse' ljuəžjga'aque': —¿Enaquəlizə be'enga ben' chbezcho yidə lao dia che de'e Rei Dabin'?

24 Na' catə' gwse'ene beṇə' fariseo ca' dižə' quinga gwse'e balə beṇə' ca': —Bitobi yelə' guac napəbenga. Con chebeje' de'e xio' ca' len yelə' guac che Beelsebo de'en chnabia' de'e xio' ca'.

25 Gocbe'i Jeso'osən' can' gwso'on beṇə' fariseo ca' xbabən', nach gože' lega'aque': —Šə beṇə' ža' to nasyon əsa'aque' choplə na' yesə'ədile' entr lega'aque', əgwžiyi' nasyon čhega'aque' na'anə' šə ca'. Na' leczə ca' šə beṇə' nitə' to syoda əsa'aque' choplə na' yesə'ədile' entr lega'aque', leczə cuiayi' syoda čhega'aque' na'anə' šə ca'. Na' šə to family əsa'aque' choplə na' yesə'ədile' entr lega'acze' leczə yenit family čhega'aque' na'anə' šə ca'.

26 Le'egatezə ca' šə Satanasən' yebej cuinei lo'o yichjla'aždao' beṇə' leczə cuiayi' yelə' chnabia' čhei na'anə' chedə' chdiləlen cuinei žalə' ca'.

27 Le'e nale de que nada' chebeja' de'e xio' ca' yo'o yaz yichjla'aždao' beṇə' len yelə' guac che

Beelsebon'. Žalə' naquən can' nalenə', leczə zejen de que beṇə' ljuežjle ca' chəsyə'abeje' de'e xio' ca' zjəyo'o zjəyaz yichjla'aždao' beṇə' len yelə' guac chei žalə' ca'. Beṇə' ljuežjle ca' se'e le'e de que clelən' nale chia' nada' can' chebeja'annə'.

²⁸ Na' de'en chebeja' de'e xio' ca' len yelə' guac che Spirit che Diozən', chlo'in de que babžin ža chene'e Diozən' güe'ele latjə nabi'e le'e.

²⁹ Nezecho notono no gaquə šo' liž to beṇə' gual par žjəlane' šinlaze' ca' sin cui əgwcheje' xan yo'onə' to do. Con šə əgwcheje'ene' guaquə cuane' šinlaze' ca'.

³⁰ Šə cui chonle txen len nada', chonle contr nada'. Na' šə cui chonle ca se'ejele' beṇə' chia' zeje dižə' de que chonle par nič cui yoso'ozenague' chia'anə'.

³¹ De'e na'anə' əchnia' le'e, bitə'ətezə de'e mal de'en chonle, na' bitə'ətezə dižə' mal de'e cho'ele, Diozən' yezi'ixene' chele šə yedinjelen, pero notə'ətezle šə güe'ele dižə' contr Spirit che Diozən' cuat yezi'ixen Diozən' chele.

³² Na' notə'ətezle šə güe'ele dižə' contr nada', la'anə'əczə Diozən' bsele'e nada' golja' beṇəč, gozi'ixencze' chele šə yedinjele can' nale, pero šə güe'ele dižə' contr Spirit che Diozən', cuat yezi'ixen Diozən' chele ṇa'a na' batə'ətezə.

Segon can' naquə frot de'e chbia to yaguən' nezecho nac naquə yaguən'

³³ Nezecho de que to yag frot naquən yag güen o cui naquən yag güen segon nac naquə frot cheinə'. Ca'acžən' nacbja' šə naquən' nacle.

³⁴ Lechguale beṇə' mal nacle. Bitoczə gaquə güe'ele dižə' güen chedə' nacle beṇə' la'aždao'

mal. Yoguə'əte dižə' de'e chchoj cho'achon' la' lo'o yichjla'ažda'ocho na'anə' za'an.

³⁵ To beṇə' la'aždao' xi'ilažə' cho'e dižə' güen, chedə' la' can' nan lo'o yichjla'ažda'ogüe'e nan' cho'e dižə'. Na' to beṇə' la'aždao' mal cho'e dižə' mal la' can' nan lo'o yichjla'ažda'ogüe'enə'.

³⁶ Na' əchnia' le'e, catə'an əžin ža gon Diozən' castigw zejlicane che yoguə' beṇə' ca' chso'on de'e malən', cana' yoguə'əloḷ beṇə' yesə'ədie' cuent che yoguə' dižə' de'en bagwso'e de'e bitobi zjəzaquə'an.

³⁷ Na' segon dižə' de'en cho'ele Diozən' choglaogüe'en chele šə naple dolə' o šə cui naple dolə'.

Beṇə' mal ca' chəsə'əṇabe' gon Jeso'osən' to miḷagr

³⁸ Nach balə beṇə' ca' choso'osed choso'olo'i lei de'en bzoj de'e Moisezən', na' beṇə' fariseo ca' gwse'e Jeso'osən': —Maestr, che'eneto' gono' to miḷagr par niḥ əṇezeto' šə de'e liczə Dioz nan' bsele'e le'.

³⁹ Nach Jeso'osən' gože' lega'aque': —Le'e mbanle na'a, naquəchguale beṇə' yichjla'aždao' mal, na' bito chzenagle che Diozən'. Na' chṇable gona' to miḷagr par niḥ əṇezele šə le Dioz nan' bsele'e nada'. Pero bito gona' can' chṇablenə'. De'en gon Diozən' len nada' par niḥ əṇezele de que le'enə' bsele'e nada', gwxaquə'əleben ca de'en bene' len de'e profet Jonasən'.

⁴⁰ Antslə ze'e šeje' Niniben' Diozən' bene' par niḥ to bel ya'a xen gwdebob le', na' šoṇə ža šoṇə yel gwyo'e lo'o le'ebən' catə' beyebəb le' mbancze'. Na' ca naquə nada', gata' na' əgaša'a, na' te šoṇə ža šoṇə yel yebana' ladjo beṇə' guat ca' par niḥ əṇezele de que Diozən' bsele'e nada' golja' beṇaḥ.

41 Na' catə' əžin ža gon Diozən' castigw che yoguə' beṇə' chso'on de'e malən', ža na' yesyə'əban de'e beṇə' Ninibe ca' na' lao Diozən' yesə'əcuiše' le'e mbanle ṇa'a, chedə' besyə'ədinjene' xtolə'əga'aque'enə' catə' de'e Jonasən' gwɔixjue'ine' lega'aque' can' na' Diozən'. Le'e gonšč xbab de que nada' zoa' nga naquəcha' beṇə' blaoch cle ca' de'e Jonasən', na' bito chzenagle chia'.

42 Na' leczə žan' gon Diozən' castigw che yoguə' beṇə' chso'on de'e malən', de'e no'olən' gwnabia' beṇə' ca' gwnitə' galən' chla' bgüižən' cuiten lichalə yebane' len yeziquə'əchlə beṇə' guat ca' na' lao Diozən' əgwcuise' le'e mbanle ṇa'a. Ca naquə le' ža, gwze'e Seba gan' naquə zitə'əchgua na' bide' nga par bzenague' dižə' sin' de'en be' de'e Rei Salomonṇə' len le'. Na' nada' zoa' nga naquə'əcha' beṇə' blaoch cle ca' de'e Salomonṇə', na' bito chzenagle chia'.

De'e xi'onə' yeyo'on de'e yoblə lo'o yichjla'aždao' beṇə'

43 Na' šə to de'e xio' de'en yo'o yaz yichjla'aždao' beṇə' yechojən nach lažə'ən nil na'alə yeyiljən ga son mbalaz. Na' šə bitobi latjə želən, nach ənan:

44 “De'e yobləczə žjəyežo'a yichjla'aždao' be'enə' gan' gwyo'o gwyaza' antslə.” Na' yeyejən de'e yoblə gan' zo ben'. Catə' le'in de que bacheyone' xbab güen na' bazochə' binloch na' caguə nochlə yo'o yaz yichjla'aždaogüe'enə' de'en əgwžon yeyo'on de'e yoblə, nach yeyo'on.

45 Nach žjəyetobən yegažə de'e xio' ca' de'en zjənaquə maləch ca len na' txenṇə' so'on lo'o yichjla'aždao' be'enə'. Na' šə bagwso'onən ca',

bachaquəch mal che be'enə' clezə can' goc che' antslə. Can' goquə len bengə leczə ca'anə' gaquə che le'e mbanle na'a de'en nactecle beṇə' la'aždao' mal.

Xna' Jeso'osən' na' biše'e ca' besə'əžine' gan' zoe'

⁴⁶ Necho'ete Jeso'osən' dižə' chsed chlo'ine' beṇə' zan quinga, catə' bžin xne'enə' len biše'e ca'. Na' zitə'ələ gosə'əbeze' gosə'əṇabe' so'elene' le' dižə'.

⁴⁷ Entr beṇə' ca' nitə' choso'ozenague' xtižə' Jeso'osən', toe' gože' Jeso'osən': —Babla' xna'onə' len bišo'o ca' na' nite'e na'ate chse'enene' əso'elene' le' dižə'.

⁴⁸ Nach Jeso'osən' gože' ben' gwna ca': —Nitə' beṇə' yoblə beṇə' zjənaque' ca' xna'anə' na' ca' biša'a.

⁴⁹ Nach bli na' Jeso'osən' blo'e disipl che' ca' na' gože' be'enə': —Beṇə' quinga bazjənaque' ca' xna'a, na' zjənaque' ca' biša'a.

⁵⁰ Can' naquən len notə'atezə beṇə' chso'one' can' chazlažə' Xa' Diozən' ben' zo yoban', zjənaque' ca' xna'a na' ca' biša'a na' ca' zana'.

13

Jempl che beṇə' gozən'

¹ Na' lao ža na'atezə gwza' Jeso'osən' yo'onə' jəchi'e cho'a nisdə'onə'.

² Nach tant beṇə' zan juisy besə'ədobə gan' chi'enə' xte benən byen gwyo'e gwchi'e to lo'o barcon'. Na' yoguə' beṇə' ca' besə'ədobən' gosə'anite'e lao yoxən'.

³ Nach Jeso'osən' bsed blo'ine' lega'aque' len zan jempl. Na' be'elene' lega'aque' to jemplən',

bsaquə'ələbene' xtižə' Diozən' ca trigon'. Nach gwne': —To beṇə' gwze'e zde' güen trigw.

⁴ Na' lao chose' trigon' baḷən jəsə'əchazən cho'a nez, na' bia žia xile'e bia chaš le'e yoban' gwsa'ob len.

⁵ Na' yebaḷən' jəsə'əchazən ga naquə lao yej, na' bitotec bi yo žia lao yejən', de'e na'anə' le'e bla'acten.

⁶ Pero na' catə' beža'achgua besə'əcuadən na' le'e gosə'əbižten, la' bitobi loi gwso'on.

⁷ Na' yebaḷən besə'əgo'oṇən lao yo ga nchixə xsa yešə' na' bla'aquən txen len xsa yešə'anə', na' besə'ələlə' yag yešə' ca' lega'aquən'.

⁸ Na' yebaḷən besə'əgo'oṇən lao yo šao' na' bla'aquən'. Baḷən gosə'əbian to gueyoa güejə, na' yebaḷən gosə'əbian gyon guejə, na' yebaḷən gosə'əbian šichoa güejə.

⁹ Le'e žia nagle de'e chene, legwzenag.

Beṇə' ca' cui gwse'ejle'e che Jeso'osən' bsd blo'ine' lega'aque' len jemplən'

¹⁰ Nach gosə'əbiguə' disipl che Jeso'osən' laogüe'enə' na' gwse'ene': —¿Bixchen' chsed chlo'ido' beṇə' quinga len jempl'?

¹¹ Na' Jeso'osən' gože' lega'aque': —Diozən' chone' par nič le'e nezele de'en cui no gwneze antslə de que le' nabi'e con notə'ətezə beṇə' soe' latjə. Pero beṇə' cui chse'ejle'e xtižə'anə' bito chac se'ejni'ine' de que nabi'e beṇə' soe' latjə.

¹² Notə'ətezə beṇə' choso'ozenague' ca de'en bachzejni'i Diozən' lega'aque', Diozən' gwzejni'ichene' lega'aque' par nič šanch de'en se'ejni'ine'. Pero na' notə'ətezə beṇə' cui

choso'ozenague' che Diozən' ca de'en chsed chlo'ine' lega'aque', Diozən' yeque'e de'en chse'ejni'ine'enə' la'aṇə'əczə latə'əlaszə de'en bagwse'ejni'ine'.

13 De'e na'anə' chsed chlo'ida' beṇə' quinga len jemplan' chedə' chesə'əle'ine' de'en chona' pero bito chsa'acbe'ine' bi zejen, na' la'aṇə'əczə chse'enene' xtiža'anə', bito chse'ejni'ine'en.

14 Len beṇə' quinga bachac complir can' bzoj de'e profet Isaiazən', gan' nan:

De'e li yenele, pero cabi šejni'ile bi zeje de'en yenele.

Na' de'e li le'ile, pero cabi gacbe'ile bi zejen de'en le'ilen'.

15 Beṇə' Izrael quinga cuiczə bi rson chsa'aze', bach nažjoczə yichjla'ažda'oga'aque' na'anə'.

Chse'enene' pero bito chse'ejni'ine' bin' zeje de'en chse'enene'.

Na' chesə'əle'ine' pero cabi chsa'acbe'ine' bi zeje de'en chəsə'əle'ine'enə' chedə' bazjənaque' beṇə' la'aždao' žod.

Žalə' bito zjənaque' beṇə' la'aždao' žod, gwse'ejni'ine' bi zejen de'en chse'enene'enə', na' sa'acbe'ine' bi zeje de'en chesə'əle'ine'enə'.

Gosyə'ədinjljei xtolə'əga'aque'enə', na' gwso'elje' latjə yocobə Diozən' yichjla'ažda'oga'aque'enə' žalə' chse'ejni'ine'en na' žalə' chsa'acbe'ine'en.

16 Pero na' le'e ža, lechgualə mbalaz zole chedə' chle'ile de'e ca' chona' na' chache'ile bi zejen, na' chzenagle xtiža'anə' na' chejni'ilen.

17 De'e li əchnia' le'e, zan de'e profet na' zan de'e beṇə' ca' yeziquə'əchlə beṇə' bosozenag che Diozən' cana' gwse'enene' yesə'əle'ine' de'en chle'ile, pero bitoch golə' yesə'əle'ine'en. Na' gwse'enene' əse'enene' de'en chenele pero bito golə' se'enene'en.

Jeso'osən' gwne' bi zeje jempl che beṇə' güen trigon'

18 Na' le'e legwzenag, quingan' zeje jempl che beṇə' güen trigon'.

19 Xtižə' Diozən' gwxaquə'əleben ca de'en byažən'. Nitə' beṇə' chse'enene' dižə' can' chon Diozən' chnabi'e con notə'ətezə beṇə' chso'e latjə, pero bito chse'ejni'ine'en, na' chžin gwxiye'enə' chonən par ničh cuich choso'ozenague' che xtižə' Diozən'. De'e na'anə' gwxaquə'əlebəga'aque' ca trigon' de'en jesə'əchaz cho'a nezən'.

20-21 Na' nitə' beṇə' chse'ene xtižə' Diozən' na' šložga chesyə'əbeine' chso'one'en chega'aque'. Na' catə' choso'oči' choso'osaguə' beṇə' lega'aque' par ničh cui se'ejle'e xtižə' Diozən', le'e chesyə'əbejyichjtie' cuich choso'ozenague' chei. Na' de'en chso'one'en gwxaquə'əleben ca de'en chac che trigon' de'en besə'əgo'onən lao yej.

22 Le'egatezə ca' naquən len beṇə' ca' chse'ene xtižə' Diozən', pero na' lao mbanga'aque' yežlyo nga, chesyə'əlal chesyə'əžejene' chso'on xmen-dadga'aque' por ni che chse'enene' yesə'əni'e. Pero yoguə' de'en chso'one' chxoayaguən lega'aque', chonən par ničh cui cha'oxen xtižə' Diozən' lo'o yichjla'ažda'oga'aque'enə'. Ca de'en chso'one'enə'

gwxaquə'əleben ca de'en chac che trigon' de'en besə'əgo'oṅən lao yo gan' nchixə xsa yešə'.

23 Pero yebaḷə beṅə' chse'enene' xtižə' Diozən' na' chse'ejni'ine'en na' choso'ozenague' chei. Na' de'en choso'ozenague' che xtižə' Diozən' gwxaquə'əleben ca trigon' de'en besə'əgo'oṅən lao yo šao'. Baḷən gosə'əbian to gueyoa güejə, na' yebaḷən gosə'əbian gyon güejə, na' yebaḷən gosə'əbian šichoa güejə.

Jempl che trigon' na' bgüeyxtil

24 Gwde na' Jeso'osən' gozo'elene' beṅə' ca' yeto jempl, goze'e lega'aque': —Yelə' gwnabia' che Dioz ben' zo yoban' gwxaquə'əleben ca de'e nga goquə. To beṅə' jeze' trigw biṅnə' yoba che'enə'.

25 Na' do še'elə catə' cui no gwsa'acbe'i gwyej to beṅə' contr che' jeze' xsa bgüeyxtil gan' banazə xan' yežlyon' trigon', na' beyož goze' bgüeyxtilən' beze'e.

26 Na' tš'izə bla'aquən, na' trigon' gwzolao chbian. Na' catə' ja'ac xmos xan' trigon', gwsa'acbe'ine' nchixə trigon' len bgüeyxtil.

27 Nach jəya'aque' gan' zo xanga'aque'enə' par jəsyə'əyeže'ene': “Señor, ¿acaguə trigw biṅnə' gozo' yoba chio'onə'? ¿Bixchen' nchixən len bgüeyxtilən'?”

28 Nach xanga'aque'enə' gože' lega'aque': “To beṅə' contr chia'anə' jen ca'.” Nach xmose' ca' gwse'ene': “¿Eche'endo' əlažə'əto' bgüeyxtilən'?”

29 Nach xanga'aque'enə' gože' lega'aque': “Bito əlažə'əlen. La' nxož əlažə'əlente trigon'.

30 Ljoyennə' par na'a. Gwaquə yešə'əcha'on txen, pero na' chona' mendad catə' bagolə yetoble cwsešən', cana' zgua'atec yebele bgüeyxtilən' na'

gonlen bnoĵ par əse'eyən. Nach te na' žĵəyetoble trigon' əgwcuə'aša'olen."

Jempl che xsa moztas

³¹ Gwde na' gozo'elene' beṇə' ca' yeto jempl, gože': —Yelə' gwnabia' che Dioz ben' zo yoban' gwxaquə'əleben ca to xsa moztas de'en gozə to beṇə' yežlyo che'enə'.

³² Xsa moztasən' naquən le'ebeyoža de'e dao' rizə' lao bitə'əchlə semiy. Pero na' catə' chla'an, chcha'ochən ca bichlə yixə' cuan na' chaquən yag cha'o dao'. Na' xte bia ca' zĵəzo xile'e chĵse'en ližda'oga'aquəb lao xoze'e ca'.

Jempl che xna' cuazin'

³³ Nach gozoe' yeto jempl, gozne': —Yelə' gwnabia' che Diozən' ben' zo yoban' gwxaquə'əleben ca xna' cuazin' de'en gwlec no'olən' len to rob yeĵĵ par niĉ becha'o doxenən.

Jeso'osən' bzejni'ine' beṇə' porzə len jempl

³⁴ Yoguə' de'e quinga bsed blo'i Jeso'osən' beṇə' ca' besə'əžag gan' zo'enə'. Bsed blo'ine' lega'aque' porzə len jempl, bitobi bichlə gwne' par bzejni'ine' lega'aque'.

³⁵ Ca' ben Jeso'osən' par niĉ goc complir can' bzoĵ de'e profetən' che', gan' nan: Egwsed əgwlo'iga'acda'ane' porzə len jempl, na' əgwzejni'iga'acda'ane' de'en cui no gwŋeze antslə de'en bgašə' dezd catə'ən gwxe yežlyon'.

Jeso'osən' bzejni'ine' bi zeje jempl che trigon' na' bgüeyxtilən'

³⁶ Na' catə' beyož bsed blo'i Jeso'osən' beṇə' ca' zĵəža' gan' zo'enə', bese'e lega'aque', na' beza'

le' len disipl che' ca'. Na' catə' besyə'əžine' yo'o gan' nite'enə' besyə'əyo'e lo'inə'. Nach gosə'əbiguə' disipl che' ca' cuite'enə' gwse'ene': —Bzejni'išguei neto' bi zejen jempl che xsa bgüeyxtilən'.

³⁷ Nach Jeso'osən' gože' lega'aque': —Quingan' zejen: Diozən' bsele'e nada' golja' beṇach na' gwx-aquə'əlebeda' ca ben' gozə trigw biṇnə'.

³⁸ Na' doxen yežlyo nga gwxaquə'əleben ca yoba gan' goze' trigw biṇnə', na' beṇə' ca' chso'e latjə chnabia' Diozən' lega'aque' gwxaquə'əlebəga'aque' ca trigw biṇnə'. Na' beṇə' ca' chso'e latjə chnabia' de'e gwxiye'enə' lega'aque' gwxaquə'əlebəga'aque' ca xsa bgüeyxtilən'.

³⁹ Gwxiye'enə' gwxaquə'əleben ca beṇə' contrən' gozə xsa bgüeyxtilən' gan' banyaž trigw biṇnə'. Na' žan' gaquə' juisyən' gwxaquə'əleben ca tyempən' yosyo'otobe' trigon'. Na' anglən' zjənaque' ca beṇə' ca' yosyo'otobə cwsešən'.

⁴⁰ Na' can' gac che bgüeyxtilən' yosyo'otobe'en šeyən', can' gaquə' che beṇə' ca' chnabia' de'e gwxiye'enə' lega'aque' catə' əžin ža gaquə' juisyən'.

⁴¹ Diozən' bsele'e nada' golja' beṇach na' catə' əžin žan', nada' əseļa'a angl chia' ca' par yosyo'otobe' yoguə' beṇə' ca' chesə'əgo'oyele'e beṇə' yoblə so'one' de'e malən', na' yosyo'otobte' yeziquə'əchlə beṇə' ca' chso'on de'e malən'. Na' angl ca' yesyə'əbeje' lega'aque' nich cuich nite'e txen len beṇə' ca' bagwso'e latjə chnabia' Diozən' lega'aque'.

⁴² Nach yosə'əsele'e lega'aque' lao yi' gabil gan' se'eye' zejlicaṇe. Na' lao yesə'əžaglaogüe'enə'

yesə'əbežyaše'e na' sa'oyejə leyga'aque'enə'.

⁴³ Na' cana'ach Xancho Diozən' gone' par niçh beṇə' ca' chso'on de'e güennə' nite'e len le' na' əsa'aque' ca yelə' chey che'eni' che bgüižən' catə' yesyə'əžine' yoban' gan' chnabia' Diozən'. Le'e žia nagle de'en chene, legwzenag.

Jempl che mech xen de'en ngašə' to lao yežlyo

⁴⁴ Yelə' chnabia' che Diozən' ben' zo yoban' gwxaquə'əleben ca de'e nga goquə. To beṇə' jəyedi'e mech xen de'e ngašə' to lao yežlyo. Nach bocuaše'en de'e yoblə. Na' de'e tant bebeine' de'en jəyedi'e mechən' nach jəyete'e yoguə'əlöl bi de'e de che' par niçh gwxi'e yežlyon' gan' ngašə' mechən'. Ca mbalazən' gwzo be'enə' can' mbalazən' nitə' beṇə' ca' chso'e latjə chnabia' Diozən' lega'aque'.

Jempl che to perla de'en lechgualə zaqu'e

⁴⁵ Na' yelə' gwnabia' che Diozən' ben' zo yoban' leczə gwxaquə'əleben ca de'e nga goquə. Zo to comersyant beṇə' cha'o chsi' na' cheyote'e perlas de'en lechgualə naquən xoche.

⁴⁶ Na' bželene' to perla de'e lechgualə zaquə'an. Na' leczə beyote'e yoguə'əlölte de'en de che' na' gwxi'e perlan'. Ca'aczən' gwxaquə'əlebe beṇə' ca' chsa'acbe'i de que de'e žialao əso'e latjə nabia' Diozən' lega'aque'.

Jempl che yixjw bel

⁴⁷ Na' yelə' gwnabia' che Diozən' ben' zo yoban' leczə gwxaquə'əleben ca de'e nga goquə. Nitə' balə beṇə' gwxen bel ca' na' boso'ozale'e yixjw bel chega'aque'enə' lo'o nisdə'onə' na' gwxenən yoguə' clas bel ya'a ca'.

48 Nach catə' bagwža' bia zannə' lo'o yixjon', besyə'əbeje' yixjon' yobižlə, na' gosə'əbi'e bia ca' zjənaquə güen par əsa'ogüe', na' gosə'əgüe'eb lo'o žomə ca'. Na' bia ca' cui zjənaquə güen, gosə'očho'one'eb.

49-50 Ca'aczən' gaquə che yoguə' beṇə' catə'an əžin ža gaquə juisyən'. Angl ca' yesə'əbeje' beṇə' mal ca' na' yosə'əzale'e lega'aque' lo'o yi' gabilən' gan' yesə'əbežyaše'e na' sa'oyejə leyga'aque'enə' tant yesə'əžaglaogüe'.

51 Nach Jeso'osən' gože' disipl che' ca': — ĵEzyejni'ile yoguə' de'e ca' bablo'ida' le'e?

Nach gwse'ene': —Zyejni'ito'on Xanto'.

52 Nach Jeso'osən' gože' lega'aque': —Notə'ətezle šə chac chsed chlo'ile Xtižə' Diozən' de'en byoj cana', na' šə leczə chzenagle can' chsed chlo'ida' de que cheyaḷə' güe'ele latjə nabia' Diozən' le'e, nachən' guac əgwšed əgwlo'ile beṇə' chopten. Na' gwxaquə'əlebele ca to xan yo'o beṇə' napə yoguə' de'en chyažj chchine family che'enə'.

Jeso'osən' beyeje' Nasaretən'

53 Nach catə' beyož be'elen Jeso'osən' disipl che' ca' jempl ca', beze'e latjən' len disipl che' ca'.

54 Na' beyeje' Nasaretən' gan' gwcha'ogüe'. Na' jəyesed jəyelo'ine' beṇə' ca' lo'o yo'odao' chęga'aque'enə'. Na' lechguale besyə'əbanene' len xtiže'enə', na' gwse'e ljuežjga'aque': —ĵNacxa goquən' ņezene' de'e ca' de'en naquə de'e sin'? na' ĵnacxa chac chone' miḷagr ca' chone'?

55 Nombi'achone', la' naque' xi'in carpinterən'. Na' xne'enə' naque' no'olən' le' Maria. Nombi'acho

beṇə' biše'e Jacobən', Jwsen', Simonṇə' na' Jo-
dasən'.

⁵⁶ Na' lecəə beṇə' zane' ca' nitə' lažcho nga. ¿Nacxa
chaquən' cho'e dižə' ca' ža, na' chacte choe' miḷagr?

⁵⁷ Na' de'en gwso'one' xbab de que Jeso'osən'
naque' con to beṇə' gwlaž čhega'aque', de'e na'anə'
bito gwse'ejle'e čhe'. Nach gože' lega'aque': —
La'anə'əczə beṇə' zan chse'ejle'e čhe beṇə' ca' chso'e
xtižə' Diozən' na' chso'e lega'aque' yelə' bala'an,
beṇə' gwlaž čhega'aque' ca' na' family čhega'aque'
ca' bito chse'ejle'e čhega'aque'.

⁵⁸ Na' Jeso'osən' bene' con to čhopzə miḷagr
Nasaretən' čhedə' bito gwse'ejle'e čhe'.

14

Quingan' goquə got Juan ben' bčhoa beṇə' nis

¹ Na' ca nan' Erodən' ben' naquə gubernador čhe
Galilean', benene' dižə' ca' naquə yoguə'əloḷ de'e
güen de'en chon Jeso'osən'.

² Nach gože' xmose' ca': —Bengan' de'e Juannə'
ben' bčhoa beṇə' nis. Babebane' ladjo beṇə' guat
ca' na' de'e na'anə' chac chone' miḷagr ca'.

³⁻⁴ Quingan' goquə gwso'ote' Juannə': Erodən'
beque'e Erodiasən' ca' xo'ole', len Erodiasən'
naque' xo'olə Lip biše'enə'. Na' Juannə' gože'
Erodən': “Malən' beno' beca'o no'ol čhe beṇə'
bišo'on par naque' xo'olo'.” Na' de'en gož Juannə'
Erodən' ca' de'e na'anə' Erodən' bene' mendad
gosə'əzene' Juannə' na' gosə'əgüe'ene' ližya na'
bosə'əcheje' ni'ane'e ca' gden.

⁵ Erodən' gone'ene' gote' Juannə', pero bitobi
benene' le' čhedə' bžebe' bi so'on beṇə' ca'
gwse'ejle'e čhe Juannə' de que cho'e xtižə' Diozən'.

6 Pero na' catə' gwso'one' lni ža la Erodən', bi'i no'ol che Erodiasən' bya'abo' lao beṇə' ca' gwnitə' lniṇə'. Na' lechguale bebei Erodən' can' bembo'onə'.

7 Na' tant beyazlažə' Erodən' can' bya'a no'ol güegon', bzoe' jorament de que əgwnežjue'ebo' bitə'ətezə əṇabebo' le'.

8 Na' por consejw che xna'abo'onə' gožbo' Erodən': —Beṇ nada' ṇa'atec ṇa'a yichj Juannə' ben' chchoa beṇə' nis žian to lao plat.

9 Na' gwzo Erodən' trist catə' beyož gož no'ol güegon' le' ca', pero na' ca' naquə babzoe' jorament len lebo' lao beṇə' ca' zjənaquə combidən', benšaze' mendad gaquə can' gwṇabe no'ol güegon' le'.

10 Ca' goquən' bene' mendad jəsə'əchogue' yen Juannə' lo'o ližya gan' yo'enə'.

11 Na' boso'ožie' yichj de'e Juannə' to lao plat par jso'en lao bi'i no'olan' na' bnežjwbo'on xna'abo'onə'.

12 Nach disipl che de'e Juannə' jəsyə'əxi'e cuerp che'enə' na' jəsə'əcuaše'en. Gwde na' ja'aque' gan' zo Jeso'osən' na' jse'eže'ene' can' bagoquən'.

Jeso'osən' bguaogüe' gueyə' mil beṇə'

13 Na' catə' bene Jeso'osən' can' goquə che de'e Juannə', beze'e latjən' len disipl che' ca' na' besyə'əyo'e to lo'o barcw par jəya'aque' latjə dašən' de'en de yešla'alə nisdə'onə'. Na' beṇə' ca' ža' yež ca' zjəchi' galə'əzə nisdə'onə' gwse'enene' rson galən' bazjəda Jeso'osən'. Na' gwsa'aque' lažga'aque'enə' ja'aque' yobižlə jəsə'əšague' Jeso'osən' yešla'alə nisdə'onə'.

14 Na' catə' bžin Jeso'osən' cho'a nisdə'onə', ble'ine' beṇə' zan ca' na' beyašə' beži'ilaže'e lega'aque'. Na' beyone' yoguə' beṇə' ca' chsa'acšene.

15 Na' catə' bachal, gosə'əbiguə' disipl che' ca' laogüe'enə', na' gwse'ene': —Zocho to latjə ga cui no nla', na' bagwde or par gaocho xgüe. Bselə' beṇə' quinga yež ca' de'en zjəchi' galə'əzə par nič žjəsə'ədilje' de'e se'ej əsa'ogüe'.

16 Na' Jeso'osən' gože' lega'aque': —Bito cheyalə' žjəya'aque'. Le'e güe'ega'aque' de'e se'ej əsa'ogüe'.

17 Nach gwse'ene': —Chopga bel ya'a chechon' de na' gueyə'əga yetxtil.

18 Nach Jeso'osən' gože' lega'aque': —Le'e žjəxi'in ni.

19 Nach ben Jeso'osən' mendad gosə'əbe' beṇə' zan ca' lao yixye daquə'anə'. Na' gwxi'e yetxtil ca' gueyə' na' bel ya'a ca' chopə. Na' bgüe' yobalə be'e yełə' choxcwlen che Diozən'. Gwde na' bzoxye'en nach bnežjue'en disipl che' ca' par gosə'əyise' che che beṇə' ca'.

20 Na' yogue'e gwsa'ogüe'en xte ca gwse'eljene'. Nach pedas ca' de'en besyə'əga'anə', bosyo'otobe'en, na' goquən šižin žomə.

21 Na' beṇə' ca' gwsa'o yetxtilən' naquə ca do gueyə' mil beṇə' byo cui cuent no'olə na' cui cuent bidao'.

Jeso'osən' gwze'e tlaonisda'onə'

22 Gwde na' Jeso'osən' bene' mendad yesyə'əyo'o disipl che' ca' lo'o barcon' par yesyə'əbialaogüe' yesyə'əlague'e yešla'alə nisdə'onə' žlac bega'an le' bzeine' beṇə' zan ca' dižə'.

23 Na' beyož bzei Jeso'osən' beṇə' ca' dižə', gwloe' to lao ya'a par jene' orasyon toze'. Dezd golte gwzo tozə Jeso'osən' lao ya'anə'.

24 Na' ca naquə barcon' gan' zesyə'əyo'o disipl che' ca', bazdan gwcholte nisdə'onə', nžiguə'əxaxj

nisən' len chedə' chas chatə' nisdə'onə' por ni che
chečh̄j be'enə' clelə.

²⁵ Na' do šbaḷ beyetj Jeso'osən' ya'anə' na' gwze'e
tlaō nisdə'onə' par gwyeje' galən' zja'ac disipl che'
ca'.

²⁶ Na' catə' besə'əle'i disipl che' ca' le' zde' lao
nisdə'onə', lechguale besə'əžebe' xte gwso'osye'e
gosə'əne': —iTo beṇə' guat chle'icho chda tlaō
nisən'!

²⁷ Na' le'e bolgüizte Jeso'osən' lega'aque', gože': —
Leyebei. Nada'anə'. Bito žeble.

²⁸ Nach Bedən' gože'ene': —Xanto', šə le le'enə',
gwna nada' sa'a tlaō nisdə'onə' yida' gan' zo'onə'.

²⁹ Nach gož Jeso'osən' le': —Da Bed.

Na' le'e bchojte Bedən' lo'o barcon' na' gwzolao
gwze'e tlaō nisdə'onə' par zde' gan' zo Jeso'osən'.

³⁰ Pero na' catə' gocbe'ine' ca fuertən' chečh̄j
be'enə', bžebe' na' gwzolao chyše'e lo'o nisən'.
Nach bisye'e gože' Jeso'osən': —Xana', bosla nada',
bachetja' xan nisən'.

³¹ Na' le'e blite na' Jeso'osən' bexe'ene'. Nach
gože' Bedən': —Bixchen' gocžejlažo'o? Gwyejle'ech
chia'.

³² Na' catə' beyo'o Jeso'osən' len Bedən' lo'o bar-
con', le'e gwlezte be'enə'.

³³ Na' beṇə' ca' ža' lo'o barcon' gwso'elaogüe'e
Jeso'osən', gwse'ene': —De'e liczə len' naco' Xi'in
Diozən'.

*Jeso'osən' beyone' beṇə' chsa'acšene beṇə' nitə'
Genesaret*

³⁴ Nach gwza'ach barcon' xte bžinən cho'a
nisdə'onə' to latjə de'en nzi' Genesaret. Na'
besyə'əchoje' lo'o barcon'.

³⁵ Na' beṇə' ža' do Genesaretən' besyə'əyombi'e Jeso'osən', na' bosə'əsele'e rson yoguə' yež ca' de'en zjəchi' galə'əzə de que Jeso'osən' babžine' lažga'aque'enə'. Na' beṇə' ca' ža' yež ca' gosə'əče'e yoguə' beṇə' chsa'acšene lao Jeso'osən'.

³⁶ Nach gosə'əṇabene' Jeso'osən' šə güene'ene' yesə'əgane' lox xadoṇ che'enə'. Na' yoguə' beṇə' ca' gosə'əgan len besyə'əyaquene'.

15

Dižə' de'en chchoj cho'achon' chonən manch la'ažda'ochon'

¹ Na' balə beṇə' fariseo ca' na' beṇə' ca' choso'osed choso'olo'i lei de'en bzoj de'e Moizezən' gwsa'aque' Jerosalennə' na' besə'əžine' gan' zo Jeso'osən', na' gwse'ene':

² —¿Bixchen' disipl chio' ca' bito chesə'ənaogüe' costombr ca' de'en bosyo'ocua'anlen de'e xaxta'ocho ca' chio'o? ¿Bixchen' cui chosyo'one'e zan las antslə ze'e sa'ogüe' can' chonto'?

³ Nach Jeso'osən' gože' lega'aque': —Ca naquə le'e ža, ¿bixchen' chbejyichjle cui chonle can' non Diozən' mendad goncho na' con naozechle costombr chelen'?

⁴ Diozən' none' mendad can' goncho, gwne': “Le'e gwnežjo yelə' bala'an xaxna'ale”, na' “Notə'atezle šə chžia chnitə'ale xaxna'ale cheyalə' gatlē.”

⁵ Pero le'e nale de que šə beṇə' əṇe' de que babnežjue' Diozən' mech o bien de'en cheyalə' əgwnežjue' xaxne'enə' par gaquəlene' lega'aque', na' bitoch bi cheyalə' əgwnežjue' xaxne'e.

6 Na' de'en chonle ca', bachonle lei che Diozən' ca to de'e cui bi bi zaque'e niĉ ca' naozechle costombr ĉhelen'.

7 Le'e nacle beṇə' goxoayag. Chonle cayaṇə'ən bzoj de'e profet Isaiazən' ĉhele, gan' nan:

8 Beṇə' Izrael ca' chesə'əne' de que nada' Diozən' chso'elaogüe'e,
pero caguə do lažə'əga'aque'en chso'elaogüe'e nada'.

9 Bitobi zejen de'en chso'elaogüe'e nada' ĉhedə' la' choso'osed choso'olo'ine' beṇə' costombr de'en gwsa'aljlažə' beṇəĉhən'.

10 Nach Jeso'osən' bozolgüiže' beṇə' zan ca' zjənžaguəṇ' par niĉ gosə'əbigue'e laogüe'enə', na' gože' lega'aque': —Legwzenag de'e nga əṇia' le'e niĉ šejni'ilen'.

11 Bito ṇacho de que de'en che'ej chaochon' chonən manch la'ažda'ochon'. Echnia' le'e, dižə' de'en chchoj cho'alen', lenṇə' chonən manch la'ažda'olen'.

12 Nach gosə'əbiguə' disipl ĉhe Jeso'osən' laogüe'enə' gwse'ene': —ĵEbito gocbe'ido' de que beṇə' fariseo ca' lechguale besə'əže'e catə' gwse'enene' xtižo'onə'?

13 Na' Jeso'osən' gože' lega'aque': —Gwžin ža catə' Xa' Diozən' ben' zo yoban' gwžiyi'e yoguə'əloḷ beṇə' cui choso'ozenag ĉhe'. Egwžiyi'e lega'aque' can' choncho catə' chlažə'əcho yixə' ca' chla'ac lo'o yel.

14 Ljosə'əye beṇə' fariseo ca'. Zjənaquəga'aque' ca to beṇə' lĉhol beṇə' chene'ene' cue'e nez yeto beṇə' lĉhol. Chso'onczə yichjlaoga'aque' cui choso'ozenague' ĉhe Diozən' na' choso'osedene'

beṇə' de'en cui naquə de'e li. Nezecho de que beṇə' l̥chol̥ən' bito gaquə cue'e nez yeto beṇə' l̥chol̥ la' txennə' ž̥jəsə'əbix̥e' to lo'o yech.

15 Nach Bedən' gože' Jeso'osən': —Bzejni'išguei neto' bi zejen de'en gwnao' de que de'en che'ej chaochon' bito chonən manch la'ažda'ochon'.

16 Nach gož Jeso'osən' lega'aque': —¿Elecza lenle bito chejni'ile de'e quinga bagwnia' le'e?

17 ¿Ecabi nezele de que yoguə' de'en che'ej chaochon' ch̥jche'en lo'o le'echon' na' ch̥žin or cheden?

18 Pero əchnia' le'e, yoguə' dižə' de'en cho'echon' chəsə'əchojən yich̥jla'ažda'ochon', na' šə cho'echo dižə' malən', len chso'onən manch yich̥jla'ažda'ochon'.

19 Na' lo'o yich̥jla'aždao' beṇəch na'anə' chchoj yoguə' xbab mal quinga, ca de'en nan so'ote' beṇə', na' nan yoso'ogo'o xtoga'aque', na' nan yesə'əbejyich̥j no'ol ch̥ega'aque' o ben' ch̥ega'aque' par yesyə'əzolene' beṇə' yoblə na' nan yesə'əbanga'aque' bi de che beṇə', na' nan so'onlažə'əga'aque', na' nan yoso'ožia yoso'onite'e ljuežj beṇəchga'aque'.

20 Xbab mal ca' zjənac ca' chso'onən manch yich̥jla'ažda'ochon'. Na' bito əṇacho de que de'en cui chona'acho zan las antslə ze'e gaocho chonən manch yich̥jla'ažda'ochon'.

To no'olə cui naque' beṇə' Izrael chonlilaže'e Jeso'osən'

21 Beza' Jeso'osən' latjən' len disipl che' ca' par ja'aque' galə'əzə gan' mbane Tiro na' Sidon.

22 Na' to no'olə beṇə' cui naquə beṇə' Izrael, gwze'e gan' mbane Tiro na' Sidon par jəšague'

Jeso'osən'. Na' gwŋe' zižjo gože' Jeso'osən': —Xana', le' naco' xi'in dia che de'e Rei Dabin'. Beyašə'əšguei neto'. To bi'i no'olə chia' yo'o yaz to de'e xio' lo'o yičjla'ažda'obo'onə' na' lechguale chžaglaobo'.

²³ Pero Jeso'osən' bito boži'e xtižə' no'olən'. Nach disipl che Jeso'osən' gosə'əbigue'e cuite'enə' na' gwsa'atə'əyoine' le' gwse'ene': —Bosa'ašga no'olən' la' con naogüe' chio'o na' chatə'əyoine' le' zižjo par gaquəleno'one'.

²⁴ Nach Jeso'osən' gože' lega'aque': —Diozən' bsele'e nada' gaquəlena' nasyon Izrael na'azən', la' lega'aque' gwxaquə'əlebəga'acquene' ca xilə' dao' bia zjənaquəžeje.

²⁵ Nach no'olən' bgüigue'e bzo xibe' lao Jeso'osən', na' gože'ene': —Xana' go'onšguei goclen neto'.

²⁶ Na' Jeso'osən' gože'ene': —Bito naquən güen yeca'acho yelə' guao che xi'incho na' əgwnežjwchon gao xicoda'ocho.

²⁷ Na' gocbe'i no'olən' bsaquə'əlebe Jeso'osən' beŋə' ca' cui zjənaquə beŋə' Izrael ca beco', nach gože'ene': —Leiczədo' Xana'. Pero xicocho ca' gaaquə əsa'ob pedas de'e chesə'əxopə lao yon'.

²⁸ Nach Jeso'osən' gože'ene': —No'olə, lechguale chonlilažo'o nada'. Gaaquəlencza' le' can' che'endo'.

Na' lao or na' beyaque xi'in no'olən'.

Jeso'osən' beyone' beŋə' zan beŋə' chsa'acsene

²⁹ Gwde na' Jeso'osən' na' disipl che' ca' besa'aque' latjən' na' gwso'e nezən' de'en zda tcho'a nisdəo' Galilean'. Nach gwse'epe' to lao ya'a na' jesə'əchi'e lao ya'anə'.

30 Na' besə'əžin beṇə' zan lao ya'a gan' zo Jeso'osən' len disipl che' ca'. Zjənche'e no beṇə' coj, na' no beṇə' lchol, na' no beṇə' mod, na' no beṇə' nchog ni'ana'aga'aque', na' zjəlen beṇə' chse'i gwde gwde yižgüe' na boso'onite'e lega'aque' lao Jeso'osən'. Na' Jeso'osən' beyone' yogue'e.

31 Na' lechgualē besyə'əbane beṇə' ca' catə' besə'əle'ine' can' ben Jeso'osən' beyone' beṇə' ca'. Besyə'əbanene' can' besyə'əṇe beṇə' mod ca', na' besyə'əyaque beṇə' ca' zjənchog no ni'ana'aga'aque'enə', na' besyə'əda beṇə' coj ca', na' besyə'əle'i beṇə' lchol ca'. Nach yoguə'əlol beṇə' ca' gwso'elaogüe'e Diozən'.

Jeso'osən' bguaogüe' tap mil beṇə'

32 Gwde na' Jeso'osən' goxe' disipl che' ca' na' gože' lega'aque': —Lechgualē cheyašə'əda beṇə' quinga. Bagoc šonə ža nite'e nga len chio'o, na' bitobi de de'e sa'ogüe'. Na' bito che'enda' yosa'aga'aca'ane' sin cui sa'ogüe' par nič cui yesyə'əcholene' tnezən'.

33 Nach disipl che' ca' gwse'ene': —Gan' zocho nga naquən to latjə ga cui nono nla'. ¿Gaxa əželecho de'e əsa'o yoguə' beṇə' zan quinga?

34 Nach Jeso'osən' gože' lega'aque': —¿Balə yetxtil chechon' de?

Nach gwse'ene': —Gažga yetxtil dao' zjəde na' to chopga bel ya'a dao'.

35 Nach Jeso'osən' bene' mendad yesə'əbe' beṇə' ca' lao yon'.

36 Na' gwxi'e yetxtil dao' ca' gažə na' len bel ya'a dao' ca', nach be'e yelə' choxcwlen che Diozən'.

Gwde na' bzoꝓje'en bnežjue'en disipl che' ca' par gwso'e che yoguə' beṇə' ca'.

³⁷ Na' yogue'e gwsa'ogüe' xte ca gwse'eljene'. Nach pedas ca' de'en besyə'əga'annə' bosyə'otobə disipl ca' len, na' goquən gažə žomə.

³⁸ Na' beṇə' ca' gwsa'o yetxtilən' naquə tap mil beṇə' byo, bito cuent no'olə na' bito cuent bidao'.

³⁹ Nach Jeso'osən' bose'e beṇə' ca'. Gwde na' gwyo'e to lo'o barcw len disipl che' ca' na' ja'aque' distrit gan' nzi' Magdala.

16

Gosə'əṇabene' Jeso'osən' gone' to de'e yesə'əle'ine' le'e yoban'

¹ Na' goquən' balə beṇə' fariseo ca' na' beṇə' sadoseo ca' gosə'əbigue'e gan' zo Jeso'osən'. Na' gosə'əṇabe' gone' to milagr de'en yesə'əle'ine' le'e yoban' de'en gwsa'aque'ne' cui gaquə gone'.

² Nach Jeso'osən' gože' lega'aque': —Catə' chle'ile nlatjəcha le'e yoban' še'elə nach nale: “Goža'a gwꝓe chedə' nlatjəcha.”

³ Na' šə chi' bejw catə'ən che'eni' nach nale: “Guaquə zag, la' chi'ichgua bejw.” Beṇə' goxoayag le'e. Nezele šə guaquə zag o šə guaquə zeyə' catə'ən chle'ile nac naquə le'e yoban', pero cabi chacbe'ile bi zeje de'e ca' chon Diozən' tyemp nga zocho ṇa'a.

⁴ Le'e mbanle ṇa'a lechuale beṇə' la'aždao' mal nacle, na' bagwlejyichjle Diozən'. De'e na'anə' chṇable gona' to de'e le'ile le'e yoban' par nič ənezele šə Diozən' bsele'e nada'. Pero bito gona' can' chṇablenə'. De'en gon Diozən' len nada'

par ničh ənezele de que le'enə' bsele'e nada' gwx-aquə'əleben ca de'en bene' len de'e Jonasən' ben' be' xtižə' Diozən' cana'.

Na' beyož gwna Jeso'osən' ca', beze'e len disipl che' ca' gan' nitə' beṇə' ca'.

De'en chsed chlo'i beṇə' fariseo ca' na' beṇə' sadoseo ca' gwxaquə'əleben ca xna' cuazin'

⁵ Na' catə' besə'əžine' yešla'alə nisdao' Galilean', disipl che' ca' gwsa'acbe'ine' de que gwsa'anlaže'e yetxtil de'en əsa'ogüe'.

⁶ Nach Jeso'osən' gože' lega'aque': —Legapə cuidad len xna' cuazi che beṇə' fariseo ca' na' che beṇə' sadoseo ca'.

⁷ Pero disipl che' ca' bito gwse'ejni'ine' bi zeje de'en gože' lega'aque' ca', nach gwse' ljuěžjga'aque': —Gwne' ca' chedə' gonlažə'əcho gua'acho yetxtilən'.

⁸ Na' Jeso'osən' gocbe'ine' xbab de'en chso'one', nach gože' lega'aque': —¿Bixchen' chonle xbab che yetxtilən' de'en gonlažə'əle? ¿Ecabi ne'e šeje'ele de que napa' yelə' guac par guaogua' le'e?

⁹ ¿Ebito chejni'ile bi zeje milagr ca' chona'? na' ¿əbagonlažə'əle can' bguaogua' gueya'a mil beṇə' byo len gueyə'əzə yetxtil dao'? ¿Ena' leczə bito za'alažə'əle do baļə žomə pedas yetxtil ca' betoble de'en besyə'əga'an'?

¹⁰ Na' ¿chexa tapa mil beṇə' byo ca' bguaogua' len gažə yetxtil dao'? ¿Eza'alažə'əle baļə žomə pedas yetxtil can' betoble gwde besyə'ədaogüe'enə'?

¹¹ ¿Bixchen' con benle xbab che yetxtilən' catə'an gwnia' le'e gaple cuidad len xna' cuazi che beṇə' fariseo ca' na' che beṇə' sadoceo ca'?

12 Nach disipl che' ca' gwsa'acbe'ine' de que Jeso'osən' caguə bi'e dižə'an ca' che xna' cuazin' de'en chəsə'əchine' par checha'o yetxtilən' sino bi'e dižə'an ca' par ničh cui yoso'ozenague' che de'en choso'osed choso'olo'i beṇə' fariseo ca' na' beṇə' sadoseo ca'.

Bedən' gwne' che Jeso'osən' de que Diozən' bsele'ene' par gaquəlene' nasyon Izraelən'

13 Jeso'osən' len disipl che' ca' ja'aque' gan' mbane to syoda de'en nzi' Sesarea de Filipo. Nach Jeso'osən' gože' lega'aque': —De'e li Diozən' bsele'e nada' golja' beṇəch. Pero ¿bi chesə'əna beṇə'? ¿non' naca' nada'?

14 Nach gwse'ene': —Bale' chesə'əne' de que naco' de'e Juan ben' bchoa beṇə' nis. Na' yebale' chesə'əne' de que naco' Liaz ben' be' xtižə' Diozən' cana'. Na' yebale' chesə'əne' de que naco' de'e profet Jeremias, o de que naco' yeto' beṇə' be' xtižə' Diozən' cana'ate.

15 Nach gože' lega'aque': —Chexa le'e, ¿bi nale non' naca' nada'?

16 Simon Bedən' gože'ene': —Len' naco' Crist ben' gwlej Diozən' par gaquəleno' nasyon chechon', na' naco' Xi'in Dioz ben' zo zejlicane.

17 Nach Jeso'osən' gože'ene': —Simon xi'in Jonas, mbalaz zo' de'en gwnao' de'e ca'. Notono beṇəch bzejni'i le' de'e ca', tozə Xa' Diozən' ben' zo yoban', le'enə' babzejni'ine'en le'.

18 Na' nada' ənia' de que len' lio' Bed na' zejen dižə' yej. Na' can' nao' chejli'o chia' gwxaquə'əleben ca to yej gual de'e gaquə gwchincho par lan yo'o. Na' nada' yetoba' beṇə' zan beṇə' se'ejle'e de que naca' Xi'in Dioz can' chejli'o chia'

par niḥ ca' əsa'aque' tozə yoso'ocodə' l̥juežje' so'elaogüe'e nada'. Na' bitobi gaquə so'on de'e x̥io' ca' par niḥ əžin ža catə' cuich no so'elao' nada'.

19 Na' gona' lao na'o zgua'atec le' go'o xtiža'anə' len beṇə' zan par niḥ əso'e latjə ṇabia' Diozən' lega'aque', Dioz ben' zo yoban'. Na' lecə gaquən lao na'o yo'o beṇə' ca' yoso'ocodə' l̥juežje' so'elaogüe'e nada' bin' naquə güen so'one' na' ye'ega'aco'one' bi de'e ca' cui naquə güen so'one'. Na' Diozən' əgwzejni'ine' le' naquən' ye'ega'aco'one' par niḥ ca' yediḷən len de'en na Diozən'.

20 Nach Jeso'osən' bene' mendad len lega'aque' de que ni toe' cui əso'e dižə' de que le' na'anə' naque' Crist ben' gwleḷ Diozən' par gaquəlene' ṇasyon ḥechon'.

Jeso'osən' gwduxjue'ine' disipl ḥe' ca' de que so'ot beṇə' le'

21 Na' ža na' Jeso'osən' gwzolaogüe' bsd blo'ine' disipl ḥe' ca' de que cheyalə' šeje' Jerosalennə' na' gaque' lao na' beṇə' golə blao ḥe ṇasyon Izrael ḥechon', na' lao na' b̥xoz əblao ḥecho ca', na' lao na' beṇə' ca' choso'osed choso'olo'i lei de'en bzoḷ de'e Moisezən'. Na' gwne' de que yoguə' beṇə' ca' de'e zan de'e yosə'əchi' yosə'əsaque'e le' na' əso'ote' le'. Pero na' yeyon ža yebane' ladjo beṇə' guat ca'.

22 Nach Bedən' gwleje' Jeso'osən' latə' dao' ca'alə na' gože'ene': —Xana', Diozən' gaquəlene' le'. Bitoczə gac ḥio' de'e quinga nao' nga.

23 Pero na' Jeso'osən' gwyeḥje' bgüie' Bedən' na' gože' gwxiye'enə' de'en chnabia' yiḥjla'aždao' Bedən': —Gwchi'ižə' ca'alə Satanas.

Nach gože' Bedən': –Bito che'endo' gona' can' non Diozən' mendad gona'. Chono' xbab che de'en chacdo' gaquən güen na' bito chono' xbab naquən' chene'e Diozən' gaquə.

²⁴ Gwde na' Jeso'osən' gože' disipl che' ca': – Notə'atezle šə che'enele gonlilažə'əle nada' na' gwzenagle chia' cheyalə' əchoj yichjle de'en chene'ele gon cuinle par nič gonle con can' chene'e Diozən' na' bitobi gaquele che de'en chi' saquə'əle, la'anə'əczə šə so'ot beṇə' le'e to le'e yag coroz con gonlilažə'əle nada'.

²⁵ Notə'atezə beṇə' chaquene' gone' par nič cui chi' saque'e o par nič cui no so'ot le', be'enan' cuiayi'. Na' notə'atezə beṇə' chsanlažə' cuine' chi' saque'e o so'ot beṇə' le' por ni chia', be'enan' əbane' zejlicane.

²⁶ Bitobi de'e güen gaquə che to beṇə' la'anə'əczə nabi'e doxen yežlyon' šə cuiayi'e zejlicane, la' bitə'atezə de'e gatə' che', bito gaquəlenən le' par nič cui cui'ayi'e zejlicane.

²⁷ Diozən' bsele'e nada', golja' beṇač, na' catə' yida' yežlyo nga de'e yoblə nsa'a yelə' chey che'eni' che Xa' Diozən' na' chi'a angl chia' ca', cana'ach gona' par nič to to beṇačən' nite'e mbalaz o yesə'əzi'e castigw segon de'e gwso'on to toga'aque'.

²⁸ Diozən' bsele'e nada' golja' beṇač. Na' de'e li chnia' le'e, balle cabinə' gatle catə'ən le'ile nada' yida' de'e yoblə par yedəlo'a yelə' gwnabia' chia'anə'.

17

Jeso'osən' goque' ca to de'e chey che'eni'

1 Gwde xop ža gwna Jeso'osən' de'e ca', gwche'e Bedən' len Jacobən' na' Juan beṇə' bišə' Jacobən', ja'aque' to lao ya'a sibə.

2 Na' lao nite'e lao ya'anə' beža' can' goquə Jeso'osən', beža'ateczə cho'alaogüe'enə' na' gwyey gwye'eni'in ca'aczən' chac bgüižən', na' xalane'enə' beyaquən šyiš xilə' ca'aczə be'eni'.

3 Na' goquən lao nite'enə' conczə besə'əle'ine' de'e Moizezən' len profet Liazən' ben' gwzo cana', na' chso'elene' Jeso'osən' dižə'.

4 Nach Bedən' gože'ene': —Xanto', güenchgua zochona nga ṇa'a. ¿Egüe'endo' gonto' šonə ranš? ton par le', na' ton par Moizezən' na' yeton par Liazən'.

5 Ne'e cho'ete' dižə'anə' catə'əczla to bejw de'en chactit bcuašə'an lega'aque', na' lo'o bejon' gwse'enene' gwna Diozən': —Benga Xi'ina' ben' chacchgüeida' chei. Cheba chezaquə'əlaža'a len le'. Che le'enə' le'e gwzenag.

6 Na' catə' gwse'ene' disipl ca' dižə' ca' lechgualə besə'əžebe', xte jesə'əchaze' goscho'alə lao yon'.

7 Nach bgüiguə' Jeso'osən' bxoə ne'enə' yichjga'aque'enə', na' gože': —Leyeyas. Bito žeble.

8 Na' catə' besyə'əgüie'enə', notono no nochlə besə'əle'ine' sino tozə Jeso'osən'.

9 Na' gwde na' lao chesyə'əyetje' ya'anə', gož Jeso'osən' lega'aque': —Ni tole cui güe'ele dižə' che de'en bable'ile xte catə'əch bagwso'ot beṇə' nada' na' yebana' ladjo beṇə' guat ca', nada' naca' ben' bsələ' Diozən' golja' beṇəch.

10 Nach disipl che' ca' gwse'ene': —Beṇə' ca' choso'osed choso'olo'i lein' choso'osedene' neto' de que zgua'atec profet Liaz ben' gwzo cana' cheyalə'

yide' lao yežlyo nga de'e yoblə antslə ze'e yidə ben' əselə' Diozən' par gaquələne' nasyon chechon'.
 ¿Bixchen' chəsə'əne' ca' ža?

11 Nach Jeso'osən' gože' lega'aque': —De'e liczə chəsə'əne' de que zgua'atec yidə profet Liazən' de'e yoblə ben' gwzo cana' par yeyone' yoguə'əlol de'e cheyalə' yeyac.

12 Pero na'a chnia' le'e de que babidə ben' bedəyen can' ben profet Liazən', na' beṇə' Izrael gwlaž checho ca' bito gwsa'acbe'ine' de que le' naque' ben' naquən yidə. Na' gwso'onene' le' con can' gwse'enene' na' gwso'ote'ene'. Na' ca'aczən' so'one' len nada', Diozən' bsele'e nada' golja' beṇəch.

13 Nach gwsa'acbe'i disipl che' ca' de que Jeso'osən' cho'e dižə' che de'e Juannə' ben' bchoa beṇə' nis.

Jeso'osən' beyone' to bi'i chaz šon

14 Na' catə' besə'əžine' gan' zjənžag beṇə' zan, to beṇə' bšague' Jeso'osən' na' bzo xibe' laogüe'enə'. Na' gože'ene':

15 —Xana' beyašə'əlažə'əšguei xi'ina' nga. Chazbo' šon na' lechgualə chžaglaobo' len len. Na' zan las bajchazbo' lao yi' na' leczə ca' zan las babxopbo' lo'o nis.

16 Bajoa'abo' lao disipl chio' ca', pero bito gwsa'aque' yesyə'əyone'ebo'.

17 Nach Jeso'osən' gože' beṇə' ca' ža'anə': — Le'e chonle clelə na' naljele. ¿Bixchexaczxan' cui chejle'ele chia'? Bachac šša zoa' napa' yelə' chx-enlažə' len le'e. ¿Batxan' šejle'ele chia'?

Nach gože' xa bida'onə': —Doa' bi'i chio'on ni.

18 Nach Jeso'osən' gwdile' de'e xio'onə' yo'o yaz yichjla'aždao' bida'onə' par niçh bechojən yichjla'ažda'obo'onə'. Na' lao or na' beyaquebo'.

19 Na' gwde goc de'e ca', gosə'əbiguə' disipl che Jeso'osən' gan' zoe' toze', na' gwse'ene': — ¿Bixchexacxan' cui goquə yebejto' de'e xio'onə' yichjla'aždao' bida'onə'?

20 Jeso'osən' gože' lega'aque': —Bito goquə yebejlen chedə' bito gwyejle'ele de que Diozən' gaquəlene' le'e. Xsa yag moztasən' naquən de'e dao' rizə'. Na' de'e li chnia' le'e la'anə'əczə šə de'en chonlilažə'əle Diozən' gwxaquə'əleben ca to xsa moztasən' laogüe de'en cuiṇə' gonlilažə'əchgualene' guac ye'ele ya'a nga: “Gwde gwzo de'e na'ate”, na' gaquə can' chonle mendadən'. Bito bi bi de de'e cui gaquə gonle con šə chejle'ele de que Diozən' chaclene' le'e.

21 Na' par niçh yebejle de'e xio' ca' de'en zjənaquə ca de'en bebeja' yichjla'aždao' bi'inə', cheyalə' co'o gwchejle cui ye'ej gaole na' gontezə gonle orasyon.

De'e yoblə gwdixjue'e Jeso'osən' de que so'ot beṇə' le'

22 Na' lao zjezda' Jeso'osən' len disipl che' ca' do gan' mbane Galilean', Jeso'osən' boszenene' lega'aque' de'en ze'e gac che', gwne': —Diozən' bsele'e nada' golja' beṇach, na' gaca' lao na' beṇə'

23 na' so'ote' nada'. Pero na' yeyon ža yosban Diozən' nada' ladjo beṇə' guat ca'.

Nach disipl che' ca' catə' gwse'enene' xtiže'enə', lechgualē gwnite'e trist.

Jeso'osən' gwdixjue' impuest che yo'odao'

24 Na' catə' besyə'əžine' Capernaunnə', balə beṇə' ca' chəsə'əchixjue' impuest de'en chəsə'əyixjw to to beṇə' byo Izrael ca' par gast che yo'odao' əblaonə' ja'aque' lao Bedən'. Na' gwse'ene': —Ca naquə maestr chelenə', ħəgwyixjue' impuest che yo'oda'onə'?

25 Nach gož Bedən' lega'aque': —Gwyixjue'en.

Gwde na' Jeso'osən' len disipl che ca' gwso'e lo'o yo'onə'. Nach Jeso'osən' le'e gožte' Bedən': —ĤBi xbab chono', Bed? Ca naquə rei ca' nitə' yežlyo nga chesə'anabi'e na' chso'one' byen chesə'əyixjw beṇə' che impuest. ĤNon' chəsə'əchixjue'en ža? Ĥfamily chega'aque' o šə beṇə' yoblə?

26 Nach Bedən' gože'ene': —Chəsə'əchixjue' beṇə' yoblə.

Nach Jeso'osən' gože' Bedən': —Beṇə' zjənaquə family chega'aque' ca' bitobi chəsə'əyixjue'. Na' ca naquə chio'o ža, naccho xi'in Rei ben' zo yoban' na' bito cheyalə' chixjwcho impuest che yo'oda'onə'.

27 Pero na' par niĥ notono no so'on xbab de que choncho contr yo'odao' əblaonə', chixjwcho impuestən'. Gwyej cho'a nisda'onə', na' gwzalo'o yixjw beļ chio'onə', na' beļ nech bian' seno' lo'o cho'ab na' əželdo' to mech. Na' yeyoxo'on žjətixjo' impuest chechon'. Gwdiləczən par chixjwcho impuest che chopcho.

18

Gwsa'acyožə disipl che' ca' noe' naquəch blaoch

1 Na' ca orən' gosə'əbiguə' disipl che Jeso'osən' cuite'enə', na' gwse'ene': —Entr neto' Ĥnoto'

gaquæchto' blao catə'an Diozən' ben' zo yoban' gone' par niçh solao nabi'o?

² Na' Jeso'osən' goxe' to bidao' na' bzeche'ebo' laoga'aque'enə'.

³ Na' gože' lega'aque': —De'e li əchnia' le'e, notə'atezle šə bito əgwša' xbab çhelen' par əgwzəxjw yichjle lao Diozən' can' chon bidao' nga chzəxjw yichjbo' lao xaxna'abo', bito gaquə sole len nada' catə' Diozən' ben' zo yoban' gone' par niçh solao nabi'a.

⁴ Na' notə'atezle šə babeyacle ca bidao' nga laogüe de'en chzəxjw yichjle lao Diozən', banacle beṇə' blao len nada' catə' Diozən' ben' zo yoban' gone' par niçh solao nabi'a.

⁵ Na' notə'atezle šə chonle güen len notə'atezə bidao' ca bi'i nga laogüe de'en chaquale chia', chonczle güen len nada'.

Nxož əxopcho goncho de'e mal

⁶ Probchguazə ben' chon par niçh əxopə to beṇə' chonlilažə' nada' gone' de'e mal, la'anə'əczə ben' əxopə bitotec bi zaque'e len beṇəçhən'. Nca'alə xneze žalə' əgwchej yene'enə' to yej yišə na' žjəxope' lo'o nida'onə' na' gate', cle ca soe' əxope' beṇə' gone' de'e malən'.

⁷ Probchguazə le'e de'e zan de'e zjəde yežlyo nga de'e chso'on par niçh gonle de'e mal. Bito nacho de que bitobi de de'e so'on par niçh əxopə le'e bachonlilažə'əle nada'. Pero probchguazə beṇə' chon ca əxopə beṇə' yoblə gone' de'e malən'.

⁸ Na' de'e na'anə' əchnia' le'e, šə de'en chonle len ni'ana'alen' chonən par niçh əxople gonle de'e malən' güenchlə žalə' əçhog ni'ana'ale ca' na'

čho'onl̄en cle ca əxople gonl̄e de'e mal̄ən'. Nca'al̄ə x̄n̄eze nacle beṇə' na' chog o beṇə' coj yežinl̄e lao Dioz̄ən' na' əbanl̄e zejlic̄ane cle ca cuiayi'ilenl̄en txen lao yi' gabil̄ən'.

⁹ Na' šə de'en chle'ile len jelaole chon̄ən par nič əxople gonl̄e de'e mal̄ən' yejni'al̄ə žal̄ə cuejl̄enn̄ə' na' čho'onl̄en, čhedə' nca'al̄ə x̄n̄eze nacle beṇə' l̄choł yežinl̄e yoban' gan' zo Dioz̄ən' na' əbanl̄e zejlic̄ane, cle ca' cuiayi'ilenl̄en txen lao yi' gabil̄ən'.

Jempl čhe xil̄ə' bian' goquəžje

¹⁰ Le'e gon xbab čhe beṇə' chso'onl̄ilažə' nada' beṇə' cuit̄ec bi zjəzaquə' len beṇə'ch̄ən', par nič cui gonl̄e len not̄ə'əteze' ca beṇə' cui bi bi zjəzaque'e. Chnia' le'e, angl ca' chapə chye' lega'aque' nit̄ə'ətezo nite'e lao X̄a' Dioz̄ən' yoban' gan' zo'enə'.

¹¹ Na' ca naca' nada', Dioz̄ən' bsele'e nada' golja' beṇə'ch̄ par nič zed̄alo'ida' beṇə' ca' bachəsə'əbiayi' de que nži'ilažə'a lega'aque'. Bsele'e nada' par gona' ca cui žjəya'aque' lao yi' gabil̄ən' šə so'onl̄ilažə'e nada'.

¹² Na' chnia' le'e, šə nit̄ə' to gueyoa xil̄ə' čhele na' gaquəžje tob, žəcabi yocua'anl̄e bia ca' tapl̄alj̄ t̄gualj̄ do lao ya'a gan' zjəža'ab na' žjəyedilj̄le bian' goquəžjenə' xte ca yeželeleb?

¹³ Na' əchnia' le'e, cat̄ə' yeželeleb, yebeichele de'en beželob̄ən' clezə' can' chebeile len bia ca' tapl̄alj̄ t̄gualj̄ cui gwsa'acžje.

¹⁴ Ca'aczə' naquən len beṇə' ca' chso'onl̄ilažə' nada' beṇə' cuit̄ec bi zjəzaquə' len beṇə'ch̄ən'. X̄acho Dioz̄ ben' zo yoban' bit̄o chene'ene' cuiayi' ni toga'aque'.

Cheyaḷə' yezi'ixencho che beṇə' bišə'ačo beṇə' chso'onlilažə' Diozən'

15 Šə to beṇə' bišə'əle beṇə' bachonlilažə' Diozən' chone' de'e malən' contr to le'e, tozle šejle žje'elenlene' dižə' can' naquə de'en chone'enə' par nič yediṇjene'en, na' šə čhaze' rson che dižə' de'en žje'elenlene' yezoe' binlo len Diozən' de'e yoblə.

16 Pero na' šə bito čhaze' rson ca dižə' de'en žje'elenlene', güench ače'ele yeto o yečhopə beṇə' bišə'əle par nič əsa'aque' testigw de que dižə' šao' bagotə'əyoile ben' yoša' xbab che'enə'.

17 Na' šə bitoczə gwzenague' chele, le'e güe' dižə' ca naquə de'en chone' lao yoguə'əle ncodə' ljuežjle cho'ela'ole Diozən'. Na' šə ni que gwzenagcze' chele, cuich gonlene' cuent entr le'e ncodə' ljuežjle cho'ela'ole Diozən'. Pero legon cuent de que naque' txen beṇə' ca' cui chso'onlilažə' Diozən', na' naque' txen len yeziquə'əchlə beṇə' ca' chso'on de'e malən' can' chonle xbab che beṇə' gočhixjw ca'.

18 De'e li chnia' le'e, bitə'ətezə de'e əgwxia' le'e ncodə' ljuežjle cho'ela'ole Diozən' par əṇale naquən güen so'on beṇə' ca' əsa'ac txen len le'e, leczə can' əṇa Diozən' ben' zo yoban'. Na' bitə'ətezə de'e əgwxiale əṇale cui naquən güen so'one', leczə can' əṇa Diozən' ben' zo yoban'.

19 Na' leczə ca' chnia' le'e, šə čhople gwxi-ale bin' əṇable lao orasyonṇə', le'e nitə'əle yežlyo nga, Xacho Diozən' ben' zo yoban' goncze' de'en əṇablenə'.

20 Na' gan' nžag čhopə šonle cho'ela'ole nada, zocza' txen len le'e.

21 Nach Bedən' bgüigue'e gože' Jeso'osən': — Xana', šə beṇə' ljuežja' chone' de'e mal len nada'

tapteli, ¿bal las cheyalə' yezi'ixena' che'? ¿azelao do gaž las?

22 Nach Jeso'osən' gože'ene': —Bito nia' de que cheyalə' yezi'ixenle che' zelao do gaž las. Pero de'en chnia' le'e, bito gonle cuent do bal las yezi'ixenle che beṇə' ljuežjen', con le'e yezi'ixentezə che' yoguə' laste.

Jempl che mosən' ben' cui bezi'ixen che de'en chalə' ljuežje'

23 Na'a ža, yelə' gwnabia' che Diozən' ben' zo yoban' gwxaquə'əleben ca de'e nga goquə. Zo to rei ben' chsa'alə' xmose' ca' xmeche'enə'. Na' gone'ene' gone' cuent len lega'aque'.

24 Na' catə' gwzolaogüe' bezi'e cuent che to toga'aque', zgua'atec bžin to xmose' ben' chalə' zan millon pes.

25 Na' mosən' bito bi xmeche' gotə' par yonežjue'en rein'. De'e na'anə' bene' mendad ta'oga'aque' len xo'olen', na' len xi'inga'aque' ca' na' len doxen de'e zjədeine' par nič gaquə yosyo'onežjue' de'en chsa'alə'e che rein'.

26 Nach mosən' bzo xibe' lao rein' gotə'əyoine' le', gože'ene': “Xana', gwdapəšga yelə' chxenlažə' len nada', na' yeyona' de'en chala'a chio'onə'.”

27 Nach rein' beyaše'ene' le' na' bezi'ixene' che doxen de'en chala'enə' na' bsane' le'.

28 Pero na' catə' bechoje' liž rein', le'e bežagte' yeto mos beṇə' chalə' che' to chop pes. Nach le'e bñizte' yene'enə' gože'ene': “Yeyono' de'en chalo'o chia'an na'atec na'a.”

29 Nach mos ljuežjen' bzo xibe' laogüe'ena', gože'ene': "Gwdapəšga yelə' chxenlažə' čhia' na' yeyona' doxen de'en čala'a čhio'onə'."

30 Pero na' mos nechən' bito bzenague' che mos ljuežje'ena', le'e gwyejte' jene' mendad gosə'əyixjue'ene' ližya xte ca gatə' de'en yonežjue' che'ena'.

31 Na' mos ca' yela' catə' besə'əle'ine' can' ben mos nechən', lechguale gwnite'e trist. Na' ja'aque' lao rein' jse'eže'ene' yoguə'əlol can' goquə'.

32 Nach rein' goxe' mos nechən' laogüe'ene' de'e yoblə, na' gože'ene': "Le' naco' to mos malchgua. Nada' bezi'ixena' che doxen de'en čalo'o čhia'anə' la' gotə'əyoido' nada' yezi'ixena' čhio'.

33 ¿Bixčhen' cui beyašə'əlažo'o mos ljuežjo' ben' čale'e čhio'onə' can' beyašə'əlaža'a le'?"

34 Na' de'e tant bža'a rein' bene'ene' lao na' benə' ca' par gosə'əyixjue'ene' ližya gan' əžaglaogüe' xte catə'əch bade de'en čale'e che rein'.

35 Nach Jeso'osən' gože' disipl che' ca': —Can' gon Xa' Diozən' ben' zo yoban' gone' castigw che notə'ətezle cui chezi'ixenle che ljuežjle do yichj do lažə'əle bitə'ətezə de'en chso'onene' le'e.

19

Bito yela'acho be'en čecho o no'ol čecho par solencho beṇə'yoblə

1 Na' Jeso'osən' catə' beyož gwne' de'e ca', beze'e Galilean' na' gwłague'e yao Jordannə' par beyeje' gan' mbane Jodean'.

2 Na' beṇə' zan jəsə'ənaogüe'ene', na' beyone' beṇə' ca' chsa'acšene.

3 Na' beṇə' fariseo ca' ja'aque' gan' zo'enə' cḥedə' gwse'ene' yesə'əbeje'ene' dižə' de'e yesə'əchine' contr le', nach gwse'ene': —¿Ede lsens par to beṇə' nšagna' yele'e xo'ole' šə bitə'ətezə de'en chone' cui cho'olažə' be'en cḥe'enə'?

4 Nach gože' lega'aque': —Bablabczle can' nyoj Xtižə' Diozən' nan de que cata'an gwxe yežlyon' Diozən' bene' beṇə' nech ca' beṇə' byo na' no'olə.

5 Na' gwna Diozən': “Beṇə' byonə' le'e xaxne'e par əgwšagne'e si'e to no'olə na' beṇə' ca' yoso'ošagna'anə' əsa'aque' tozə.”

6 Bitoch əsa'aque' cḥopə beṇə', sino que əsa'aque' tozə beṇə'. De'e na'anə' notono zaquə' yole'e lega'aque' la' Dioz nan' banone' lega'aque' tozə cuerp.

7 Nach gwse'ene': —Šə ca' ža, ¿bixcḥexan' ben de'e Moisezən' mendad catə' to beṇə' yele'e no'olə cḥe'enə', cheyalə' cḥas to act ga güe'en dižə' de que besyə'əle'enə'?

8 Jeso'osən' gože' lega'aque': —De'e Moisezən' be'e latjə yela'a no'ol cḥelen' cḥedə' nacle beṇə' yicḥjla'aždao' žod. Pero catə' Diozən' bene' beṇə' nech ca', bito ṇacho gwyazlaže'e yesyə'əla'aga'aque'.

9 Echnia' le'e, notə'ətezə beṇə' chela'a no'ol cḥe'enə' par yeque'e no'olə yoblə, len ṇezene' de que no'ol cḥe'enə' bito naque' to no'olə go'o xtoi, tozəczə ca malən' chon be'enə' len de'en chon beṇə' chgo'o xtoe'. Na' notə'ətezə beṇə' yošagna'alene' to no'olə beṇə' bela'a ben' cḥei le', lecə tozəczə ca malən' gone' len de'en chon be'enə' chgo'o xtoe'.

10 Nach disipl cḥe' ca' gwse'ene': —Šə can' naquən cḥe beṇə' byon' na' no'olən' naplən cuent

cui no no gwšagna'.

¹¹ Jeso'osən' gože' lega'aque': —Caguə yoguə' beṇə' chse'ejni'ine' de'e ngan' sino beṇə' ca' babzejni'i Diozən' lega'aque' bi zejen.

¹² Nitə' beṇə' cui nan yosə'ašagne'e čhedə' gwsa'alje' zjənaque' beṇə' gūiž, na' leczə nitə' beṇə' cui yosə'ašagne'e laogüe de'en bazjənon beṇə' lega'aque' gūiž. Na' leczə ca' nitə' beṇə' cui chesə'ašagne'e par nič əso'elažə'ače' so'one' ca əsa'anch beṇə' ca' əso'e latjə nabia' Dioz ben' zo yoban' lega'aque'. Le'e gwzenag che de'en bagwni'anə' šə baben Diozən' par nič chejni'ilen.

Jeso'osən' bene' orasyon par bidao' ca'

¹³ Na' ja'ac beṇə' əjsə'e bidao' lao Jeso'osən' par nič əxoə ne'enə' yichjga'acbo'onə' na' gone' orasyon par lega'acbo'. Pero disipl che' ca' gosə'ədile' beṇə' ca' zjənche' bidao'.

¹⁴ Nach Jeso'osən' gože' disipl che' ca': —Le'e güe' latjə la'ac bidao' ca' laogua' nga, na' cui əgwžonle. Na' əchnia' le'e beṇə' ca' chəsə'əzəxjw yichjga'aque' lao Diozən' ca' bidao' ca' chəsə'əzəxjw yichjga'acbo' lao xaxna'aga'acbo', lega'acze'enə' chso'e latjə chnabia' Diozən' lega'aque'.

¹⁵ Na' catə' beyož gwxoə na' Jeso'osən' yichjga'acbo'onə', bene' orasyon par lega'acbo', nach gwyeje' ga yoblə.

Beṇə' güego' ben' goquə beṇə' gwni'a be'elene' Jeso'osən' dižə'

¹⁶ Na' goquən' to beṇə' güego' bžine' gan' zo Jeso'osən', na' gože'ene': —Maestr, le' naco' beṇə' güen, gwna nada' bi de'e güennə' cheyalə' gona' par gatə' yelə' mban zejlicane chia'.

17 Jeso'osən' boži'e xtiže'ənə', gože'ene': — ¿Bixchen' nao' de que beṇə' güen nada'? Dioz nan' naque' le'ezelaogüe beṇə' güen. Pero na' šə che'endo' gatə' yelə' mban zejlicane chio'onə', cheyalə' gono' can' na lei de'en bzoj de'e Moisezən'.

18 Nach be'ənə' gože' Jeso'osən': —¿Noxan' de'e ca' nan ža?

Nach Jeso'osən' gože'ene': —Cui gotle beṇə', cui co'o xtole na' cui cuejyichj be'en chele o no'ol chele par solenle beṇə' yoblə, cui cuanle, bito gacle testigw fals contr sa'aljuežjle.

19 Le'e əgwnežjo yelə' bala'an xaxna'ale, na' legaque che sa'aljuežjle can' chaquele che cuinle.

20 Nach beṇə' güegon' gože' Jeso'osən': —Yoguə'əloł de'e quinga chzenaga' chei dezd xcuidə'ətia'. ¿Bixa de'en chaquəch falt gona' ža?

21 Jeso'osən' gože'ene': —Šə de'e liczə che'endo' gaco' cayaṇə'an chene'e Diozən', jəyeyetə' bi de'e de chio', na' mech de'en le'ido' che de'e ca' bnežjon beṇə' yašə' nach da len nada'. Na' catə' yežino' yoban' gan' zo Diozən', so' mbalaz.

22 Pero na' beṇə' güegon' beyož benene' can' gož Jeso'osən' le', beza'achoe' trist chedə' la' to beṇə' gwni'achguan'.

23 Gwde na' gož Jeso'osən' disipl che' ca': —De'e li chnia' le'e, zdebəchgua naquən par to beṇə' gwni'a güe'e latjə nabia' Diozən' le'.

24 Na' lecza chnia' le'e, zdebəchlə naquən che to beṇə' gwni'anə' güe'e latjə nabia' Diozən' le' cle ca to camey teb to lo'o nag yešə'.

25 Na' besyə'əbanchgüei disipl che' ca' can' gwne'enə', nach gosə'əne': —Notono gaquə yechoj xni'a de'e malən' šə ca'.

26 Jeso'osən' bgüie' lega'aque' nach gože': —Ni to beṇaḥ cui gaquə yebej cuine' xni'a de'e malən', pero Diozən' chaque'. Le' chac chone' bitə'ətezə.

27 Nach Bedən' gože' Jeso'osən': —Neto' bagwlejyichjto' family cheto' ca' na' len yoguə'əlol de'en deito' par chzenagto' chio'. ¿Bi de'e güen gaquə cheto' laogüe de'en bagwlejyichjto' family cheto' ca' na' len de'en deito'?

28 Jeso'osən' gože' lega'aque': —De'e li chnia' le'e Diozən' bsele'e nada' golja' beṇaḥ na' catə' yocobe' yežlyon', nada' cui'a gan' chey che'eni' na' nabi'a, na' yoguə' le'e chonlilažə'əle nada' cue'ele cuita'anə' na' nabi'ale txen len nada'. Na' le'e šižinle nabi'ale family ca' šižin, beṇə' ca' zjənaquə xi'in dia che de'e Izraelən'.

29 Na' notə'ətezle šə de'en chzenagle chia' bagwlejyichjle ližle, o bišə'əle, o zanle, o xaxna'ale, o xo'olle, o xi'inle, o yežlyo chele, Diozən' goṇe' le'e de'e zaquə'əche clezə ca de'e ca' na' beṇə' ca' gwlejyichjle. Na' leczə gon Diozən' par niḥ əbanle zejlicane.

30 Na' beṇə' zan beṇə' zjənaquə blao ṇa'a gwžin ža catə' cuich əsa'aque' beṇə' blao. Na' beṇə' zan beṇə' cui zjənaquə blao ṇa'a, gwžin ža catə' əsa'aque' beṇə' blao.

20

Jempl che beṇə' güen žin ca'

1 Nach bossed boslo'i Jeso'osən' lega'aque', gwne': —Yelə' gwnabia' che Diozən' ben' zo yoban' gwxaquə'əleben ca de'e nga goquə. To beṇə' napə to güert gan' ža'achgua yag obas. Na' gwze'e liže'en to zil tempran gwyeje' gan' chac ya'anə', jtilje' mos par so'one' žin lo'o güert che'enə' žanə'.

2 Na' catə' beyož gosə'əxenlažə' mos ca' de que to denario chixjue' to toga'aque' con ca chac mosən' tža žin, nach bsele'e lega'aque' lo'o güert gan' so'one' žinṇə'.

3 Nach do cheda ga gozeje' gan' chac ya'anə', na' ble'ine' nitə'əch beṇə' cui bi bi žin de so'one'.

4 Na' gože' lega'aque': “Ležja'ac lo'o güert chia'anə' ležjen žin na' chixjwca' le'e.” Nach ja'ac beṇə' ca'.

5 Na' gozeje' de'e yoblə gan' chac ya'anə' do gobiž, nach yeto do cheda šonə, na' bezle'ine' nitə' beṇə' cui bi bi žin de so'one'. Nach bozsele'e lega'aque' par so'one' žin lo'o güert che'enə'.

6 Na' ca do cheda gueyə' še'elə gozeje' de'e yoblə. Na' bezle'iczene' beṇə' zeznite'e cui bi bi žin de so'one', nach goze'e lega'aque': “¿Bixchen' cui ja'acle güen žin?”

7 Nach gwse'ene': “Notono no gwna neto' güen žin.” Nach goze'e lega'aque': “Le'e žja'ac le'e gon žin lo'o güert chia'anə'. Na' chixjwca' le'e.” Nach ja'ac beṇə' ca'.

8 Na' catə' bžin or yosa'a xan güertən' xmose' ca', nach gože' mos əblao che'enə': “Beyax beṇə' güen žin ca' par chixjwga'aco'one', solaoteco' chixjo' beṇə' ca' bla'ac bzebe, na' yeyožlo' len beṇə' ca' bla'ac nechte.” Nach ben mos əblaon' can' ben xane'enə' mendad.

9 Gwdixjue' zgua'atec beṇə' ca' gosə'əzolaogüe'

gwso'one' žin cheda guejə' še'elə tgüejə denario to toga'aque'.

¹⁰ Na' catə' gwdixjue' beṇə' ca' gosə'əzolao chso'on žinnə' temprante, gwsa'aque' beṇə' ca' de que chixjoche' lega'aque' de'e scha'och laogüe de'en gosə'əzolaogüe' chso'one' žinnə' temprante. Pero tozəczə can' gwdixjue' yoguə'əloltega'aque'.

¹¹ Na' catə' beyož gosə'əzi' laxjw beṇə' ca' gosə'əzolao žinnə' temprante, gwsa'ade'e xan žinnə' dižə'.

¹² Na' de'e tant chesə'əloque' toe' gože' xan žinnə': "Bedo žanə' bžaglaochguato' lao de'e zeyə'an bento' žin chio'onə'. Na' tozəczə can' gwdixjo' neto' len beṇə' ca' bla'ac bzebe, len yetor güejgan' gwso'one' žinnə'."

¹³ Pero na' xan žinnə' gože' be'enə': "Migw chia', bitobi de'e mal chona' contr le'e. ¿Ecaguə tratən' bencho de que to denario chixjua' to tole?"

¹⁴ Laxjon' bagwxi'o, guaquə yeyejo'. Bagwdixjua' beṇə' ca' con can' go'onda' la'aṇə'əczə bla'aque' bzebe.

¹⁵ ¿Bixchen' chacxi'ido' nada' ni che de'en naca' beṇə' güen? Lao na'an naquən gona' con can' che'enda' len de'en deida'."

¹⁶ Nach Jeso'osən' gože' beṇə' ca' bosə'əzenag jemplən': —Can' naquən, nitə' beṇə' bito zjənaque' beṇə' blao na'a pero gwžin ža catə' əsa'aque' beṇə' blao. Na' nitə' beṇə' zjənaque' beṇə' blao na'a, pero leczə gwžin ža catə' lega'aque' bitoch əsa'aque' beṇə' blao. Diozən' chaxe' yoguə'əlol beṇə' par se'ejle'e che', pero balgue'en choso'ozenague' che', na' lega'acze' chque'e ca xi'ine'.

De'e yoblə gosyixjue'e Jeso'osən' de que so'ot beṇə'

le'

17 Jeso'osən' na' zan disipl che' ca' zja'aque' par Jerosalennə'. Na' lao zjəngüe'e nezən' Jeso'osən' gwleje' partlə disipl che' ca' šižinənə' na' gože' lega'aque':

18 —Diozən' bsele'e nada' golja' benach, na' na'a šejcho Jerosalennə' gan' gaca' lao na' bχoz əblao ca' na' lao na' benə' ca' choso'osed choso'olo'i lein', na' yesə'əçhoglaogüe'en chia' de que so'ote' nada'.

19 Na' liczə so'one' nada' lao na' benə' ca' cui zjənaquə benə' Izrael gwlaž checho par so'one' nada' borl, na' yesə'əyine' nada' yid sot, nach tenə' yosə'əde'e nada' le'e yag corozən', pero na' yeyon ža yebana' ladjo benə' guat ca'.

Xna' Jacobən' na' Juannə' gwṇabe' yesə'əbe' xi'ine' ca' cuit Jeso'osən' gan' nabi'enə'

20 Na' ja'ac xi'in Sebedeon' Jacobən' len Juannə' na' len xna'aga'aque'enə' lao Jeso'osən'. Na' xna'aga'aque'enə' bzo xibe' lao Jeso'osən' gože'ene': —Chṇabda' le' to goclen.

21 Nach Jeso'osən' gože'ene': —¿Bi goclennə' che'endo' gona'?

Nach xna'aga'aque'enə' gože'ene': —Che'enda' gono' par niç xi'ina' quinga yesə'əbi'e šla'a güejə cuito'on catə' əžin ža nabi'o nasyon chechonə'.

22 Jeso'osən' gože' Jacobən' len Juannə': —Bito chache'ile bi de'en chṇabele nada'. ¿Eguaquə saquə'əzi'ile can' saquə'əzi'anə'? ¿Egwzoile gaquə chele can' gaquə chia'anə'?

Nach bosyo'oži'e xtiže'enə' gwse'ene': —Gwzoito'.

23 Nach Jeso'osən' gože' lega'aque': —De'e liczə chi'i saquə'əle can' chi'i saca'anə', na' de'e liczə

gaquə c̄hele can' gaquə c̄hia'anə', pero bito naquən par ə̄nia' nada' non' cue' cuitan' catə'an ə̄žin ža nabi'a. Tozə X̄a' Diozən' bagwleje' beṇə' ca' yesə'əbe' cuita'anə'.

24 Nach disipl ca' yeši catə' gwse'enene' can' gosə'əna disipl ca' c̄hopə besə'əže'e lega'aque'.

25 Nach Jeso'osən' goxe' yogue'e par niçh gosə'əbigue'e laogüe'enə', na' gože' lega'aque': — Nezecho nitə' beṇə' gwnabia' na' beṇə' blao c̄he to to nasyon, na' la fuers chesə'anabi'e beṇə' nitə' xni'aga'aque'.

26 Pero caguə can' cheyalə' gonle. Šə no le'e chene'ele gacle beṇə' blao, cheyalə' əgwzəxjw yichjle gaquəlenle ljuežjle.

27 Na' šə no le'e chene'ele gacle xen entr ljuežjle, cheyalə' gon cuinle ca xmos beṇə' ca' yela'.

28 Diozən' bsele'e nada' golja' beṇəch, na' caguə bida' par niçh beṇəchən' sa'aclene' nada', sino que bida' par gaquəlena' beṇəchən', na' par əgwnežjo cuina' chixjua' xtolə' yoguə'ələl beṇəchən' catə'an so'ote' nada'.

Jeso'osən' bene' par niçh c̄hopə beṇə' lçhol besə'əle'ine'

29 Na' beṇə' zan jəsə'ənaogüe' Jeso'osən' len disipl c̄he' ca' catə'an besa'aque' syoda Jericon'.

30 Na' c̄hopə beṇə' lçhol zjəchi' cho'a nezən' galən' zjəyeda Jeso'osən'. Catə' gosə'ənezene' de que Jeso'osən' chedie' laoga'aque'enə' nach gosə'əne' zižjo, gwse'e Jeso'osən': — X̄anto', len' naco' xi'in dia c̄he de'e Rei Dabin'. Beyašə'əlažə'əšguei neto'.

31 Nach beṇə' ca' chesyə'əde laoga'aque'enə' gosə'ədile' lega'aque' par niçh nite'e žizə. Pero

nachle gosə'əne' zižjochlə gosə'əne': —Xanto', len' naco' xi'in dia che de'e Rei Dabin'. Beyašə'əlažə'əšguei neto'.

³² Jeso'osən' gwleze' gan' nite'ənə', nach goxe' lega'aque' par gosə'əbigue'e laogüe'ənə'. Nach gože' lega'aque': —¿Bin' chene'ele gona' len le'e?

³³ Nach gwse'ene': —Xanto' benšga par ničh yele'ito'.

³⁴ Jeso'osən' beyašə'əlaže'e lega'aque' na' gw-dane' jlaoga'aque'ənə', nach le'e besyə'əle'iteine', na' jəsə'ənaogüe' Jeso'osən'.

21

Gwso'elaogüe'e Jeso'osən' catə' beyo'e Jerosalennə'

¹ Na' lao zja'ac Jeso'osən' len disipl che' ca' Jerosalennə' besə'əžine' Betfage, gan' zo ya'a de'en nzi' Olibos galə'əzə Jerosalennə'. Na' Jeso'osən' gwleje' čhopə disipl che' ca',

² na' gože' lega'aque': —Le'e žja'ac yež dao' de'en chi' de'e na' na' žjəti'ile to borr bia no'olə da'ab yag na' nche'ete to xi'in da'ob. Na' gwsežle xna'abən' na' əche'eleb nga len xi'in da'obən'.

³ Na' šə bi ye'e beṇə' le'e, na' ye'elene': “Xanto' nan' chyažjene' lega'acquəb.” Na' le'e desyə'əsantecze'eb len le'e.

⁴ Goc ca' par ničh goc complir can' bzoj de'e profet Zequerian' ben' be' xtižə' Diozən' cana' gwne':

⁵ Gož beṇə' ca' nitə' Jerosalennə':

“Le'e ggüiašč baza' Rei chelen'.

Žie' cožə' borr da'onə' ca to beṇə' cui naquə beṇə' blao.”

6 Na' ja'ac disipl ca' yež dao' de'en gož Jeso'osən' lega'aque' ca', na' gws'o'one' can' ben Jeso'osən' mendad.

7 Na' besyə'əche'e borrən' len xi'inəbən' lao Jeso'osən', na' besə'əxo'a no xaga'aque' cožə'əga'aque'bən', nach gwžia Jeso'osən' bia da'onə' par gwyeye' Jerosalennə'.

8 Na' lao nez gan' zde'enə' beṇə' zan gws'o'ela'ogü'e Jeso'osən' bos'o'šiljue' no xaga'aque'enə' par niç blej borrən' len na' leczə gosə'əchogue' no xozə' yag de'e nitə' tcho'a nezən' na' bosə'ənite'en lao nezən'.

9 Na' beṇə' zan gosə'əbialao lao Jeso'osən' na' leczə beṇə' zan jəsə'ənao le'. Nach yogue'e gosə'əgü'e be' lban che' gosə'əne': —¡Lechguale beṇə' güen be'enga, naque' xi'in dia che de'e Rei Dabin'! Sošga Rei chechon' mbalaz ben' baza' nga bselə' Xancho Diozən' le'. Ledoye'ela'oche' txen len beṇə' ca' nitə' gan' zo Diozən'.

10 Na' catə' bžin Jeso'osən' Jerosalennə' yoguə' beṇə' ca' ža' syodan' besyə'əbanene', na' gosə'əne: —¿Noxa bengā bla' nga?

11 Na' beṇə' ca' nžag Jeso'osən' catə'ən bežine' lao' syoda Jerosalennə' bosyo'oži'e xtižə'əga'aque'enə' gwse'e: —Benga Jeso'os beṇə' za' Nasaret gan' mbane Galilean' na' cho'e xtižə' Diozən'.

Jeso'osən' bebeje' beṇə' ca' chso'on ya'a yo'odao' əblao che beṇə' Izrael ca'

12 Na' gwyey Jeso'osən' yo'odao' əblao che chio'o beṇə' Izrael na' bebeje' yoguə' beṇə' ca' chso'on ya'a chyo'onə'. Nach gwlo'oni'ane'e mes che beṇə' ca' choso'oša' mech, na' leczə ca' bene' len yag siy che beṇə' ca' chso'otə' ngolbexə.

13 Gwde beyož bene' ca' gože' lega'aque': — Nyojczən can' gwna Diozən' gwne': “Che'enda' yesə'əna beṇə' de que liža'an naquən to latjə gan' so'on beṇə' orasyon”, pero na' le'e babenlen ca to latjə gan' ža' beṇə' bguan.

14 Na' beṇə' lchol ca' na' len beṇə' coj ca' gosə'əbigue'e lao Jeso'osən' žlac gwzoe' lo'o yo'odao'onə'. Nach beyone' lega'aque'.

15 Pero na' bχoz əblao ca' na' beṇə' ca' choso'osed choso'olo'i lei de'en bzoj de'e Moisezən' lechguale besə'əže'e catə' besə'əle'ine' miłagr ca' de'en ben Jeso'osən'. Na' leczə besə'əže'e catə' gwse'enene' can' gwso'elao' bi'i xcuidə' ca' Jeso'osən' yo'odao' əblaonə', de'en gosə'ənabo': “iLechguale beṇə' güen be'enga, naque' xi'in dia che de'e Rei Dabin'!”

16 Nach gwse'e Jeso'osən': —¿Ezendo' bin' gosə'əna bi'i xcuidə' ca'?

Jeso'osən' boži'en gože' lega'aque': —Zenda'. ¿Ecabi za'alažə'əle can' nyoj Xtižə' Diozən' de'en gož de'e Rei Dabin' Diozən', nan:

Le' babeno' par nič bi'i xcuidə' na' bi'i cho'a nižə' ca' chso'ela'obo' le' can' chazlažo'o?

17 Nach bechoje' gan' nitə' beṇə' ca', na' beze'e syodan'. Na' že' na' jəyega'aṇe' Betania len disipl che' ca'.

Ben Jeso'osən' par nič bgüiž yag yixgüion'

18 Na' zil beteyo besa'aque' Betanian' jəsyə'aque' Jerosalennə' de'e yoblə. Na' lao zesyə'əngüe'e nezən' gwdon Jeso'osən'.

19 Na' ble'ine' to yag yixgüio zon cho'a nezən' na' gwyeje' jəgüie' šə žian yixgüion'. Pero bitobi bželene', con zlega xlague'e žia. Nach gože'en: — Caneque cuich bi bi yixgüion' cuio'.

Na' lao or na' le'e bgüižten.

²⁰ Catə' besə'əle'i disipl che' ca' can' goquən', besyə'əbanene', nach gwse'ene': —¿Bixchen' le'e bgüižte yaguən'?

²¹ Na' Jeso'osən' gože' lega'aque': —De'e li əchnia' le'e, šə do yichj do lažə'əle chonlilažə'əle Diozən' na' bito chac chop lažə'əle, guaquə gonle can' babena' par nič bgüiž yaguən'. Na' leczə ca' guaquə gonle par nič ya'a nga žjəyezə lo'o nisdə'onə'.

²² Na' šə chonlilažə'əcho Diozən' do yichj do lažə'əcho, bitə'ətezə de'en ənabechone' lao orasy-onnə', goncze'en chio'o.

Yelə' gwnabia' che Jeso'osən'

²³ Nach, Jeso'osən' gozeje' yo'odao' əblaonə' de'e yoblə par jəsəd jəlo'ine' beṇə' ca'. Na' balə beṇə' fariseo ca' na' yebalə beṇə' choso'osed choso'olo'i lein' gosə'əbigue'e cuit Jeso'osən'. Nach gwse'e Jeso'osən': —¿Nac goquən' gwxi'o yelə' gwnabia'anə' na' non' ben le' yelə' gwnabia'anə' par gono' de'e ca' chono'?

²⁴ Nach Jeso'osən' gože' lega'aque': —Leczə de to de'e nabda' le'e. Šə gwnale nada' de'en nabda' le'e nach ənia' le'e non' beṇ nada' yelə' gwnabia' par gona' de'e ca' chona'.

²⁵ Lenašc nada': ¿non' bselə' de'e Juannə' bide' bchoe' beṇə' nis? ¿EDioz nan' bsele'ene' o šə beṇə' yoblən'?

Nach boso'oxi'e gosə'əne': —Šə ye'echone' de que Dioz nan' bsele'e de'e Juannə' par bchoe' beṇə' nis, na' ye'e chio'o: “¿Bixchexan' bito gwyejle'ele che'?”

²⁶ Na' šə ye'echone' de que to gwlažzen' bide', cuili biczən' so'one beṇə' quingan' chio'o, chedə'

chse'ejle'e de que Diozən' bsele'e de'e Juannə' par be'e xtiže'enə'.

²⁷ Nach gwse'e Jeso'osən': —Bito ŋezeto' non' bselə' de'e Juannə'.

Nach gož Jeso'osən' lega'aque': —Leczə ca' nada' bito əñia' non' beŋ nada' yelə' gwnabia'anə' par gona' de'e ca' chona'.

Jempl che chopə xi'in beŋə'

²⁸ Le'e gon xbab bi zeje jempl nga: Gwzo to beŋə' gwnitə' chopə xi'ine'. Na' gože' tobo': “Xi'ina' neža che'enda' šejo' güen žin gan' ža' yag obas chia' ca'.”

²⁹ Nach xi'ine'enə' gožbo' le': “Bito ša'a.” Pero gwdelə beyombo' xbab, nach gwyejbo'.

³⁰ Nach gozeje' gan' zo xi'ine'en yeto, na' ježe'ebo' can' gože' bi'i bišə'əbo'onə'. Na' le'e gožte bi'in le': “Guaquəczə, na' ša'a.” Pero bito gwyejbo'.

³¹ Le'e našč nada': ħnobo' bi'i ca' chopə boso'ozenagbo' che xaga'acbo'onə'?

Nach gwse'ene': —Bi'i nech na'.

Nach Jeso'osən' gože' lega'aque': —Leiczelen'. Na' de'e li chnia' le'e beŋə' gočhixjw ca' na' no'olə zargat ca' yobəch yoso'ozenague' che Diozən' cle ca le'e na' yobəch əso'e latjə nabia' Diozən' lega'aque'.

³² Ca naquə Juannə' ben' bchoa beŋə' nis bide' laolen' na' gwdixjue'ine' le'e naquən' cheyalə' gonle par nič yebei Diozən' le'e. Pero bito gwyejle'ele che'. Letga beŋə' gočhixjw ca' na' no'olə zargat ca' gwse'ejle'e che'. Na' catə' gočbe'ile de que beŋə' ca' bagwse'ejle'e che', bito bediŋjele xtolə'əle ca' par šejle'ele che de'e Juannə'.

Jempl che mos mal ca'

33 Le'e gwzenag yeto jempl nga. Gwzo to beṇə' na' lao to pedas yežlyo chen' goze' zlezə yag obas na' gwlo'e le'ej doxenən. Na' na'atezə bene' to tanc gan' bososi'e obasən' par bechoj xisein'. Na' leczə bene' to campnary gan' yesə'əcua'a beṇə' əsa'ape' güertən'. Nach bene' güertən' lao na' beṇə' par bosogüia bosoye'en, na' gwde na' gwze'e jəzoe' ga yoblə.

34 Catə' bžin tyemp par yosyo'otobe' cwsešən', bsele'e to chopə xmosə' gan' ža' beṇə' ca' chsa'apə yag obas che'enə' par žjəsyə'əxi'e to tlacw cwsešən' de'en cheyalə' yezi'e.

35 Pero na' beṇə' ca' chsa'apə yag obas che'enə' bito bosə'əgüialaogüe' mos che' ca'. Gosə'əyine' toe', na' yetoe' bososiže'ene' yej, nach yetoe' gwso'ote'.

36 Nach bosselə' xan yag obasən' mos zanch clezə ca' beṇə' ca' bsele'e nech, pero leczə can' gwso'onene' beṇə' nech ca' leczə can' gwso'onene' lega'aque'.

37 Nach xan yag obasən' bsele'e cuinczə xi'ine'enə', goquene' əsa'ape'ene' respect na' yosyo'onežjue'ene' cwsešən'.

38 Pero na' beṇə' ca' chsa'apə güertən' catə' besə'əle'ine' xi'ine'enə', nach gosə'əne' entr lega'acze': "Be'engan' xi'in xan yag obasən', na' le'enə' yega'anlen biennə'. Leda gotchone' par nich yega'anlencho yežlyo che x'e'enə'."

39 Nach bosonize'ene', besyə'əbeje'ene' fuerlə güertən' na' gwso'ote'ene'.

40 Beyož be' Jeso'osən' jempl nga, gože' beṇə' ca' ža'anə': —čNac chactgüeile gon xan güertən' len beṇə' ca' bocua'anlene' güert che'enə' catə' yežin

cuine'?

⁴¹ Nach gwse'ene': —Gote' lega'aque' yelə' beṇə' mal čhega'aque'enə', na' yegüe'e güertən' lao na' beṇə' yoblə. Yegüe'en lao na' beṇə' so'on complir yosyo'onežjue'ene' to tlacw cwseš čhe'enə' catə' əžin ža par yesyə'ətobe'en.

⁴² Jeso'osən' gože' lega'aque': —Ca'aczən'. Na' ĵəcabinə' šejni'ile bi zejen de'en nyoj Xtižə' Diozən' gan' nan:

Yej de'en cui gwso'olažə' mues güen yo'o ca',
lennə' banaquən yej squin.

Xancho Diozən' babzoe' yejən' gan' cheyalə' son
na' de'e zaquə' yebanecho can' bene'enə'.

⁴³ De'e na'anə' chnia' le'e de que Diozən' cuejyichje' cuich ṇabi'e ṇasyon čhelenə' na' cueje' beṇə' yoblə beṇə' yoso'ozenag čhe' par ṇabi'e lega'aque'.

⁴⁴ Na' ca naquə' yejən' ža, yoguə' no cui šejle' čhia' gwxaquə'əlebene' ca beṇə' əxopə lao yejən' na' cue'ežožje'. Na' yoguə' no cuinə' šejle' čhia' catə' babžin žan' gaquə' juisyən', gwxaquə'əlebene' ca beṇə' əxopə yej laogüe'enə' na' əgwšošjən le'.

⁴⁵ Na' bχoz əblao ca' na' beṇə' fariseo ca', catə' gwse'enene' jempl ca' de'en be' Jeso'osən', gwsa'acbe'ine' de que be'e jempl ca' por ni čhe de'en cui chse'ejle'e čhe'.

⁴⁶ Nach gwse'enene' yesə'əzene'ene' pero bitobi gwso'onene' le'. Besə'əžebe' šə bi so'one beṇə' ca' nžague'enə' lega'aque', čhedə' yogue'e gwse'ejle'e de que Diozən' bsele'e Jeso'osən' par cho'e xtiže'enə'.

22

Jempl čhe to yelə' gošagna'

¹ Na' de'e yoblə bsed blo'i Jeso'osən' beṇə' ca' len jemplən', gozne':

² —Yelə' gwnabia' che Diozən' gwxaquə'əleben ca de'e nga goquən'. Zo to rei, beṇə' ben gast catə' bšagna' xi'ine'enə'.

³ Na' bene' combid beṇə' zan əžja'aque' liže'enə' par əsa'ogüe'. Na' catə' bžin or par solao lṇin', rein' bselə'e xmoše' ca' par jəsə'əxi'e beṇə' ca' babene' combidən'. Pero notono no gwse'ene əžja'ac lao yelə' gošagna' che xi'ine'enə'.

⁴ Nach gože' yexonj xmoše' ca': “Le'e žjež beṇə' ca' zjənaquə combidən' de que babsi'ini'a de'en gaochonə'. Babeta' xco'onə' ca' na' xme'edaogua'a ca' bia ca' chsa'aṇə', na' yoguə' de'e ca' yelə' babsi'ini'a par gaocho. Na' ye'ega'aclene' sa'aque' gaocho de'en babsi'ini'anə'.” Nach ja'ac mos ca' jse'eže' lega'aque' ca'.

⁵ Pero beṇə' ca' bito gwso'one' cas. Toe' gwyeje' jəgüie' yežlyo che'enə', na' yetoe' gwyeje' jene' negosy.

⁶ Na' yebale' bosə'əṇize' mos ca' bselə' rein' na' gosə'əzi'ichiže'e lega'aque' na' gwso'ote' bale'.

⁷ Na' lechgualə bža'a rein', na' bselə'e soldad che' ca' jse'ete' lega'aque' na' bosə'əzeye' syoda chega'aque'enə'.

⁸ Nach rein' gože' xmoše' ca': “Babsi'ini'a de'en gaocho lao lṇin', pero ca' naquə beṇə' ca' bena' combidən' nachia' bito zjəzaque'e par la'aque' liža' nga əsa'ogüe'.

⁹ Le'e žja'ac yež ca' yelə' na' le'e žjəta yoguə' lquey ca' na' gonle combid yoguə' beṇə' chaš par da'aque' sa'ogüe'.”

¹⁰ Na' mos ca' ja'aque' yoguə' nez ca' na' jəsə'ətobe'

con yoguə' beṇə' besə'əžague', no beṇə' naquə beṇə' güen na' no beṇə' naquə beṇə' mal, par niḥ beža' liž rein' xte cuich bi latjə gotə'.

11 Pero na' catə' gwyo'o rein' jəgüie' beṇə' ca' bazjənžaguən', na' entr lega'aque' ble'ine' to beṇə' cui nyaze' lachə' de'en chnežjo rein' de'en chsa'aze' lao lninə'.

12 Nach gož rein' le': "Migw chia' ¿nac goquən' gwyo'o nga? la' bito nyazo' lachə' de'en cheyalə' ḥhazo'." Na' be'enə' bito bželene' bi ye'e rein'.

13 Nach rein' bene' mendad yoso'oḥej xmoše' ca' ni'ana' be'enə' na' yesyə'əbeje'ene' fuerlə, gan' lechgualə naquə žchol, gan' cuežyaše'e na' gan' gaoyejə leye' zejlicane.

14 Can' naquən, Diozən' chaxe' yoguə' beṇə' par əse'ejle'e che', pero balgue'en choso'ozenague' che', na' chque'e lega'aque' ca xi'ine'.

Gosə'əṇabene' Jeso'osən' šə naquən güen yesə'əyixjue' impuest che gobiern

15 Nach beṇə' fariseo ca' besə'əžague' par bosə'əxi'e naclə so'one' par niḥ yesə'əcueje' Jeso'osən' dižə' de'en yesə'əchine' par əsa'ogüe' xya che'.

16 Na' beṇə' fariseo ca' boso'osele'e balə beṇə' zjənaquə cuent len lega'aque' lao Jeso'osən' na lecəə boso'osele'e balə beṇə' chso'on txen len Erođən' par jse'eže'ene': —Maestr, nezeto' de que cho'o dižə' li. Nezeto' de'en chsed chlo'ido' beṇə' can' chene'e Diozən' goncho naquən dižə' li. Na' nezeto' bito chžebo' bin' yesə'əna beṇə', la' bito chono' cuent che beṇə' šə naque' blao o šə bito naque'.

17 De'e na'anə' zedenabeto' le' par ənao' neto' naquən' cheyalə' gonto'. ¿Enaquən güen ḥhixjwto'

impuest che gobiern roman', o ša bito cheyalə' chixjwto'on?

18 Jeso'osən' gocbe'ine' caguə do lažə'əga'aque'enə' gwse'ene' ca', nach gože' lega'aque': —iNacle beṇə' goxoayag! ĩBixchen' chene'ele cuejle nada' dižə' de'en gwchinle contr nada'?

19 Le'e gwlo'i nada' xmechlen' de'en chyixjwle che impuestən'.

Nach boso'olo'ine' le' to denario.

20 Jeso'osən' gože' lega'aque': —ĩNo diboj cheinə' da' laogüennə', na' no lein' nyoj laogüennə'?

21 Nach gwse'ene': —Che Rei Sesar.

Nach Jeso'osən' gože' lega'aque': —Le'e əgwnežjo Sesarən' de'en naquə che' ža, na' le'e əgwnežjo Diozən' de'en cheyalə' əgwnežjwlene'.

22 Nach beṇə' ca' catə' gwse'enene' xtižə' Jeso'osən' besyə'əbanene'. Na' besa'aque' gan' zoe'enə'.

Catə' yesyə'əban beṇə' guat ca'

23 Na' le'e ža na'atezəczə besə'əzzin balə beṇə' sadoseo beṇə' ca' cui chse'ejle' de que yesyə'əbān beṇə' guat ca', na' de'e na'anə' jse'eže'ene':

24 —Maestr, de'e Moisezən' bzoje' de que ša to beṇə' byo beṇə' nšagna' gate' na' yega'aṇ no'olə che'enə' sin cui no xi'ine' gwzo, beṇə' bišə' be'enə' bagotən' cheyalə' yeque'e no'olənə' par ničh nitə' xi'in dia che de'e beṇə' biše'enə'.

25 Bač bemb'i'ato' gažə bišə'əga'aque'. Na' beṇə' nechən' bšagne'e, na' gote', na' notono xi'ine' gwzo. Na' biše'e əgwchopən' beque'e no'olən'.

26 Na' leczə got beṇə' əgwchopən' na' notono xi'ine' gwzo. Nach le'egatezə ca' goquə len beṇə'

biš'e e gwyone, nach beṇə' bišə'əga'aque' ca' yelə', xte besyə'əyatega'aque' besyə'əque'e no'olən' na' besyə'əyatega'aque' gwsa'at, na' notoczə no xi'inga'aque' gwnitə'.

²⁷ Na' gwde gwsa'at beṇə' ca' leczə got no'olən'.

²⁸ Na' catə' yesyə'əban beṇə' guat ca', ¿noe' entr beṇə' gažə ca' gaquə be'en che no'olən'? la' yogue'en bosyo'ošagna'alene' le'.

²⁹ Nach gož Jeso'osən' lega'aque': —Bito chonle xbab šao' de'en nale ca', la' bito nezele can' na Xtižə' Diozən' de'en nyojən na' nic nezele naquən' naquə yelə' guac che Diozən'.

³⁰ Catə'an yesyə'əban beṇə' guat ca', bito gacbia' šə zoso'ošagne'e o šə cui, na' cana' caguə no yosyo'ošagna'ach. Lebzen' əsa'aque' len angl che Diozən' beṇə' ca' nitə' yoban'.

³¹ Na' ca' naquən' chaquale bito yesyə'əban beṇə' guat ca', ¿abitə' za'alažə'əle can' nyoj Xtižə' Diozən', nan:

³² “Nada' naca' Dioz che de'e xaxta'ole Abraannə', na' Dioz che de'e xaxta'ole Isaaquən', na' Dioz che de'e xaxta'ole Jacobən'.” Na' nezecho beṇə' ca' nite'e len Diozən' chedə' Diozən' bito naque' Dioz che beṇə' guat, sino' naque' Dioz che beṇə' ca' zjəmban.

³³ Na' beṇə' zan ca' zjənžaguən' besyə'əbanene' catə' gwse'enene' dižə'an de'en bsed blo'ine' lega'aque'.

De'en naquə de'e blaoch de'en non Diozən' mendad goncho

³⁴ Na' catə' gwse'ene beṇə' fariseo ca' de que Jeso'osən' bzožie' beṇə' sadoseo ca', nach jeza'aque' lao Jeso'osən'.

³⁵ Na' to ben' chsed chlo'i lein' leczə gone'ene' cueje' Jeso'osən' dižə' de'e gwchine' contr le'. Na' gože'ene':

³⁶ —Maestr, lao lei che Diozən' ĵnon' de'en none' mendad goncho naquən de'e blaoch?

³⁷⁻³⁸ Jeso'osən' gože'ene': —De'en naquə de'e žialaoch na' de'e blaoch lao de'e ca' none' mendad goncho nan: “Cheyalə' gaquecho che Xancho Diozən' do yichj do lažə'əcho do fuers balor checho.”

³⁹ Na' de'e əgwchopen' lebze nan len de'e nechen': “Cheyalə' gaquecho che sa'aljuežjcho catg chaquecho che cuincho.”

⁴⁰ Chopə de'e ca' non Diozən' mendad goncho zjənoxə'ən doxen de'en bzoj de'e Moisezən' na' de'en bosozoj beṇə' ca' gwso'e xtižə' Diozən' cana'.

Cristən' naque' xi'in dia che de'e Rei Dabin'

⁴¹ Na' lao ne'e zjənžag beṇə' fariseo ca' lao Jeso'osən',

⁴² gože' lega'aque': —ĵBin' chontgualə xbab che Cristən' ben' əselə' Diozən' par gaquəlene' nasyon chechon'? ĵNo xi'in dia chei gaque'?

Na' gwse'ene': —Gaque' xi'in dia che de'e Rei Dabin'.

⁴³⁻⁴⁴ Nach Jeso'osən' gože' lega'aque': —De'e Dabin' bzoje' can' blo'i Spirit che Diozən' le'. Gwne' de que Cristən' naque' Xane'. Quinga bzoje':

Xancho Diozən' gože' Xana'an:

“Gwche'edo' cuita' nga nabi'acho txen,

Na' gona' par niçh nitə' de'e ca' chso'on contr le' na' beṇə' contr chio' ca' xni'onə'.”

45 Na' de'en gwna de'e Rei Dabin' de que Cristən' naque' X̄ane', ĩacabi zejen de que Cristən' naque' mazəchlə ca xi'in dia che' na'anə' ža?

46 Na' notoch no goquə yosyo'oži'i xtiže'enə'. Na' dezd ža na' bitoch besyə'əyaxjene' bi yesə'əñabene' Jeso'osən'.

23

Xtolə' beñə' fariseo ca' na' beñə' ca' choso'osed choso'olo'i lein'

¹ Nach Jeso'osən' gwzolao be'e dižə' len disipl che' ca' na' len beñə' zan ca' nitə' gan' zo'enə', gwne':

² —Beñə' ca' choso'osed choso'olo'i lein' na' beñə' fariseo ca' bazjənlane' xlatjə de'e Moizezən' par choso'ozejni'ine' beñə' lei che' Diozən'.

³ Na' de'e na'anə' le'e gwzenag chega'aque' catə' choso'ozenene' le'e can' na' lein', na' le'e gon can' nannə', pero bito gonle can' chso'on lega'aque', chedə' lega'aque' bito chso'one' de'en chəsə'əne' cheyalə' gonle.

⁴ Lega'aque' chesə'əzanche' can' na' lein', na' chso'one'en ca to yoa' de'e cuiczə no do'i na' chse'enene' soa' beñə' yoblə len, na' bito chse'ene lega'aque' əso'en.

⁵ Ca naquə beñə' ca' yoguə' de'en chso'one'enə', chso'one'en parzə nič yesə'əle'i beñə' can' chso'one'enə', na' so'elaogüe'e lega'aque'. Nchej na'aga'aque'enə' na' nchej lao xgaga'aque'enə' caj dao' gan' ža' part güejə Xtižə' Diozən' na' chso'one' caj dao' ca' de'e cha'odao'. Na' leczə chso'one' lox xadoñ chega'aque'enə' de'e toñə.

6 Chesyā'ābeine' chesā'ābi'e gan' chāsā'ābe' beṇā' blao ca' catā' chja'aque' gan' chac no lṇi, na' catā' chja'aque' yo'odao' chēga'aque'.

7 Chāsya'ābeine' catā' beṇā' ca' chāsā'āguape' lega'aque' diox na' catā' chesā'ānope'e na'aga'aque'en do lao lquey, na' chse'enene' yoso'osi' beṇā' lega'aque' maestr.

8 Pero āchnia' le'e, bito gonle byen ye'e beṇā' le'e “maestr” laogüe de'en chsed chlo'ile xtiža'anā', chedā' nadā'āzan' gwlej Diozān' par naca' maestr chēle, nadan' bsele'e par gaquālena' beṇāchān'. Na' yoguā' le'e chonlilažā'āle nada' chaque bišā'āljuežjle tole yetole.

9 Na' leczā bito nale che notā'ātezā beṇā' de que naque' “Padrecito”. Tozā Dioz ben' zo yoba naque' Xacho.

10 Na' bito gonle byen ye'e beṇā' le'e “Xana”, chedā' leczā tozā nada' Cristān' gwlej Diozān' par naca' Xanle.

11 Šā no le'e nacle beṇā' blaoch, cheyalā' āgwzexjw yichjle gaquālenle ljuežjle.

12 Notā'ātezle cho'elao' cuinle Diozān' gone' par nič gache'ile de que bitobi zaquā'āle. Na' notā'ātezle chonle xbab de que bitotec bi zaquā'āle, Diozān' gone' le'e yelā' bala'an.

13 Probchguazā le'e chsed chlo'ile lein', na' probchguazā le'e beṇā' fariseo. Chxōayagle beṇā' par nič cui so'e latjā nabia' Diozān' lega'aque' na' leczā le'e bito cho'ele latjā nabia' Diozān' le'e.

14 Na' probchguazā le'e chsed chlo'ile lein', na' probchguazā le'e beṇā' fariseo. Chxōayagle no no'olā gozebā par nič no'ol ca' chso'ōne' le'e

ližga'aque' na' len bichlā de'en de čhēga'aque'. Nach catā' chonlē orasyon cho'echgualē dižā' par nič ǎxoayagle beṇā' əsa'aquene' nacle beṇā' gūen. Goscha'och Diozān' castigw čhelen' clezā ca čhē beṇā' ca' cuitēc zjāṇezene' can' na lēin'.

15 Probchguazā le'e chsed chlo'ile lēin' na' probchguazā le'e beṇā' fariseo. Nacle beṇā' goxoayag. Čhja'actezā čhja'acle čhjetiljle beṇā' zitā' beṇā' yesā'ənao de'en chsed chlo'ile. Na' catā' čhželga'aqueline' chzejni'iga'aqueline' par nič əsa'aque' lēchguale beṇā' maləch clezā ca le'e.

16 ¡Probchguazā le'e! Nacle ca beṇā' lčhol beṇā' chsa'aquene' guaquā yesā'əgüe'e nez beṇā' yoblā. Nale de que notā'ətezā beṇā' chzoe' joramentān' por yo'oda' əblaonā', bitobi zeje jorament čhē'enā'. Pero šā chzoe' joramentān' por oro de'en de lo'o yo'oda'onā', nachān' zejen de que cheyalā' gone' can' chone' lyebe.

17 Le'e nacle ca beṇā' lčhol na' bitobi čejni'ile. Oron' bitotec bi zaquā'ən. Yo'oda'onā' gan' yo'o oron' lēnṇā' zaquā'əchān, la' de'en yo'o oron' lo'inā' de'e na'anā' oron' naquān čhē Diozān'.

18 Na' lēcā nale de que šā to beṇā' chzoe' joramentān' por mes de yej gan' choso'ozeye' bia yixā'ən par chso'elaogüe'e Diozān', bitobi zeje jorament čhē'enā'. Pero na' šā chzoe' joramentān' por de'en xoa lao mes de yejān', cheyalā' gone' can' chone' lyebe.

19 Le'e nacle ca beṇā' lčhol na' bitobi čejni'ile. De'en choso'ozeye' par chso'elaogüe'e Diozān' bitotec bi zaquā'ən. Mes gan' chxoa de'en chosā'ənežjue' Diozān' lēnṇā' zaquā'əchān, la'

de'en choso'oxoe' de'e ca' laogüen, de'e na'anə' chsa'aquən che Dioz.

²⁰ Šə beṇə' chzoe' joramentən' por mes de yejən' lenczə por de'en xoa laogüennə' chzoe'en.

²¹ Na' šə beṇə' chzoe' joramentən' por yo'oda'onə', lenczə por Dioz nan' chzoe' joramentən' chedə' yo'oda'onə' naquə che Diozən' na' nan' zoe'.

²² Na' šə beṇə' chzoe' joramentən' por yoban', por Dioz nan' chzoe'en, chedə' la' nan' chi' Diozən' chnabi'e.

²³ Probchguazə le'e chsed chlo'ile lein', na' probchguazə le'e beṇə' fariseo. ¡Nacle beṇə' goxoayag! La'anə'əczə chnežjwle Diozən' to part lao ši part che yixgüej chele, che niz chele, na' che comin chele, bitobi zejen, chedə' bito chzenagle che de'e ca' zjənaquə de'e žialaoch de'en na lein'. Bito chonle de'en naquə güen lao Diozən'. Bito cheyašə'əlažə'əle sa'aljuežj beṇə'chle. Bito chonle complir can' nale. De'e quinga zjənaquə de'e žialaoch gonle; pero bito cheyalə' cuejyichjle cui əgwnežjwle de'e ca' chnežjoczlene'.

²⁴ Nacle ca beṇə' lchol beṇə' chsa'aquene' guaquə yesə'əgüe'e nez beṇə' yoblə. Gwx-aquə'əlebele ca to beṇə' chebej bizə beb dao' nchixə yelə' guao che'enə', pero bito chache'ine' šə nchixə'əchlən to de'e xen de'e zaquə' yebeje'.

²⁵ Probchguazə le'e chsed chlo'ile lein' na' probchguazə le'e beṇə' fariseo. ¡Nacle beṇə' goxoayag! Gwxaquə'əlebele ca tas plat de'en chchin beṇə' na' cui cha'a chyibe' lo'inə' binlo. Chonle par niçh chsa'aque beṇə' de que nacle

benə' güen pero lechguale chzelažə'ale bi de'e de che benə' na' chebeichgüeile chca'alēn.

26 Le'e benə' fariseo, n̄chol̄ yichjla'ažda'olen'. Le'e yedinje xtolə'ale ca' par nič de'e liczə gacle benə' güen can' chene'ele so'on benə' xbab nacle.

27 Probchguazə le'e chsed chlo'ile lein' de'en bzoj de'e Moisezən', na' probchguazə le'e benə' fariseo. ¡Nacle benə' goxoayag! Gwxaquə'alebele ca to ba de'en zjənone' xochechgua laogüenə' pero lo'ilei ža' žit benə' guat na' chi'ichgua de'e zban.

28 Chene'ele so'on benə' xbab chele de que nacle benə' güen, pero len yichjla'ažda'olen' nacle benə' goxoayag na' benə' malchgua.

29 ¡Probchguazə le'e chsed chlo'ile lein'! na' ¡probchguazə le'e benə' fariseo! Nacle benə' goxoayag. Chonle monoment lao ba che de'e profet benə' ca' gwso'e xtižə' Diozən' cana', na' chonle xochechgua lao ba che yeziquə'əchlə benə' gwso'on de'e güen.

30 Na' nale: “Žalə' chio'o bazochō ca tyemp che de'e xaxta'ocho ca', bito bencho txen len lega'aque' ca de'en gwso'one' gwso'ote' profet ca' benə' ca' gwso'e xtižə' Diozən' cana'.”

31 Pero na' yoguə'əlolte de'en chonle chlo'in de que tozəczə can' nacle len de'e xaxta'ole ca' benə' ca' gwso'ot de'e profet ca'.

32 Šə de'e tant chebeile chonle de'e malən', le'e gwza'alao legon biquə'əchlə de'e mal de'en bito golə' so'on de'e xaxta'ole ca'.

33 Le'e nacle benə' goxoayag na' naljele. ¿Echaquele de que guaquə yexonjele castigon' de'en gon Diozən' le'e ca de'en əsele'e le'e lao yi' gabilən'?

34 Na' de'en gona' nada' əselə'a beṇə' so'e xtiža'anə' na' no beṇə' sin' laolenə', na' nochlə beṇə' yoso'osedene' le'e xtiža'anə'. Na' bale' gotle əgwda'aga'aclene' to le'e yag coroz, na' yebale' chinle do lo'o yo'odao' chele ca', na' yebale' yolagzejə yolagzidəga'aclene' gatə'atezə yež žja'aque'.

35 Na' de'en gonle ca' gaple dolə' che yelə' got che yoguə' beṇə' ca' gwso'on de'e güen, beṇə' ca' gwso'ot de'e xaxta'ole ca', gwzolaozən len de'e Abelən' xi'in beṇə' nech ca' ben' naquə beṇə' güen lao Diozən' na' beyožən len de'e Zequeria xi'in de'e Berequias. Zequeria na'anə' ben' gwso'ote' entr yo'odao' əblaonə' na' entr mes de yej gan' choso'ozeye' bia yixə' par chso'elaogüe'e Diozən'.

36 Na' de'e li le'e mbanle na'a si'ile castigw che yelə' got che yoguə' beṇə' ca' gwso'ot de'e xaxta'ole ca'.

Begüine'e Jeso'osən' por ni che xtolə' beṇə' Jerosalen ca'

37 ¡Prob le'e beṇə' Jerosalen! Chotle beṇə' ca' chso'e xtižə' Diozən' na' beṇə' ca' chselə' Diozən' par chso'elene' le'e xtiže'enə' chšizə'əga'aclene' yej. Žan las bago'onda' yotoba' le'e can' chon to jeid cheyež xi'inəb, pero bito be'ele latjə.

38 Na' na'a cuejyichj Diozən' le'e. Bitoch gone' cas chele.

39 Na' əchnia' le'e, bitoch le'ile nada' xte catə'əch əžin ža ənale: “Cho'ela'oto' ben' za' nga, babselə' Xancho Diozən' le'.”

24

Jeso'osən' gwne' de que gwžin ža yosyo'očinje' yo'odao' əblaonə'

¹ Na' catə' beza' Jeso'osən' yo'odao' əblaonə' par šeje' ga yoblə gosə'əbiguə' disipl che' ca' gan' zo'enə' na' lao chəsə'əgüi'e yo'odao' əblaonə' gwso'e dižə' catec xoche naquən na' lecza ca' yo'o ca' zjənyechjən.

² Nach Jeso'osən' gože' lega'aque': —Bable'ile catec xochen' naquə yoguə' de'e quinga. Na' de'e li chnia' le'e ca naquə de'en chle'ile na'a, gwžin ža yosyo'očinj beṇə' doxenən, na' notoch no le'i lega'aquən.

De'en gaquə catə'an bazon baozə šo'o fin che yežlyon'

³ Na' ja'aque' ya'a Olibosən' na' Jeso'osən' gwchi'e lao ya'anə' toze'. Na' gosə'əbiguə' disipl che' ca' laogüe'enə' na' gwse'ene': —Xanto', čdo batə'əquən' gaquə de'e nga nao' nga? Na' čnac gaquən' gacbe'ito' de que bazon baozə yido' de'e yoblə par šo'o fin che yežlyon'?

⁴ Nach Jeso'osən' gože' lega'aque': —Le'e gon xbab par nič notono əxoayag le'e.

⁵ Gwžin ža catə' zan beṇə' goxoayag ša' lao yežlyo nga beṇə' se'ene'ene' yoso'olane' xlatja' nga. Na' yesə'əne': “Nada'an Cristən' ben' gwlej Diozən' par gaquəlena' le'e.” Na' beṇə' zan yesə'əxoayague'.

⁶ Na' yene'ele dižə' de que chac gwdilə, o de que guaquə gwdilə, pero na' bito žeble, chedə' zgua'atec cheyalə' gaquə ca'. Na' bito le'e žinte žan' par šo'o fin che yežlyon'.

7 Na' yesyə'ədilə yež contr yež, na' nasyon contr nasyon. Na' leczə zan yež de'e zjəchi' doxenlə yežlyon' gaquə bgua bgüin na' cue'e yižgüe', na' leczə xə'ochgua.

8 Na' te gaquə ca' ne'e yesə'əžagloch beṇə' ža' yežlyon'.

9 Nach beṇə' ca' ža' doxen yežlyo nga yesə'əgue'ine' le'e chedə' chonlilažə'əle nada'. Na' so'one' le'e lao na' beṇə' contr ca', na' yesə'əsaquə'əzi'e le'e, nach so'ote' le'e.

10 Cana' ža, beṇə' zan beṇə' bachso'onlilažə' nada' yesə'əbejyichje' cuich so'onlilaže'e nada'. Na' lega'acteze' yesə'əgue'ine' ljuežjga'aque' beṇə' ne'e chso'onlilažə' nada' na' so'one' lega'aque' lao na' beṇə' contr ca'.

11 Na' beṇə' zan so'onlaže'e yesə'əne' de que xtižə' Diozən' chəsə'əyixjui'e na' yesə'əxoayague' beṇə' zan.

12 Na' laogüe de'en šanch beṇə' ca' so'on de'e malən', beṇə' zan juisy beṇə' bachso'onlilažə' nada' cuich əsa'aquene' che yeziquə'əchlə beṇə' chso'onlilažə' nada'.

13 Pero na' notə'ətezle šə co'o gwčhejlažə'əle len de'en chi' saquə'əle par gonlilažə'əle nada' na' gwzenagle chia' xte catə'əch əžin ža gatle, gožjəyezole len Diozən'.

14 Na' žja'ac beṇə' doxen lao yežlyon' yesə'əyixjui'e dižə' güen dižə' cobən' de que nabia' Diozən' con notə'ətezə beṇə' əso'e latjə. Na' catə' bazjəneze beṇə' ža' yoguə' nasyonnə' len, cana'achən' əžin ža šo'o fin che yežlyon'.

15-16 Bablable can' bzoj de'e profet Daniel ben' be' xtižə' Diozən' cana'. Na' de'en bzoje' nan de que

beṇə' mal so'one' de'en naquə de'e zban juisy de'e chgue'i Diozən' lo'o yo'odao' əblao che chio'o beṇə' Izrael na' yo'oda'onə' bitoch gonən žin. Na' catə' le'ile gaquə de'e quinga, canan' le'e nitə'əle Jodean' cheyalə' əgwxonjle na' žja'acle do ya'ada'ote. Le'e chlable de'en nga le'e šejni'in.

17 Na' šə zo to beṇə' chone' dezcanz lao sotea che' liže'enə', bito galə' yotobe' šinlaze' ca' ža' liže'enə', con cuejyichje'en.

18 Na' leczə ca' beṇə' zda do yoba bito galə' yebi'e par žjəyexi'e xadon che'enə' liže'.

19 Na' ca tyempən' lechgualē zdebə gaquən len no'olə ca' zjənoa' bdao' na' no'ol ca' chesə'əguažə' bidao'.

20 Le'e gon orasyon par nič cui cheyalə' əgwxonjle tyemp catə' chi' de'e zag o lao ža dezcanz.

21 Catə' gaquə de'e ca' lechgualē chi' saquə' beṇə' Izrael gwlaž checho ca'. Na' dezd catə'an gwxe yežlyon' xte ža neža bito ənacho bagwdi' bagwxaquə' beṇə' can' chi' saquə' beṇə' Izrael gwlaž checho ca', na' bito əžinlaže'e gaquə ca' len beṇəčan' de'e yoblə.

22 Žalə' nžia Diozən' bia' yesə'əžaglaogüe' sša ni yeto beṇə' cuich zjəmban catə'an yeyož yesə'əžaglaogüe'enə' žalə' ca'. Pero por ni che de'en chaque Diozən' che beṇə' ca' chso'onlilažə' le', beṇə' ca' bagwleje' par əsa'aque' xi'ine', de'e na'anə' cui güe'e latjə yesə'əžaglaogüe' sša.

23 De'e na'anə' šə no əye'e le'e: “Bgüiašč nga zo Cristən' ben' gwlej Diozən' par gaquəlene' chio'o”, o šə əye'e le'e: “Na'alə zoe”, bito šejle'ele che'.

24 Zan beṇə' goxoayag ša' lao yežlyo nga əse'e

le'e de que zjənaque' Cristən' o de que chso'e xtižə' Diozən'. Na' so'one' milagr na' so'one' de'e naquə yelə' goban par ničh yesə'əxoayague' beṇə' ca' bagwlej Diozən' par əsa'aque' xi'ine' žalə' gaquə yesə'əxoayague' lega'aque'.

²⁵ Baṇezele can' gaquə la' bagwdixjue'ida' le'e che de'e ca' ze'e gaquə.

²⁶ De'e na'anə' šə əse'e le'e: “Zo Cristən' latjə dašən”, bito gwzenagle čhega'aque' par əžja'acle. Na' šə əse'e le'e de que zo Cristən' lo'o yo'onə', bito šejle'ele čhega'aque'.

²⁷ Can' chac catə' chep yesən' chse'eni'in doxenlə le'e yoban' to de repentzə, leczə can' gaquə catə'an əžin ža yida' de'e yoblə. Diozən' bsele'e nada' golja' beṇačh, na' yida' to de repentzə na' yoguə'əloḷ beṇə' yesə'əle'ine' nada'.

²⁸ Ngale'en chonen che ben' ne': “Gan' de bia guat nan' chesə'əžag šod ca'.”

Can' gaquə catə' yidə Jesocristən' de'e yoblə

²⁹ Na' cate yeyož čhi' saquə' beṇačhən' lao ža ca', bgüižən' bitoch əgwse'eni'in, na' leczə ca' bio'onə'. Na' beljw ca' zjəžia le'e yoban' yesə'əxopən čhedə' Diozən' əgws'i'ınse' yoguə' de'e ca'.

³⁰ Na' cana'ach beṇə' ža' yežlyon' yesə'əle'ine' nada' yida' de'e yoblə to lo'o bejw, nadan' naca' ben' bselə' Diozən' golja' beṇačh. Yida' nsa'a yelə' guac xen čhia'anə' na' yelə' chey che'eni' čhia'anə'. Na' beṇə' ža' yoguə' nasyon che yežlyon' yesə'əbežyaše'e, beṇə' cui gwso'onlilažə' nada'.

³¹ Na' catə'an yida' to trompetən' cuežən zizjo, na' əselə'a angl čhia' ca' doxenlə yežlyonə'

par yesyə'ətobe' beṇə' ca' bagwlej Diozən' par zjənaque' xi'ine' gatə'ətezə zjənasəlese'.

³² Nezele can' chac do nga len yag yixgüion', catə' baḥ chzolao chebia xlague'e, chache'ile de que baḥ zon yela' yejon'.

³³ Na' lecza can' catə'an le'ile gaquə de'e mal ca' bagwnia' gaquə, cana'ach ənezele de que bazon əžin ža šo'o fin che yežlyon'.

³⁴ De'e li əchnia' le'e, bitonə' gat le'e nitə'əle lao tyemp nga na'a catə' solao gaquə yoguə'əlo' de'e ca'.

³⁵ Ca naquə de'e ca' chle'icho le'e yoban' na' yežlyon', yesə'əde chei, pero ca naquə xtiža'anə' caguə de'e te cui gaquə can' nanṇə'.

³⁶ Pero ca naquə bi ža bi orən' šo'o fin che yežlyon', notono no neze, ni que zjəneze angl ca' nitə' yoban', na' ni que nežda' nada' naca' Xi'in Diozən'. Tozə Xa' Dioz nan' neze.

³⁷ Diozən' bsele'e nada' golja' beṇaḥ, na' can' goquə ca tyemp che de'e Noenə', lecza can' gaquə catə'an nada' yida' de'e yoblə.

³⁸ Beṇə' ca' gwnitə' ca tyemp che de'e Noen' gwža'azeche' gwse'ej gwsa'ogüe' na' gwso'elaozechga'aque' bosə'ošagne'e na' bosə'əšague' na' no xi'inğa'aque'. Ne'e chso'onte' ca' catə'an bžin ža gwyo'o Noen' lo'o barcon' len family che' ca'.

³⁹ Bito gwsa'acbe'ine' bin' gaquə xte catə'əchən' goc yejw sio' juisyən' na' bia' nisən' yoguə'əlo'ga'aque'. Ca'atezəczən' bito sa'acbe'i beṇə' bin' gaquə xte catə'əchən' yida' de'e yoblə.

⁴⁰ Quingan' gaquə catə'an yida' de'e yoblə, chopə beṇə' nite'e do yoba, toe' yezi' yeca' Diozən', na'

yetoe' yocua'ane'.

41 Na' chopə no'olə nite'e chso'ote', toe' yezi' yeca' Diozən', na' yetoe' yocua'ane'.

42 De'e na'anə' le'e so probnid par catə'an yida' de'e yoblə, chedə' bito nezele bi ža bi orən' yida' de'e yoblə, nada' naca' Xanle.

43 Le'e gon xbab che de'e nga, žalə' neze xan yo'onə' do bi or lao yelən' əžin beṇə' bguanṇə' liže'enə', la' gwṇaze' par nič bito güe'e latjə šo'o be'enə' liže'enə' par cuane' šinlaze'enə'.

44 De'e na'anə' ža, le'e so probnid par catə'an yida' de'e yoblə chedə' catə'an cui chonle xbab yida' ca nan' yida' de'e yoblə, nada' naca' ben' bselə' Diozən' golja' beṇəch.

Mos ben' chon güen na' mos ben' cui chon güen

45 Notə'atezle šə zotezə zole probnid dote tyemp, gwxaquə'əlebele ca to mos beṇə' naque' beṇə' sin' na' beṇə' chon complir can' cheyalə' gone'. Na' gwxaquə'əlebele ca to mos ben' gwlo'o xane'enə' lao ne'e liže'enə' catə'an gwze'enə' par nič chnežjue' de'e chsa'o yoguə' mos che' ca' yela' catə' chžin or chsa'ogüe'.

46 Šə to beṇə' mosən' chontezə chone' can' non xanen' mendad, mbalaz socze' catə' yežin xane'enə'.

47 De'e li chnia' le'e, xane'en cue'e lao na' xmose'enə' yoguə'əlol de'en deine'.

48 Pero šə mosən' naque' beṇə' mal na' gone' xbab əne': "Bagwžei xanan".

49 Nach šə solaoacle' chine' mos ca' yela' na' ye'ej gaoxatteze' len no beṇə' güe'e zo,

50 nach x̄ane'enə' yežine' to ža senyale' le' to or cui nache'ine'.

51 Na' por ni che de'en cui chon mosən' can' cheyalə' gone', x̄ane'enə' chinchgüe' le' yid sotən' xte ca gate'. Gaquə che' can' chac che notə'atezə beṇə' goxoayag, chjəya'aque' gabilən' gan' chesə'əbežyašə' beṇə' na' chsa'oyejə leyga'aque'enə'.

25

Jempl che ši no'ol güego' ja'aque' to yelə' gošagna'

1 Nach Jeso'osən' goze'e disipl che' ca': —Yelə' gwnabia' che Diozən' ben' zo yoban' gwxaquə'əleben ca de'e nga goquə. Goc to yelə' gošagna' na' bazjəxi' beṇə' gošagna'anə' xo'ole'enə'. Na' nitə' ši no'ol güego' zjənaque' migw che beṇə' ca' chesə'əšagna'anə'. Na' zjənxobe' lintern chega'aque'en ja'aque' jəsə'əleze' catə' yesyə'əchoj beṇə' ca' liž no'olən' par nič əžja'aque' liž beṇə' byon' txen.

2 Na' gueyə' no'ol ca' gwnite'e probnid, na' no'ol ca' yegueyə' bito gosə'ənite'e probnid.

3 Catə' gwsa'aque' ližga'aque'enə', zjənxobe' lintern chega'aque'enə' pero bito gwso'oxe'e lmet gan' yožə petroly de'en yoso'əchine' catə' yebiž de'en yožə lo'o lintern chega'aque'enə'.

4 Na' no'ol ca' gueyə' catə' gwsa'aque' ližga'aque'enə', gosə'əxobe' lintern chega'aque'enə' na' gosə'əbecyichje' gwso'oxe'e lmet gan' yožə petroly de'en yosə'əchine' catə' yebiž de'en yožə lo'o lintern chega'aque'enə'.

5 Na' gosə'ažei beṇə' gošagna' ca', na' yoguə' beṇə' ca' gosə'əbezə lega'aque' gosə'ətase' lao chesə'əbeze'enə'.

6 Na' do chel, to beṇə' gwne' zižjo, gože' lega'aque': "Bachesyə'əchoj beṇə' gošagna' ca'. Le'e šo'o žjəšagga'acchone'."

7 Na' catə' gože' lega'aque' ca', yoguə' no'ol ca' gosə'əzeche' na' gosə'əque'e bao' de'en zo lao meš che lintern čhega'aque'enə'.

8 Na' no'ol ca' cui gosə'ənitə' probnid gwse'e no'ol ca' yegueyə': "¿Ebito gon latə' petroly čhelen' neto'? la' bachebiž čheto'onə'."

9 Nach no'ol ca' gwse'e lega'aque': "Bito gaquə gonlatə'əto' čhele la' de'en de čheto' bito gaquen par yoguə'əcho. Le'e žja'ac le'e žjəxi' čhelen' gan' chso'ote'ennə'."

10 Nach no'ol ca' cui gosə'ənitə' probnidə'n ja'aque' jəsə'əxi'e petrolyə'n'. Na' lao zja'aque' gwxi' petrolyə'n' besyə'əžin beṇə' ca' choso'ošagna' liž beṇə' byon'. Na' no'ol ca' gosə'ənitə' probnid gwso'e lo'o yo'onə' gan' chso'one' gastə'n' txen len beṇə' ca' chosə'əšagna'anə'. Nach mos ca' boso'oseyjue' puertə'n'.

11 Na' catə' besə'əžin no'ol ca' jəsə'əxi' petrolyə'n' na' gosə'əne' cho'a puertə'n', gwse'e ben' zo cho'a puertə'n': "Señor, bsaljwšga puertə'n' par nič šo'oto'."

12 Pero na' ben' zo cho'a puertə'n' gože' lega'aque': "De'e li chnia' le'e, bito saljua' par šo'ole la' bito nombi'a le'e."

13 Nach goze' Jeso'osə'n' disipl che' ca': —Ca'aczə'n' cheyalə' sole probnid batə'əquə'n' yida', čhedə' bito nezele bi ža bi orə'n' yida' yežlyo nga de'e

yoblə, nada' naca' ben' bselə' Diozən' golja' benəch.

Jempl che ben' bocua'anlene' xmose' ca' mechan'

¹⁴ Na' yelə' gwnabia' che Diozən' ben' zo yoban' gwxaquə'əleben ca de'en nga. To beṇə' gwyeje' ṇasyon zitə'. Na' ze'e se'e goxe' mos che' ca' na' gwlo'e lao na'aga'aque' xmeche'enə' par gwsə'onene'en ṇegosy.

¹⁵ Toe' bocua'anlene' gueya' mil pes. Na' yetoe' bocua'anlene' chopa mil. Na' yetoe' bocua'anlene' tmil. Bnežjue'en lega'aque' segon can' chac so'on to toga'aque'. Beyož bene' ca' gwze'e.

¹⁶ Ben' bocua'anlene' gueya' mil le'e gwzolaote chone' ṇegosy len mechən' na' bene' gan yegueya' mil pes.

¹⁷ Le'egatezə ca' ben ben' bocua'anlene' chopa mil. Le'e gwzolaote chone' ṇegosyən' len mechən' na' bene' gan yechopa mil.

¹⁸ Na' ben' bnežjue' tmil gwyeje', jəcuaše'e xmech xane'enə' to lo'o yech de'e əgwche'ene' lo'o yon'.

¹⁹ Goc sša gwza' xan mos quinga catə' bežine' nach bene' mendad ja'ac xmose' ca' laogüe'enə' par bosyo'odie' cuent.

²⁰ Na' mosən' ben' bocua'anlene' gueya' mil pes bžine' laogüe'enə' na' gože'ene': "Xana', ni de de'e gueya' mil de'en beṇo' nada'. Na' babena' gan yegueya' mil."

²¹ Na' xane'enə' gože'ene': "Babeno' de'e güen. Naco' mos güen na' syempr chono' complir can' cheyalə' gono'. Beno' can' cheyalə' gono' len de'e daon' bocua'anlena' le', na' na'a gona' lao na'o de'e xenchlə. Gwyo'o na' gona' par niçh so' mbalaz len nada'."

22 Nach catə' bžin ben' bocua'anlene' čopa milən' gože'ene': "Xana', ni de de'e čopa mil pes de'en bocua'anleno' nada', na' babenən gan yečopa mil."

23 Nach gož xane'en le': "Babeno' de'e güen. Naco' mos güen na' syempr chono' complir can' cheyalə' gono'. Beno' can' cheyalə' gono' len de'e daon' bocua'anlena' le', na' na'a gona' lao na'o de'e xenchlə. Gwyo'o na' gona' par nič so' mbalaz len nada'."

24 Nach catə' bezžin ben' bocua'anlene' tnil, nach gože' xane'enə': "Nga de xmecho' de'en bocua'anleno' nada'. Nezda' de que le' naco' to beṇə' znia. Chelapo' de'en gwsa'az beṇə' yoblə, na' chotobo' cwseš gan' gwso'on beṇə' yoblə žin.

25 De'e na'anə' gwy'a'a jəche'ena' to yech na' bcuaša'a xmecho'onə', čhedə' bžeba' šə əgwnitla'an. Na' na'a bezi'išgan'."

26 Nach xane'en gože' le': "iNaco' mos mal, na' naco' xagüed! Chacdo' de que chelapa' gan' gwsa'az beṇə' yoblə, na' chotoba' cwseš gan' gwso'on beṇə' yoblə žin.

27 Na' šə chacdo' chona' ca', žbixčhen' cui gwlejo' xmecha'an beṇə' yoblə žlac cui gwzoa'? na' na'a babel'a'a yezi'an len yičjei žalə' ca'."

28 Nach gože' xmose' ca' yel'a': "Yeca'ale mechən' de'en bocua'anlena' be'enə' na' əgwnežjwlen ben' banoxə' ši mil pes.

29 Can' naquən, ben' chon güen len de'en chnežjo xane'en le', xane'en gwnežjochze' čhe', nič gatə' de'e scha'och čhe'. Pero na' be'enə' cui chgon žin de'en chnežjo xane'en le', yeca'a xane'en de'e da'on bnežjue' le'.

30 Na' ca naquə mos mal nga le'e yebeje' fuerlə gan' lechguale naquə žchol' na' cuežyaše'e na' gaoyejə leye'enə'."

Can' gaquə catə' Jeso'osən' gone' yelə' jostis che yoguə' nasyon

31 Diozən' bsele'e nada' golja' beṇach, na' catə' yida' de'e yoblə nsa'a yelə' chey che'eni' chia'anə', na' chi'a angl' chia' ca' na' cui'a gan' chey che'eni' na' nabi'a.

32 Yoguə' beṇə' ban na' yoguə' beṇə' guat che yoguə' nasyon gona' mendad da'aque' laogua'anə'. Na' catə' banitə' yogue'e na' la'aga'aca'ane' can' chon to beṇə' goye xilə' catə' chbeje' partlə xilə' ca' na' partlə šib ca'.

33 Na' beṇə' ca' zjənaquə beṇə' güen lao Diozən' de'en baboso'ozenague' chia' əgwnitə'aga'aca'ane' cuitan' licha. Pero beṇə' mal ca' əgwnitə'aga'aca'ane' cuitan' yeglə.

34 Na' nada' naca' Rei yapa'a beṇə' ca' nitə' šla'a lican': "Baben Xa' Diozən' par nič le'e zole mba. Le'e da nga par nič gona' ca nabi'ale txen len nada' can' banžia Diozən' bia' dezd gwxe yežlyon'.

35 Gona' ca nabi'ale chedə' catə' gwdonə' le'e beṇle de'en gwdaogua'. Na' catə' bgüilda' nis, le'e beṇle de'e güe'əja'. Na' catə' goca' ca beṇə' zitə' le'e bebeile bgüialaole nada' ližlen'.

36 Na' catə' cui gotə' de'e chaza', le'e beṇle de'e gwyaza'. Na' catə' gocšenda' le'e bedətiple laža'a. Na' catə' gotə'a ližya, le'e bedəlanə'əle nada'."

37 Na' yoguə' beṇə' güen ca' əse'e nada': "Xanto' žbatən' ble'ito' le' gwdonə' na' beṇto' de'e gwdaogo'? Na' žbatən' bgüildo' na' beṇto' de'e güe'əjo'?"

38 Na' ĵbatən' goco' ca beṇə' zitə' na' bebeito' bgüialaoto' le'? Na' ĵbatən' ble'ito' le' cui gotə' de'e ĉhazo' na' beṇto' de'e gwyazo'?

39 Na' ĵbatən' gocšendo' o goto'o ližya na' bedelanə'əto' le'?"

40 Na' nada' naca' Rein' yapə'əga'aca'ane': "De'e li chnia' le'e, laogüe de'en beyašə'alažə'əle beṇə' ca' zjənaquə ca biša'a na' ca zana' por ni ĉhe de'en chso'onlilaže'e nada', la'anə'əczə cuitec bi zjəzaque'e par len beṇaĉhən', lencza' nada'an beyašə'alažə'əle."

41 Nach beṇə' ca' nītə' yeglə, beṇə' mal ca', yapə'əga'aca'ane': "Le'e cui'izə' ca'alə. Banchoglaon ĉhele cuiayi'ile yelə' güen de'e mal ĉhelen'. Le'e žja'ac lo'o yi' gabil' de'en cui chyoł, yi' de'en bxen Diozən' gan' yesə'əzi' de'e gwxiye'enə' len angl bzelaο ĉhei ca' castigw zejlicane.

42 Le'e žja'ac gabilən' ĉhedə' catə' gwdona' bito beṇle de'en gaogua'. Catə' bgüilda' bito beṇle de'e ye'eja'.

43 Catə' goca' ca beṇə' zitə' bito bebeile ggüialaole nada' ližle. Catə' cui gotə' de'e ĉhaza' bito beṇle de'e ĉhaza'. Catə' gocšenda' na' catə' gota'a ližya, bito bedəlanə'əle nada'."

44 Nach lega'aque' yosyo'oži'e xtiža'a yesə'əne': "Xanto', ĵbatən' gwdono'?, ĵbatən' bgüildo'? na' ĵbatən' goco' beṇə' zitə'?, ĵbatən' cui gotə' de'e ĉhazo'?, ĵbatən' gocšendo'? na' ĵbatən' goto'o ližya na' bito beyaše'eto' le'?"

45 Na' catə' yeyož əsi'e nada' ca', yapə'əga'aca'ane': "Laogüe de'en cui beyašə'alažə'əle beṇə' ca' zjənaquə ca biša'a na' ca zana' por ni ĉhe de'en chso'onlilaže'e nada',

la'anə'əczə cuitec bi zjəzaque'e par len beṇachən',
lencza' nada'an cui beyašə'əlažə'əle."

⁴⁶ Nach beṇə' mal ca' yesə'əzi'e castigw che
xtolə'əga'aque'enə' zejlicane. Pero beṇə' güen ca'
yesə'əzoe' len nada' zejlicane.

26

Boso'oxi'e can' so'one' yesə'əzene' Jeso'osən'

¹ Catə' beyož be' Jeso'osən' dižə'ən ca', gože' disipl
che' ca':

² —Banezele de que yechopə žazən' galə' lṇi pascw
chechon', na' ca' na' gaca' lao na' beṇə' contr
chia' ca' nič so'ote' nada' yosə'əde'e nada' to le'e
yag coroz, nadan' naca' ben' bselə' Diozən' golja'
beṇach.

³ Nach bχoz əblao ca' na' beṇə' ca' choso'osed
choso'olo'i lei de'en bzoj de'e Moizezən' na' beṇə'
golə blao che chio'o beṇə' Izrael besə'ədobe' chy'o'o
che beṇə' gwnabia' che bχoz ca', ben' le Caifas.

⁴ Na' boso'oxi'e naclən' so'one' par yesə'əzene'
Jeso'osən' bgašə'əzə na' so'ote'ene'.

⁵ Na' gosə'əne': —Bito gotchone' ža lṇinə', par
nič cui yesə'ədopə beṇə' ca' banitə' lao syodan' na'
yesə'ədiləlene' chio'o.

To no'olə bcuase' set zix yichj Jeso'osən'

⁶ Nach Jeso'osən' len disipl che' ca' ja'aque' Beta-
nia, liž to beṇə' le' Simon. Na' Simon nan' güe'ine'
yižgüe' de'en ne' lepr antslə.

⁷ Na' catə' besə'əžine' liž Simonṇə' gwche'
Jeso'osən' cho'a mes che'enə'. Na' ca' chi'e
catə'əczlə bžin to no'olə noxe'e to lmet de yej fin

de'e yožə to set de'e lechgualə zaque'e de'e chl̩a' zix̩.
Na' no'olən' bcuase' setən' yichj̩ Jeso'osən'.

⁸ Na' disipl ca' catə' besə'əle'ine' can' ben no'olən'
besə'əže'e na' gwse'e ljuežjga'aque': —¿Bixchen' con
benditjeine' setən'?

⁹ Güenchlə žalə' bete'en na' mech xennə' de'en
le'ine' chei əgwnežjue'en beṇə' yašə'.

¹⁰ Na' catə' bene Jeso'osən' xtižə'əga'aque'enə',
nach gože' lega'aque': —¿Bixchen' ch̩nele che
no'olən'? Güenchgua babene' len nada'.

¹¹ Ca naquə beṇə' yašə' ca' syempr nitə'əcze' len
le'e, pero ca naca' nada' yešložgan' soa' len le'e.

¹² De'en bcuasə no'olən' setən' yichja'anə' bene'
de'e non gone'ene' nada' žan' so'ote' nada' na'
əgaša'a, can' choncho len cuerp che beṇə' guatən'.

¹³ De'e li chnia' le'e, catə' chixjue'ile dižə' güen
dižə' cobə chia'anə' gasə laljən doxenlə yežlyo nga,
na' leczə guasə gwłaljə dižə'an can' ben no'olən' nga
len nada', na' beṇə' zannə' so'one' xbab ca güennə'
bene'.

*Jod Iscariotən' bene' Jeso'osən' lao na' beṇə' contr
ca'*

¹⁴ Gwde de'e quinga, Jod Iscariotən' ben' goquə
txen len disipl ca' šižin̩ gwyeje' lao b̩xoz əblao ca'

¹⁵ par ježe' lega'aque': —¿Ja'aque'ətə' gonle nada'
na' gona' Jeso'osən' lao na'ale?

Nach boso'oxia' beṇə' ca' boso'onežjue'ene' šichoa
mech pl̩at.

¹⁶ Nach Jodən' lao orzə gwzolao gwche'enaogüe'
batə'əquən' so latjə gone' Jeso'osən' lao
na'aga'aque'enə'.

Lao gwsa'ogüe' xše' Jeso'osən' blo'ine' lega'aque' naquan' žjasyə'azalazē'e ca de'en əgwnežjo cuine' so'ot beṇə' le'

17 Na' ža nech ža lṇin' catə'ən chsa'ogüe' yetx-til sin cui bi xne'i nchixə, ja'ac disipl ca' gan' zo Jeso'osən' na' gwse'ene': —¿Ga che'endo' žje'eni'ato' de'en gaocho xše' lṇi pascon'?

18 Nach Jeso'osən' gože' lega'aque': —Le'e žja'ac lao syodan' liž to beṇə' yežagle na' ye'elene': “Maestrən' ne' de que bazon əžin ža so'ote'ene' na' ližo' nga chene'ene' gaolento'one' xše' lṇi pascon'.”

19 Nach gwso'on disipl ca' can' ben Jeso'osən' mendad, jesə'əsi'ini'e de'en gwsa'olene' le' xše' lṇi pascon'.

20 Na' catə' beyož gwṁen, Jeso'osən' len disipl che' ca' šižin gosə'əbi'e cho'a mesən' gwsa'ogüe'.

21 Na' lao chsa'ogüe'enə' gož Jeso'osən' lega'aque': —De'e li əchnia' le'e, to le'e gonle nada' lao na' beṇə' contr ca'.

22 Nach de'e juisy de'e gwsa'aque'ne' catə' beyož gwne' ca', nach to toe' gwse'e le': —Xana', ¿anada'an gona' le' lao na' beṇə' contr ca'?

23 Nach gože' lega'aque': —To ben' babne' ne'enə' txen len nada' lo'o platən', le'enə' gone' nada' lao na' beṇə' ca'.

24 Banaquəczən so'ot beṇə' nada' can' nyoj Xtižə' Diozən' nan gaquə' chia', pero probchguazə be'enə' gon nada' lao na' beṇə' contr ca'. Nca'alə xṇeze žalə' cuiclə golje'enə'.

25 Nach Jodən', ben' bene' Jeso'osən' lao na' beṇə' contr ca', gože'ene': —Maestr, ¿anadan' gona' le' lao na' beṇə' contr ca'?

Jeso'osən' gože'ene': —Nezczədo' šə le'enə'.

26 Na' lao chsa'ogüe'enə' gwxi' Jeso'osən' yetx-tilən', be'e yelə' choxcwlen che Diozən'. Gwde na' bzoŋje'en nach be'en disipl che' ca', gože' lega'aque': —Le'e gaon. Lennə' cuerp chia'anə'.

27 Nach lecza bexe'e basən' gan' yožə nis oban', na' lao noxe'en be'e yelə' choxcwlen che Diozən' nach boznežjue'en lega'aque' goze'e: —Yoguə'əle le'e ye'ej de'en yožə lo'o bas nga.

28 Lennə' xchena'anə'. Na' xchena' na'anə' laljə par nich yezixen Diozən' xtolə' beṇə' zan, na' de'en laljənnə' solao gaquə de'e cobə de'en ben Diozən' lyebe gone' par gaquəlene' beṇachən'.

29 Echnia' le'e na'a zelao che'ēja' nis oban'. Pero de yeto de'e yebeichecho mazəchlə can' chebeicho nis oban', lennə' de'en socho mbalaz zejlicane catə'an socho txen gan' ṇabi'a len Xa' Diozən'.

Jeso'osən' gwne' de que Bedən' cui chebe' šə nombi'ene'

30 Na' beyož gwse'ej gwsa'ogüe' gwso'ole' to imno nach besə'əchoje' ja'aque' ya'a de'en nzi' Olibos.

31 Na' lao zjəngüe'e nezən' Jeso'osən' gože' disipl che' ca': —Neže' yoguə'əle cuejyichjle nada' por ni che de'en gaquə chia'. Gaquə can' nyoj Xtizə' Diozən' nan: “Gota' beṇə' goye xilə'anə' na' xilə' che' ca' sa'asə'əlasəb.”

32 Pero na' catə' yosban Diozən' nada' ladjo beṇə' guat ca', yobəchda' nada' yeya'a Galilean' cle ca le'e.

33 Nach Bedən' gože' Jeso'osən': —Nada' cuat cuejəyichja' le' la'anə'əczə šə yoguə' beṇə' yeziquə'əchlə yesə'əbejyichjle' le'.

34 Jeso'osən' gože'ene': —Bed, əchnia' le' bito cuež lecon' neže' antslə ze'e gaquə šon las cui chchebo' de que nombi'o nada'.

35 Nach Bedən' gože'ene': —La'aṇə'əczə šə chonclən byen guatlencza' le', bito əṇia' de que bito nombi'a le'.

Na' leczə ca' əgwse' yoguə' disipl che' ca' le'.

Jeso'osən' bene' orasyon lo'o güert de'en nzi' Getsemani

36 Na' catə' Jeso'osən' len disipl che' ca' besə'əžine' latjən' gan' nzi' Getsemani, na' gože' lega'aque': —Ngazə lecue' žlac ša'a de'e na' žjena' orasyon.

37 Na' gwche'e Bedən', len chopə xi'in Sebedeon' Jacobən' len Juannə'. Na' Jeso'osən' gwzolao gwzochgüe' trist, na' de'e juisy de'e goquene' lo'o yichjla'ažda'ogüe'enə'.

38 Nach gože' lega'aque': —Tristchgua zo yichjla'ažda'ogua'anə' xte bachonən yelə' got. Lecuezə nga na' sole əṇa'azle len nada'.

39 Nach gwdie' gwyeje' yelatə' delant na' jete'e goscho'alə lao yon' nach bene' orasyonṇə' gwne': —Xa', žəguaquə te ca'azə de'en chi' saca'anə'?, pero bito che'enda' gaquə de'e ṇia' nada', sino gaquə con can' əṇao' le'.

40 Catə'əczlə bežine' gan' nitə' disipl ca' šonə jəyedi'e lega'aque' chəsə'ətase'. Na' gože' Bedən': — žEni to or bito bchejele əṇa'azle len nada'?

41 Le'e ṇa', na' le'e gon orasyon nič cui co'o gwxiye'en le'e nez mal. Nezdə' chene'ele əṇa'azle len nada', pero cui chzoile.

42 Na' gosze'e gan' nite'enə' de'e yoblə, jebene' orasyonə', gwne': —Xa', šə cui gaquə te ca'azə de'en chi' saca'anə', con can' che'endo' le' gaquə.

43 Na' bezžine' gan' nite'enə' de'e yoblə jeyezdi'icze' bachəsə'ətase' tant bachac šə tasga'aque'.

44 Na' gwze'e de'e yoblə gan' nite'enə' jene' orasyonə' de'e əgwyon lase, na' gwnacze' can' bagwne'.

45 Nach bezžine' gan' nitə' disipl ca' šonə nach gože' lega'aque': —ǰEne'e chtasle? ǰEne'e chonle dezcanz? Diozən' bsele'e nada' golja' beṇaḥ na' na'a baḥ bžin or chia' par gaca' lao na' beṇə' mal ca' par so'ote' nada'.

46 Le'e secha. Le'e šo'o. Baza' ben' gon nada' lažə' na' beṇə' contr ca'.

Jodən' bdie' Jeso'osən' lao na' soldad ca'

47 Necho'ete Jeso'osən' dižə' ca' catə' bžin Jodən' ben' naquə cuent lao disipl ca' šižin. Na' žague' zan beṇə' bososelə' bχoz əblao ca' na' beṇə' golə blao che chio'o beṇə' Izrael. Na' zjənale'e spad na' zjənlene' no yag.

48 Na' Jodən' babzejni'ine' lega'aque' can' gone' par əgwdie' Jeso'osən' lao na'aga'aque'enə', gože' lega'aque': —Ben' gaogua' bxidən', le'enə' senle.

49 Na' catə' bžine' gan' zo Jeso'osən' le'e bgüiguə'əte' cuite'enə' na' gože'ene': —Padiox Maestr.

Na' gwdaogüe'ene' bxidən' pero caguə do laže'en bene' ca'.

50 Jeso'osən' gože'ene': —Migw chia', ǰbixchen' za'o nga?

Beyož gwne' ca' le'e gosə'əbiguə'əte beṇə' ca' gwso'oxe'ene'.

51 Na' to ben' naquə txen len Jeso'osən' gwlej spad chen' gwdine'en mos che beṇə' gwnabia' che bḫoz ca', gwchogtechgüe' šla'a nague'enə'.

52 Nach Jeso'osən' gože'ene': —Bego'o spad chio'onə' lo'o liže, la' yoguə' beṇə' chso'ot beṇə' len spad, leczə len chsa'atene'.

53 ¿Ebito nezdə' de que gaquə naba' lao Xa'anə' par le'e selə'əte' mazlə gyon šižina mil angl beṇə' əsa'aclen nada'?

54 Šə le'e tiləlenle beṇə' quinga par yoslale nada', ¿nacxa gaquən gaquə complir can' nyoj Xtižə' Diozən' nan can' cheyalə' gaquən'?

55 Na' lao bazjənoxe'e Jeso'osən', gože' lega'aque': —¿Eca to beṇə' bguannə' chsaquə'əlebele nada' za'acle len spad len yag zedexenle nada'? Yoguə' ža gwchi'a len le'e na' bsed blo'ida' beṇə' lo'o yo'odao' əblaon' na' cui gwzenle nada'.

56 Pero laogüe de'en chac yoguə' de'e quinga chac complir Xtižə' Diozən' de'en boso'ozoj de'e profet ca' beṇə' ca' gwso'e xtiže'enə' cana'.

Na' lao or na' bosyo'oxonj yoguə' disipl che' ca' gosə'əbejyichje'ene'.

Gosə'əche'e Jeso'osən' lao beṇə' golə beṇə' blao che Izraelən'

57 Na' beṇə' ca' gosə'əzen Jeso'osən' gosə'əche'ene' lao Caifasən' ben' naquəch bḫoz əblao che chio'o beṇə' Izrael gan' bazjəndobə beṇə' ca' choso'osed choso'olo'i lei de'en bzoj de'e Moisezən' na' len yez-iquə'əchlə beṇə' golə blao ca' chəsə'ənabia' nasyon chechon'.

58 Nach Bedən' jənaogüe' Jeso'osən' zitə' zitə'ələ xte bžinte' liž bḫoz əblaonə', na' gwyo'e chyo'onə'

na' jächi'e len beṇə' ca' zjənaquə xā'ag che yo'odao' əblaonə', chedə' gone'ene' le'ine' naquən' zelao gaquə len Jeso'osən'.

⁵⁹ Nach yoguə' bχoz əblao ca' na' yeziquə'əchlə beṇə' golə blao ca' chəsə'anabia' nasyon Izrael chechon' chəsyə'əyilje' beṇə' so'e dižə' contr Jeso'osən' parzə ničh so'ote'ene' la'anə'əczə šə dižə' güenlažə'anə'.

⁶⁰ Pero goc sša bito besyə'əželene' chopə beṇə' əso'e dižə' de'en yedile la'anə'əczə beṇə' zan gosə'anitə' testigw fałs contr le'. Gwde na' besə'əchoj yechopə testigw fałs ca' na' bedile can' gosə'əne'.

⁶¹ Na' gosə'əne': —Benga gwne': “Nada' guaquə yochinja' yo'odao' əblao gan' cho'ela'ocho Diozən', na' lao šonə žazə yeyona'an.”

⁶² Nach gwzoža' ben' naquəch bχoz əblao gože' Jeso'osən': —¿Ebito bi de bi nao' ca' naquə de'e nga chosə'əcuiš beṇə' quinga le'?

⁶³ Jeso'osən' bitobi gwne'. Nach gož bχoz əblaonə' le': —Echnia' le' gwna neto' na' bzo Dioz ben' zo zejlicane gaque' testigw šə le len' Crist Xi'in Diozən' ben' gwleje' par gaquəlene' nasyon chechon'.

⁶⁴ Jeso'osən' gože'ene': —Le ben' nao' na' nada'. Diozən' bsele'e nada' golja' beṇəch. Na' əchnia' le'e, gwžin ža le'ile nada' chi'a cuit Diozən' ben' napə le'ezelaogüe yelə' guac xen, na' nabi'a txen len le', na' le'ile nada' yetja' yoban' to lo'o bejw.

⁶⁵ Cate bene bχoz əblaonə' xtižə' Jeso'osən' gwšo' gwchezə' xe'enə' la' par le' de'e mal juisyən' gwna Jeso'osən', nach gwne': —Babenecho na'a babžia bnite'e Diozən'. ¿Nochxa testigon' chyažjecho?

66 Na' ĵnaquən' ən̄ale che'?

Nach beṇə' ca' bosyo'oži'en gwse'ene': —Babžia bnite'e Diozən' na' cheyalə' gate'.

67 Nach bosyo'oža' xene'e cho'alao Jeso'osən', na' gosə'abaže'ene', na' bale' gosə'əgape'e xague'enə'.

68 Nach gwse'ene': —Šə len' naco' Cristən' ben' gwlej Diozən' par gaquəleno' nasyon chechon', gwṇeya'ašč gwna neto', ĵnon' chgapə' le'?

Bedən' bito gwchebe' šə nombi'e Jeso'osən'

69 Na' lao chac de'e quinga, chi' Bedən' chyo'onə' catə' bžin to no'ol criad che Caifasən' gože'ene': —Leczə leno' le' naco' txen len Jeso'os beṇə' Galilean'.

70 Na' lao yoguə' beṇə' ca' ža'anə', Bedən' bito gwchebe' šə naque' txen len Jeso'osən' na' gože' no'olən': —Bito nezdə' bi dižə'an cho'o.

71 Gwde beyož gože' no'olən' ca' gwyeje' cha'ašilən', na' bezle'i yeto no'ol criadən' le', na' goze'e beṇə' ca' ža'anə': —Benga naque' txen len Jeso'os beṇə' Nasaretən'.

72 De'e yoblə bito gwchebe' šə le' naque' txen len Jeso'osən' nach bzoə' joramentən' lao Diozən' gože' no'olən': —Bito nombi'a be'enə' nao' ca'.

73 Na' chacczə šlož, gosə'əbiguə' beṇə' ca' ža'anə' gosə'əze'e Bedən': —De'e liczə, chono' txen len beṇə' ca' chedə' ca' nga chnio' ngazə nacbja'.

74 Nach Bedən' gože' lega'aque': —Diozən' gone' nada' castigw šə chonlaža'an nia' bito nombi'a be'enə'. Chzoa' jorament lao Diozən', bito nombi'ane'.

Na' le'e gwchežte to lecw.

75 Nach jəza'alazažə' Bedən' can' gož Jeso'osən' le': “Šon las gaquə cui chchebo' šə nombi'o nada'

catə' cuež lecon'." Nach beza' Bedən' lechguale gwchežyaše'e tant de'e goquene'.

27

Gosə'əche'e Jeso'osən' lao Pilatən'

¹ Na' catə' gwye'eni' beteyon', yoguə' bχoz əblao ca' na' yeziqə'əchlə beṇə' golə blao ca' chəsə'anabia' nasyon chechon' besə'adope' jont na' gosə'əchoglaogüe'en de que so'ote' Jeso'osən'.

² Nach boso'ocheje'ene' na' le'e gosə'əche'ete'ene' jse'ene'ene' lao na' Gobernador Ponsio Pilatən'.

Jodən' beyot cuine'

³ Na' Jodən' ben' bdie' Jeso'osən' lao na' beṇə' ca', catə' goche'ine' de que bagoso'oçhoglaogüe'en so'ote' Jeso'osən', beyejene' de'en bdie' le' lao na' bχoz əblao ca' na' beṇə' golə blao ca'. Nach gwyeje' laoga'aque'enə' par bonežjue' lega'aque' šichoa mech plātən'.

⁴ Nach gože' lega'aque': —Malən' bena' bdia' lao na'alēn' to beṇə' cui napə dolə'.

Na' gwse'ene': —Bitobi dolə' napə neto' de'en beno' ca', la' de'e nezzado'on beno'.

⁵ Nach Jodən' bozale'e mech ca' lo'o yo'odao' əblaonə', nach beze'e, na' jəyelo'o don' yene' par beyot cuine'.

⁶ Beyož beza' Jodən', bχoz əblao ca' besyə'ətobe' mechən'. Na' gwse'e ljuežjga'aque': —Bito de lsens co'ochon lo'o caj gan' yo'o mech che yo'oda'onə', çhedə' la' naquən mech de'en gwduxjwcho par niç gotcho be'enə'.

7 Na' boso'oxi'e yesə'əzi'e to yežlyo de'en de che to beṇə' güen yesə' len mechən'. Na' gosə'əzi'en par to capsant gan' yesə'əcuəše'e beṇə' zitə'.

8 Na' yezlyonə' nzi'in "Capsant Chen" xte ža neža chedə' gosə'əzi'en len mech de'en gosə'əyixjue' par gwsə'ote' Jeso'osən'.

9 Can' goquə par ničh goc complir can' bzoj de'e profet Jeremiasən' ben' be' xtižə' Diozən' cana', gan' nan: "Besyə'əzi'e šichoa mech p̄latən', de'en gwsa'aque baḷə beṇə' Izrael zaquə' ben' besə'əgue'ine'enə'.

10 Na' len mechən' gosə'əzi'e yežlyo che to beṇə' güen yesə', can' gwna Xancho Diozən' nada' gaquə."

Bosə'əcuiše' Jeso'osən' lao Pilatən'

11 Na' bžin Jeso'osən' gwzeche' lao gubernadorən', nach gubernadorən' gože'ene': —¿Elen' naco' Rei che beṇə' Izrael ca'?

Nach Jeso'osən' gože'ene': —Le ben' nao' na' nada'.

12 Na' bito bi gwna Jeso'osən' ca de'en boso'ocuiš b̄xoz əblao ca' le' na' beṇə' golə blao ca'.

13 Nach Pilatən' gože'ene': —¿Ebito chendo' catec de'e zan xya nga chsa'ogüe' contr le'?

14 Pero Jeso'osən' ni to xtiže'enə' bito boži'e, xte bebanchgüeicze gubernadorən'.

Gosə'əchoglaogüe'en so'ote' Jeso'osən'

15 Na' de to costombr de que ža lni pascw əgwsan gubernadorən' to pres, con beṇə' yesə'əṇab beṇə' lao' syoda ca'.

16 Na' ližya na' de to pres beṇə' zechgua chei naque' beṇə' mal na' le' Barrabas.

17 Nach Pilatən' gože' beṇə' ca' zjəndobən': —
 ¿Noe' beṇə' quinga chene'ele gwsana'? ¿Barrabas
 na' o šə Jeso'os nga ben' chesə'əne' naquə Crist
 chele?

18 Gone'ene' əgwsane' Jeso'osən' la' nezene' ni
 che de'e zjəžiague'i bχoz əblao ca' Jeso'osən', de'e
 na'anə' boso'odie' le' lao ne'enə'.

19 Ca' chi' Pilatən' gan' chone' yelə' jostisən', bžin
 to rson de'e bselə' no'ol che'enə' gože'ene': “Bitobi
 non ben' par bi castigon' əgwnežjo'one', zdaczə
 ben' licha. De'e zan de'e bžaglaochgua' bišyele len yel
 de'e gwneida' por ni che de'en chac che be'enə'.”

20 Na' bχoz əblao ca' na' beṇə' golə blao ca'
 gosə'əgo'oyele'e beṇə' ca' ža'anə' par yesə'əṇabe'
 əgwsane' Barrabasən' na' yesə'əṇabe' gone' men-
 dad so'ote' Jeso'osən'.

21 Nach gubernadorən' gože' lega'aque' de'e yobla:
 —¿Noe' beṇə' quinga chopə chene'ele gwsana'?

Nach gwse'ene': —Barrabas na'.

22 Pilatən' gože' lega'aque': —¿Bixa gona' len
 Jeso'os, ben' chesə'əne' naquə Crist chele?

Na' yogue'e gwse'ene': —Bde'e le'e yag corozən'.

23 Nach gož gubernadorən' lega'aque': —¿Bixa de'e
 mal babene'enə'?

Na' lega'aque' gwso'osye'e zižjoch gosə'əne': —
 Bde'e le'e yag corozən'.

24 Gocbe'i Pilatən' cuiczə bi de gone'.
 Bachyalə'əch chso'one' scandl juisy. Nach bsele'e
 to beṇə' jəxi'e nis par bone'e lao beṇə' ca' ža'anə'
 na' gože' lega'aque': —Zdaczə bengə licha. Bitobi
 xbagə'a naquən ca de'en gate', chedə' de'en nezze
 le'enə' gate'.

25 Nach yoguə' beṇə' ca' gosə'əne': —Xbaguə' neto' na' xbaguə' xi'into' naquən che yelə' got che benga.

26 Nach bsan Pilatən' Barrabasən'. Gwde na' bene' mendad gosə'əyin soldad ca' Jeso'osən', nach bene' le' lao na'aga'aque' par yosə'əde'ene' le'e yag corozən'.

27 Nach soldad che gobernadorən' gosə'əche'e Jeso'osən' lo'o yo'o che gobernadorən', nach bosyo'otobe' yoguə' soldad ljuežjga'aque' ca'.

28 Na' gosə'əyine' xala'an Jeso'osən' na' bosə'əguacue'ene' to lachə' color əxna ca de'en chsa'az rei ca'.

29 Na' gwso'one' to coron de yešə' bosə'ožine'en yichje'enə', na' ne'e lican' bosə'ogoxe'ene' to ya. Na' bosə'ozo xibe' laogüe'enə' par gwso'one'ene' borl, nach gwse'ene': —jBiba Rei che beṇə' Izrael!

30 Nach bosə'əža' xene'e le', na' besyə'əque'e yanə' de'en noxe'enə' na' gosə'əyine'en yichje'enə'.

31 Na' beyož gwso'one' le' borlən', besyə'əyine' lachə' color əxnanə' de'en bosə'əguacue'ene'enə', na' besyə'əguacue'ene' xacze'. Nach gosə'əche'ene' par jəsə'əde'ene' le'e yag corozən'.

Bosə'ode'e Jeso'osən' le'e yag corozən'

32 Na' catə' besə'əchoje' syodan' besyə'əžague' to beṇə' Sirene le Simon na' la fuers bosə'əgüe'ene' coroz che Jeso'osən'.

33 Na' besə'əžine' to latjə gan' nzi' Golgota, zejen dižə' latjə che yichj beṇə' guat.

34 Na' bosə'ənežjue' Jeso'osən' bino corrient de'e nchixə to rmech zla' par ye'eje', pero le' con bnixe'en bito güe'eje'en.

35 Na' catə' beyož bosə'ode'ene' le'e yag corozən', soldad ca' gwso'one' xe'enə' rif par gotə'əbia' noe' yechelən. Na' de'en gwso'one' ca' goc can' bzoj de'e profetən' ben' be' xtižə' Diozən' cana', gwne': "Yosyo'olē'e xalana'anə' entr lega'aque', so'one'en rif."

36 Nach gosə'əbi'e gwsa'ape'ene'.

37 Na' yichj yag corozən' gan' de'enə' bosə'ozoje' de'en bcuiš le', na' nan: "Bengan' Jeso'osən' Rei che beṇə' Izrael ca'."

38 Na' leczə cana' bosə'ode'e chopə beṇə' bguan le'e yechopə yag coroz. Toe' gwda' cuit Jeso'osən' licha na' yetoe' cuiten' yeglə.

39 Na' beṇə' ca' chse'ej chəsə'əde' gan' da' Jeso'osən' chəsə'əlolə yichje'enə' gwso'onene' borl,

40 gwse'ene': —Len' gwnao' yochinjə' yo'odao' əblaonə' na' šonə žazə yeyono'on, bosla cuino'. Šə len' naco' Xi'in Diozən', beyetj le'e yag corozən'.

41 Na' len bxož əblao ca' na' len beṇə' ca' choso'osed choso'olo'i lei de'en bzoj de'e Moizezən' na' len beṇə' fariseo ca', na' len beṇə' golə blao ca', yogue'e gwso'one'ene' borl, na' gosə'əne':

42 —Yeziquə'əchlə beṇə' bosle' na' cabi chac yosla cuine'. Šə len' naque' Rei che chio'o beṇə' Izrael, yoletj cuine' le'e yag corozən' na'a na' šejle'echo che'.

43 Le' chonlilaže'e Diozən', la' gwne': "Xi'in Dioz nada'." Na' le'icho yosla Diozən' le' na'a šə chaquene' che'.

44 Na' beṇə' bguan ca' zjəda' le'e yag corozən' cuite'enə' chopə la'a, leczə gwso'one'ene' borl.

Can' goquə catə'an got Jeso'osən'

45 Na' do gobiž goc žchol doxen yežlyon' bžinte cheda šonə.

46 Na' do cheda šonə Jeso'osən' gwne' zižjo gwne': —Eli, Eli, ĵlama sabactani? —zejen dižə': Dioz chia', ĵbixchen' bagwlejšyichjo' nada'?

47 Na' catə' gwse'enene' xtiže'enə', balə beṇə' nitə' galə'əzə gosə'əne': —Chaxe' profet Liažən' ben' be' xtižə' Diožən' cana'.

48 Nach bchoj to beṇə' gwsa'adoe' jəxi'e to sponj na' bosgaže'en bino corrient de'en cui bi nchixə, na' bzo'en to lao ya dao' na' bosšine'en cho'a Jeso'osən' par nič güe'eje'en.

49 Na' yebale' gwse'e be'enə': —Gwlezə. Yešč šə yidə Liažən' par yosle'ene'.

50 Nach bisya'a Jeso'osən' zižjo na' be'e latjə bchoj grasy che'enə' gote'.

51 Na' lao orən' catə'an got Jeso'osən', ca naquə lachən' de'en ze lo'o yo'odao' əblaonə' gwchezə gwcholən gwza'azə yichjei bechojte che'elə. Na' lechgualə gwxo' xte gwso'oxj yej ca'.

52 Na' leczə xte besyə'əyaljo bloj ba ca'. Na' zan de'e beṇə' ca' gwso'onlilažə' Diožən' besyə'əbane' ladjo beṇə' guat ca'.

53 Nach catə'an beban Jeso'osən' ladjo beṇə' guat ca', besyə'əchoje' lo'o ba čhega'aque' ca', na' jəya'aque' Jerosalennə' gan' naquə syoda che Diožən'. Na' jəsyə'əlo'e laoga'aque' lao zan beṇə' lao' syodan'.

54 Na' leczə lao orən' catə'an got Jeso'osən', capitannə' len soldad che' ca' nite'e chsa'ape' Jeso'osən'. Na' besə'əžebchgüe' catə' besə'əle'ine' can' gwxo' na' bichlə de'e ca' goquə, na' gosə'əne': —De'e liczə bengə naque' Xi'in Dioz.

55 Na' lecza nitə' zan no'olə latjən' beṇə' gosə'əzecha zitə'alə na' besə'ələ'ine' can' goquən'. No'ol quinga gosə'ənaogüe' Jeso'osən' catə' beze'e Galilean' par chsa'aclene' le' len bi de'e chyažjene'.

56 Na' len no'ol quinga gwzo Maria beṇə' Magdala, na' lecza len Maria ben' naquə xna' Jacob na' Jwse, na' lecza ca' xna' Jacob na' Juan xi'in Sebedeon'.

Bosə'əcuasə'e Jeso'osən'

57 Na' zo to beṇə' gwni'a beṇə' Arimatea le' Jwse, lecza goque' disipl che Jeso'osən'. Na' catə' bachzola chexjw že'enə'

58 Jwsen' gwyeye' lao Pilatən' jəyənabe' cuerp che Jeso'osən'. Nach Pilatən' bene' mendad bosyo'onežjue'ene' cuerp che Jeso'osən'.

59 Nach Jwsen' bego'o lao ne'e cuerp che'enə' na' blaže'ene' to lachə' de'e nyach.

60 Ca naquə Jwsen' bazo to bloj ba che' de'e cobə de'e gwche'ene' le'e yej, na' lo'o ba che' na' gwlo'e cuerp che Jeso'osən' na' bləle' to yej xen de'e bseyjue'ene' cho'a ban'. Nach beze'e.

61 Na' Maria beṇə' Magdalan', na' yeto Maria yoblə, jesə'əchi'e cho'a banə'.

Boso'ozoe' beṇə' chsa'ape' ba che Jeso'osən'

62 Na' beteyo, gwde žan' catə'an choso'osi'ini'e de'en chse'ej chsa'ogüe' ža lni pascon', besə'ədobə bχoz əblao ca' na' beṇə' fariseo ca' par ja'aque' gan' zo Pilatən'.

63 Na' gwse'ene': —Señor, bajəyaza'alažə'əto' can' gwna de'e beṇə' goχoayaguən' can' nembane' gwne': “Yeyon ža yebana' ladjo beṇə' guat ca'.”

64 Bselə'əšga beṇə' žjəsə'ədape' cho'a banə' lao šonə ža, nič cui žja'ac disipl che' ca' še'elə žjəsyə'əleje' cuerp che'enə' na' əse'e beṇə' de que babebane' ladjo beṇə' guat ca'anə'. La' šə əsa'aque beṇə' de que bebane' ladjo beṇə' guat ca', gončən mal cle can' benən antslə catə'an bxoayague' beṇə' par gwsa'aque' de que Diozən' bsele'ene'.

65 Nach Pilatən' gože' beṇə' ca': —Gona' le'e soldad ca'. Le'e che'ega'aque' par əsa'ape'en ga zelao yesə'əzaque'ene'.

66 Nach ja'aque' len soldad ca' na' boso'očiše'e sey le'e yejən', na' boso'onite'e soldad ca' gwsa'ape' ban'.

28

Jeso'osən' bebane' ladjo beṇə' guat ca'

¹ Na' catə' gwde ža dezcanz chechon', bał dmiḡw Maria beṇə' Magdalan', na' Maria ben' yeto, ja'aque' jəsə'əgüie' cho'a banə'.

² Na' goquən' lechgualē gwxo' chedə' angl che Xančon' betje' yoban', na' bžine' gwcue'e yej de'en nseyjw cho'a ban', na' gwchi'e lao yejən'.

³ Na' anglən' lechgualē chactit cho'alaogüe'enə' caczə ga chep yes na' xala'ane'enə' naquən šyış xilə' juisy caczə be'eyə'.

⁴ Na' catə' besə'əle'i beṇə' gop ca' le', lechgualē besə'əžebe' xte gosə'əxize' na' gosə'əbiḡe' gwsa'ate' šlat.

⁵ Pero na' anglən' gože' no'ol ca': —Bito žeble. Nada' nezdə' de que Jeso'osən' ben' boso'ode'e le'e yag coroz nan' cheyiljle.

⁶ Notoch no nla' nga. Babebane' ladjo beṇə' guat ca', can' gwnacze'. Na' le'e da le'e ggüia latjə ga nga bosə'əxoe' cuerp che'enə'.

⁷ Ležjəya'acdo le'e žjəyedixjue'i disipl che' ca' de que babebane' ladjo beṇə' guat ca'. Na' ye'ega'aclene' de que gwyobe Jeso'osən' yežine' Galilean' cle ca le'e na' Galilea na' le'ilene'. Can' ben Diozən' mendad detixjue'ida' le'e.

⁸ Nach no'ol ca' besa'aque' cho'a banə' do chesə'əžebe' pero lechgualē chesyə'əbeine', zjəya'acdoe' zjəsyə'ədixjue'ine' disipl ca' dižə' cobən' de'en gož anglən' lega'aque'.

⁹ Na' lao zjəya'aque' zjəsyə'ədixjue'ine' apostol ca' can' goquən', besyə'əžague' Jeso'osən' tnez. Nach gože' lega'aque': —Dioxi.

Na' no'ol ca' gosə'əbigue'e gan' zo Jeso'osən', bosə'ozo xibga'aque' laogüe'enə', na' gosə'əyele'e ṇi'enə' tant besyə'əbeine', na' gwso'elaogüe'ene'.

¹⁰ Jeso'osən' gože' lega'aque': —Bito žeble. Le'e žjəyedixjue'i beṇə' ljuežjcho ca' de que cheyalə' əžja'aque' Galilean' nič na' yesə'əle'ine' nada'.

Beṇə' gop ca' jəsyə'ədixjue'ine' bχoz ca' can' bagoc

¹¹ Na' catə' beza'ac no'ol ca' cho'a ban', baļə soldad ca' beṇə' ca' gwsə'apə ba che Jeso'osən' ja'aque' syodan' jəsyə'ədixjue'ine' bχoz əblao ca' can' bagoquən'.

¹² Nach besyə'ədobə bχoz əblao ca' len beṇə' golə blao che ṇasyon chechon' bosə'əxi'e naclə so'one' ca naquə de'en əgwse' soldad ca' lega'aque'. Na' beyož bosə'oxi'enə', bosə'onežjue' soldad ca' de'e scha'o mech.

13 Gwse'e lega'aque': —Šə no ənabe le'e bin' goquən', na' ye'ega'aclene' de que š'e'ləo laochtasle, disipl che' ca' besyə'əbeje' cuerp che'enə' lo'o ban' na' besyə'əyo'en ga yoblə.

14 Na' šə gubernadorən' yenene' dižə' quinga, neto' žjəyeye'exento'one' par ničh cui əže'e le'e na' par ničh cui gone' le'e castigw.

15 Na' soldad ca' gosə'əzi'e mechən' de'en bosə'ənežjue' lega'aque', nach gwso'one' con can' gwse' bχoz əblao ca' na' beṇə' golə blao ca' lega'aque'. Na' yoguə' can' gosə'əna soldad ca' gosə' gwlaļjən doxen gan' nitə' beṇə' Izrael gwlaž chechon'. Na' xte ža ņeža beṇə' gwlaž chechon' chse'ejle'e xtižə' soldad ca'.

Jeso'osən' bene' mendad əso'e xtiže'enə' yoguə' nasyon

16 Nach disipl che Jeso'osən' beṇə' ca' šnejja'aque' Galilean' par jəsyə'əšague' Jeso'osən' to laoyə'a gan' bene' mendad yesyə'əžague'.

17 Na' catə' besə'əle'ine' Jeso'osən', gwso'elaogüe'ene'. Pero bia'aczə to čhope' gwsa'aczejlaže'e šə le'enə'.

18 Nach bgüiguə' Jeso'osən' gan' nite'enə' na' gože' lega'aque': —Baben Diozən' par ničh chnabi'a doxen yoban' na' yežlyon'.

19 De'e na'anə', le'e žja'ac le'e žjəsed le'e žjəlo'i beṇə' ca' ža' yoguə'əloļ nasyon par ničh əsa'aque' disipl chia'. Na' le'e gwchoaga'aque' nis par ničh yesə'əlo'e de que chso'onlilaže'e Xacho Diozən', na' nada' Xi'ine', na' Spirit che'enə'.

20 Na' əgw̥sed əgw̥lo'iga'aquelene' par nič̣h
so'one' yoguə'ə̌ľľ de'en babena' mendad gon̄le.
Nada' zocza' len le'e yoguə' ža xte ca te che yežlyon'.
De'e na'azən' chzoja'.

**Testament Cobə de'en choe' dižə' che ancho
Jesocristən'
New Testament in Zapotec, Yatzachi (MX:zav:Zapotec,
Yatzachi)**

copyright © 1971 Wycliffe Bible Translators, Inc.

Language: Zapotec, Yatzachi

Translation by: Wycliffe Bible Translators, Inc.

Zapoteco, Yatzachi [zav], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yatzachi

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
d439ce34-67af-5db7-b82c-f44ad9932db2